



Early European Books. Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.663








Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.663





Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.6.663



Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL 1.6.663



1. 6. 663

1 Q. 6




~~n° 644~~

230

XXV

10V. Vir. viccon







PAVLI IOVII NOVOCOMEN-  
SIS VITAE DVODECIM VICE-  
COMITVM MEDIOLANI PRIN-  
CIPVM.

EX BIBLIOTHECA REGIA.



Βασιλεὺς τῶν ἀγαθῶν καὶ τῶν αἰχμητῶν.

L V T E T I A E.

Ex officina Rob. Stephani, typographi Regii.  
M. D. X L I X.

Ex priuilegio Regis.



REGI JOHANNI NOVODROMI  
AVITAE VIOBESIM VICE  
HABITAE VIOBESIM VICE  
CIVITAE

EX LIBRIS REGIAE




EX LIBRIS  
BIBLIOTHECAE REGIAE  
M. D. XLIX

Ex privilegio Regio

3  
PAVLVS IOVIVS EPISCOPVS

Nucerinus HENRICO Gallia Delphino

S. P. D.

 V V M ad Niceam in spem exoptatæ pacis adductus, Carolo fratri tuo Vicecomitū origines & principatus initia, breui commētario me perscripturum promississem, nihil inde mihi antiquius fuit, quàm vt id quod susceperā, maturè perficerem. Arbitrabar enim non multo pōst futurum, vt is summa spei adolescens, cum optimo iure suo, tum præclara Cæsaris Augusti liberalitate, Cisalpinæ Gallia imperio potiretur. Quamobrem non modò mihi honestum, sed illi etiam maximè decorum atque iucundum fore prouidebam, si tãtorum Principum res gestæ in arctum volumen referrentur. Nam eos bellica laude, & magnificentia operum, & splendore vitæ cum clarissimis Græcorum & Romanorum comparari posse, sine controuersia iudicamus. Ab hac utique nobilissima stirpe, maternum genus Regiæ Valeriorum domui insertū deducitis, vnde hæc Mediolanensis regni hæreditas aditur, tot cruentis iactata litibus, nec vllis vnquam immitis Fortunæ terroribus intermissa. Regnauère autem ex hac illustri familia duodecim Principes cētum & septuaginta annis. Tot enim sunt ab Othone ad Philippum, in quo Principum progenies defecit, quum is sine legitima prole decesserit. Cæterum confecto libro, quū offerendi huius muneris votum, nouus ex violatis induciis

A.ii.



renati belli tumultus aliquandiu fefellisset, tandem id totum Carolus ipse atroci fato nobis ereptus interrupit, grauiore quidē nostro luctu, quod iuuenis spectata virtute florentissimus, in ipso partæ pacis limine conciderit. Id igitur quod ei debebam, tibi rerum omnium hæredi, integra fide persoluo. Tu verò sapienter generosèque feceris, ac planè regiè, si eo animo librum euolues, vt repudiatis vitiis, summos tantum virtutum flores decerpas. Id porro tibi haud difficile fuerit, qui paternæ laudis æmulus, ac auitæ constantiæ præclarus imitator, ita diuersas miro temperamento in vnum virtutes misces, vt iam Gallia minimè dubitet, quin sis duobus longè maximis Regibus maior atque felicior euasurus. Vale. Romæ, IIII. Kal. Aprilis. M. D. XLVII.



5

PAVLI IOVII NOVOCOMEN-  
sis in Vitas duodecim Vicecomitum Mediolani  
Principum Præfatio.



ET V S T A T E M nobi-  
lissimæ Vicecomitum fami-  
liæ qui ambitiosius à præalta  
Romanorū Cæsarum origi-  
ne, Longobardisq; regibus  
deducto stemmate, repete-  
re contédunt, fabulosis pe-  
nè initiis inuoluere viden-  
tur. Nos autem recentiora  
illustrioraque, vti ab omnibus recepta, sequemur: cō-  
tentique erimus insigni memoria Heriprandi & Gal-  
uanii nepotis, qui eximia cum laude rei militaris, ci-  
uilibusque prudentiæ, Mediolani principem locum te-  
nuerunt. Incidit Galuanus in id tempus quo Medio-  
lanum à Federico AEnobarbo deletū est, vir summa  
rerum gestarum gloria, & quod in fatis fuit, insigni  
calamitate memorabilis. Captus enim, & ad trium-  
phum in Germaniam ductus fuisse traditur: sed non  
multo post carceris catenas fregit, ingentique animi  
virtute non semel cæsis Barbaris, vltus iniurias, patriā  
restituit. Fuit hic (vt Annales ferunt) Othonis nepos,  
eius qui ab insigni pietate magnitudinēque animi, ca-  
nente illo pernobili classico excitus, ad sacrū bellum  
in Syriam contendit, communicatis scilicet consiliis  
atque opibus cū Guliermo Montifferrati regulo, qui  
à proceritate corporis, Longa spatha vocabatur. Vo-  
luntariorum enim equitum ac peditum delectæ no-  
A.iii.



bilitatis viginti milia ad Boemundum à Brundusio transfretantem adduxêre, ne Itali vel studio religionis, vel bellica laude Gallis inferiores esse viderentur. Cæterum Otho iam duobus asperrimis ad Nicæā atque Orontem præliis, spectatæ virtutis famam consequutus, oppugnate demum Hierosolymas Gothifredo, gloriosa totius exercitus acclamatione, coronam promeruit, quum Volucem Saracenorum ducē medio in campo ad singulare certamē, fortissimū quēque ex Christiana acie prouocantem, ipse vnus ante alios, nihil eius immanis barbari ferocia, vel terribili insignium armorum specie permotus, fortiter atque feliciter deuicit, retulitque de confossi hostis galea opimum plenumque immortalī gloria spoliū, auritam scilicet viperā inexplicatis spiris minaciter à cono cassidis erectam, & puerum passis manibus deuorantem: quod vnum auspicate virtutis argumētum, non modo gentilitiæ laudis gestamen fuit, sed & posteris id insigne audacter vsurpantibus, & imperia, & opes, & latē gloriā portendit. Fuêre qui existiment Volucem ex stirpe Alexandri Magni progenitum, tulisse pro insigni viperam, ex Olympiadis fabula, puerum parturientem, quod ea à dracone se compressam fuisse, Iouis imagine prædicaret.





Vera effigies Othonis Archiepiscopi ad Angleriam  
 spectatur in eo testudinato conclauis, quod est in  
 arce vbi victoriam de Turrianis ad Decimum præ-  
 lio superatis depicta cum elogiis Latinis videmus.

A.iii.



**N**obilissimi Principatus fundamenta feliciter Otho iecit, Vberti filius, qui ab Asiatico Othone proauo nomen acceperat. Natus est Inuorio in pago ad Verbanum lacum, magnis quidem natalibus, sed patrimonio tenui, & tum adeò afflictis totius familiæ fortunis, vt quatuor tantum & planè ignobilium vicorū ditione, propinqui Proceres maiorum suorum nomen tueretur. Hi fuere, Inuorium, Massinum, Vergantum, & Olegium: sed fundos etiam peramplos Mediolani extra portam Iouiam à Sultano Vicecomite emptos constat. Frequentibus enim Barbarorum irruptionibus, & ciuili præsertim bello, cuncta apud Insubres conturbata prostratæque erant, vt non mirum sit, tantas opes in publica calamitate corruisse. Sunt qui ex genitura, propter admirabiles fiderū concursus, imperiū ei à Mathematicis prænuntiatum fuisse asseuerent. Verū ipse repudiatis prorsus Astrologis, id vnum pro insigni ostento iocabundus accepit, quòd Vicecomite Placentino, Mediolani Prætor (qui tum erat supremæ potestatis magistratus) & Othone Cæsare imperante, in lucē esset editus. Enituit satis maturè in adolescente ingenium alacre, præaltū, ardens, & quod mirabile erat, graui prudētia temperatum: accesserat corporis atque oris dignitas maximè excellens. statura enim erat excelsa, & nexu neruorum longè firmissima: pectore autem lato atque extanti, & radiosus prægrandibusque oculis. eloquentia verò illustri, exquisitisque literis, quū oporteret, ad



iucunditatem exornata, adeò vt quum omnibus magnopere placeret, etiam sibi meliore fortuna dignus videretur. Itaque ardente ciuili bello Gallia Cisalpina, domo egressus, Romã se contulit ad Octavianum Vbalinum Cardinalem, authoritatẽ atque opibus florentem: à quo benignè susceptus, adscribitur familiæ inter honestissimos. Nec multo post, quum in ea domo aliquãdiu virtutis eximiæ, perurbanæque comitatis, & naturæ nequaquam fallacis vel insidiosæ testimonia passim reliquisset, Octauiano præalta semper agitãti, in otio pariter atque negotio comes esse cœpit: adeò vt munera legationum obeuntem, & trans Alpes accitum, inter præcipuos sequeretur: hisque maximè temporibus extra ordinem necessaria domesticæ disciplinæ officia, cæteris languentibus aut occupatis, diligenter adimpleret, abnuenti semper & coacto similis, ne ambitione potius, quàm obsequio, amicorum munia suscipere videretur. Literas enim scitè atque expedite exarabat, dictabat elegãter, in omniq; occasione oeconomicarum rerum, cuncta ad pietatẽ, ad decus & temperantiam reuocabat: Quibus maximè rebus, ita appetente Cardinalis ingenio, certissima laus pararetur, honesta quidem sibi in primis ad promerendam ampliores gratiã, & demum ipsi Cardinali decora & utilis, ad petitionem summi Pontificatus contẽdenti. In vnam enim eam curam amplissimos Senatores haud dissimulanter incumbere, vti aulæ artium peritus, facile intelligebat. His moribus iam abundè claro, & prospera vigenti fama, Leo Peregrinus Mediolanensis Antistes, in exilio apud Legnanum mortuus nuntiatur. Hunc Martinus Turrianus tanquam patronum du-



cémque nobilitatis vrbe pepulerat, quum ipse antea populi causam aduersus Patritios suscepisset, perturbatæque Republica, statum popularem, cæsis disiectisque nobilibus, induxisset. Oderat Octavianus Turrianos tanquã nobilitatis hostes: erat enim è vetusta ac illustri apud Etruscos Vbaldinorum familia: & priuati quoque odii causæ intercedebant, parum quidem honestæ, sed ob id validiores. Nam ei Martinus paucis antè annis notam nefariæ cupiditatis inusserat, quum fortè in Galliam iter habentem, hospitioque susceptum, in tēplo Diui Ambrosii ne carbunculum mirabili fulgore & rara magnitudine conspicuum è donariis auferret, armatus prohibuisset. Dicebat enim Cardinalis cupidè inspiciendo tractandoque eam gemmam, omnino dignã videri quæ ad ornamentum sacrorum solennium, in summa Pontificis Maximi tiara cōspiceretur. Hic est ille Vbaldinus præalto ambitiois quoque ingenio, & magnis opibus potēs, Danthis poetæ carminibus nec ambiguo quidem probro celebratus. Itaque ad excidium Turrianæ domus, & ad conddendum in Vicecomitum familia principatum, fatali euentu, Otho Mediolanensium Archiepiscopus declaratur. amplissima enim potestate, iure, munereque legationis Octavianus fungebatur. Idque approbauit Urbanus Pōtifex, vel ob id quod duos fœda dissensionē Mediolani defuncto Leoni suffectos audiebat, Raimundum scilicet Turrianum, Martini patruelis potentia armisque potius quàm liberis suffragiis prouectum, & Franciscum Septariensem, quē virtutis commendatione populus tribusque omnes in inuidiam Martini, veluti iam impotenter & superbè dominan-



ris extulerant. Fauebat Othoni Vrbanus, vt maiestatis Pontificiæ iura tueretur. Itaque cum ritè consecratum, insignitumque mitra & lituo pastoralis, ad sacerdotii munus obeundum in Cisalpinâ Galliam dimittit; eo etiam cupidius, quòd Turrianis infensus erat. Nam fortè per id tēpus magno Othonis commodo Vbertus Pallauicinus Turrianarū copiarum dux, Placentinorum agros Pontificiæ ditionis populabundus afflixerat. Erepsent Turriani paucis antè annis ad summam potentiam, ab initio in Republica popularem auram optimis artibus aucupantes. Postremò autem dominandi libidine accensi, totius publici consilii formam, Prætoris arbitria, & suffragiorum denique omnium iura libertatēque sustulerant. Fuere illis magnæ opes in Saxina valle, quæ est ad Lariū lacum: creuerantque plurimum hæreditate Tacii Reguli, qui geminos è Belgica Gallia profugos Turrianos fratres militaris indolis sibi generos adsciuerat, ac adoptarat in filios. Ab his progenitum ferunt superiorem Martinū, cognomine Gigantē, qui post egregiæ virtutis facinora, ad Antiochiā multis in præliis edita, à Saracenis captus, & miserabili supplicio affectus fuisse traditur. Huius nepos fuit Paganus, vir excellenti virtute prudentiæque, qui multa cum laude liberalitatis & pietatis Mediolanenses à Federico secundo Cæsare ad cohortis nouæ oppidum, cruento prælio profligatos, ad se recepit, incredibilique benignitate, omni humana ope adiutos fouit, domumque dimisit. Sed hi non multo post optimè de se merito gratiam retulère, demandato ei Præturæ magistratu, ipsoque cum vniuersa familia ciuitate donato. Paganus ita gessit magi-



stratum, vt nemo temperantia, æquitate, atque industria potior videretur, nisi populi ac infimæ plebis defensorem se professus, paulò acerbius Patritios, tanquam superbè ac petulanter minores ordines diuexare solitos, patria exturbandos suscepisset. Hunc fato functum, & ad Claræ vallis templum funere publico elatū, omnes ordines diu luxerūt, honestarūntq; marmoreo sepulchro, insculptis carminibus, cum titulo magnificè atque feliciter administratæ Reipub. Pagano successit Martinus frater, vir ingenio perspicaci, erecto ad laudem, ac imperii & gloriæ maximè cupidus: cæterum, quæ ad id opportuna erant artes, multa ciuili clemētia & lenitate tēperato. Hunc populus defensore suum, patriæque patrē appellauit. Paulum enim Sorefinā, Leonēmque Peregrum vrbs Archiepiscopū, Patritiorū duces expulerat, bonis exuerat, exilioque multarat, contuderatque adeò nobilitatis animos, vt Respublica numerofo infimorum hominum consilio, in speciem libertatis, non obscurè autem ad vnum ipsius arbitrium regeretur. Eo modo Nobilitate in ordinē redacta, & grassante plebe in Patritium sanguinem, Pontifex Romanus affectam laceratamque ciuitatem miseratus, Rauennatem Antistitē Mediolanum misit, qui vsus officio Christianæ pietatis, cædes tolleret, odia mitigaret, statūque perturbatæ vrbs componeret. Is capita factionum ablegauit, & ante alios Martinum. Sed is nō multo post euocatus studio veterū amicorū, hostibūque ad Diui Dionysii tēplum tumultuario certamine profligatis, in urbem est receptus. Exinde Martinus vsurpato imperio, cuncta regere, plebīsq; præcipuè commoda tueri, no-



uis & fellulariis hominibus præsidio esse: contra verò Nobilitatem asperrimis edictis armisque persequi, & latè vndique summouère. Confugerant Patritii ad A-  
ctiolinum à Romano, quem Ecelinum perperam ali-  
qui nominant, qui rei militaris peritia, & immanitate  
crudelis ingenii, Duces omnes atque Tyrannos ante-  
ibat. Is Cæsarianarum partium Princeps erat, Federi-  
còque secundo Dux & miles operam nauarat. Ita-  
que magnis coactis copiis, aduersus Turrianos bellū  
suscepit: transgressusque Abduam, in agrum Medio-  
lanensem sese effudit, Patritios in patriam reducturus,  
vlturusque eorum iniurias sanguinaria manu, nisi Dii  
eam diræ pestis cladem auertissent. In eo enim metu  
& trepidatione Martinus constanti animo exercitum  
sub signis eduxit, interclusumque Tyrannum amne  
Abdua, quum in tergo Vbertus Pallauicinus, & Actius  
Atestinus, Bosiusque Douaria fœderati Principes in-  
starent, commissa pugna superauit, tanta felicitate, vt  
ipse Tyrānus Nerone crudelior, suo atque alieno cruo-  
re perfusus, quum sese incitato insigni equo, eripere  
conaretur, viuis in potestatem hostium deuenerit,  
nec paulò post in tabernaculo Bosii repudiatis reme-  
diis expirarit: quū nullis vel benignis precibus adduci  
posset, vt benè speraret, & obligari vulnera pateretur.  
Toruis enim oculis ferociā spirans, neminique respō-  
dens, tot scelerū pœnas accersita morte effugere pro-  
perabat, ne turpi incertæ vitæ desyderio, ludibriis ac  
ignominia superesset. Cæterum eo prælio Nobilitas  
prostrata fugataque est, & Martinus authoritate, glo-  
ria atque opibus adauctus, soluto pudore, dominatum  
arripuit, aboleuitque eius Concilii nomen quod po-



pulus sub Credentia nomine instituerat, cuius decretis ipse dudum solenni sacramento adactus, se statuerum iurauerat. Sed ea moderatione & téperantia Martinus utebatur, ut nullum omnino superbum aut insolens dictum ore vel gestu prorsus excideret. Studebat tranquillitati, copiaque ac vbertati rerum omnium: Paulique Sorefinæ aduersarum partium Principis filiam matrimonio sibi copularat, ut inimicis Ducem opulentum detraheret, & pacem atque otium se maximè cupere videretur. Sed Patritii ab his nuptiis repudiato Paulo, ad Iordanem Ruscam Comensem se contulerunt. Quamobrem Martinus maiorem in dies gratiam, exactaque prudentiæ opinionem est consequutus. Ad confirmanda quoque populi studia, declinandamque inuidiam, quum sumptuosius ædificare diceretur, omnes operas ad Ticinum cōduxit, ut non procul ab Abiato oppido, emissarium pernauigabile subtrac̃ta parte amnis, ad urbem perduceret, ad facillimas subuectiones importandorum ex agris fructuum: qua incomparabili commoditate populus in quotidianos usus perpetuò frueretur. Sub id tempus variæ Patritiorum manus ab exilio, latebrisque remotiorum oppidorum ad Othonem peruenerunt, patriam & Sacerdotii sedem ex autoritate Pontificis repetentem. Hi nanque in nouam spem (quæ exules & miseros nunquam destituit) erecti, vndique coibant, parabant arma, veteres amicos & propinquos, qui domi remansissent, nuntiis ac literis sollicitabant. Itaque Otho crescentibus viribus, & confecto noctu itinere, ad Verbanum clientelasque suas cōtendit, Aronamque occupat, ut ibi certa sedes fieret, & firmiores demum



copias tutò cogeret, ad bellum Turrianis inferendum. His rebus cognitis, Martinus quanta maxima potuit celeritate, copias ex oppidis deducit: Pallauicinū euocat, quem in quinque annos perampla mercede conduxerat: Ticinūque transgressus, ad Aronam castrametatur. Horum aduētū Otho quum diu terrestribus & naualibus copiis obsessus & oppugnatus, nihil vel repugnando vel erumpendo proficeret, Fortunæ cefsit, deditoque oppido, noctu profugit, ne in conspectum hostis deueniret, & suos ex pactione seruaret incolumes. At Turrianus Aronæ Angleriæque & Brebiæ arces demolitur, vt nihil in quo hostis tutò cōsisteret, omnino relinqueretur. Exulante autem Othone, Martinus moritur, Philippoque fratri administranda Reipublicæ gubernacula committuntur. Verū ille confirmatis opibus ad Principatū apertè contendens, se Prætorem in decem annos creat, certantibusque etiam Comi intestino bello Vitanis atq; Rusconis vrbe potitur, Prætoremque ibi de Vitanis dicit: aduersarios expellit, in Volturenāque vallem vsque persequitur. Sed tanta vis erat Patritiorum exulum, duce præsertim Othone, vt occulto metu plurimum angeretur, ac ob id parandas sibi omnino nouas amicitias affinitatibus atq; coniugiis existimaret, vt aliquorum nobilium assensu atque studio, stabilire opes, retinere vim Prætorii iuris, ac Imperii authoritatem maiorū virtute collectam tueri posset. Itaque Guliermo Pusterlæ Patritio filiam nuptui dat: ipse celebs vxorem ex Biraga nobili familia ducit: traditur etiā vxor Francisco Turriano Iacobi patruelis filio ex gente Castillionea: qua cognatione subnixus, dispersis iam atque



attritis exulum viribus, vt impēsa parceret, Vbertum Pallauicinum, exacto stipendii quinquennio, missum facit, singulari Turrianæ gētis incommodo: nam ille contumelia accensus, per occasionem quantis maximè potuit artibus, Patritiis adhærens, Turrianos semper oppugnauit. Sub id tēpus Carolus è Narbonensi Gallia in Italiam venit, euocatus ab Urbano Pontifice aduersus Manfredum, Pōtificiæ maiestatis auctoritatem, patris & proauis more conuellentem. Huius amicitiam quum Turrianus magnopere appeteret, copias eius intra fines recepit, & cōmēatu, veste, armis liberaliter adiuuit, vt Gallorum præsidio firmior factus, Pallauicini nobiliūque exulum vim propulsaret: & quò præclarius studium erga regē ostenderetur, Emberram, virū Gallum, Regis familiarem, Prætura ciuitatis ornauit. Philippus interea moritur, repentino correptus morbo. hic vir belli pacisque artibus abundè instructus, Principis & domini spiritus gerebat, virtute Martino par, sed astu ac ambitione superior. Accepit imperium statim Napus, quem Napoleonem aliqui appellāt, Pagani filius, vir militaris, callido tyrāno, quā moderato Principi similior. Siquidem nihil illi antiquius fuit quā Patritios cadere, proscribere, omnibūsq; contumeliis ac iniuriis exagitatos ad internicionē delere. Erat Laudi Pompeiæ certus miseris & profugis receptus, benignitate Vistarinae familiæ, cuius princeps erat Succius. Hūc Napus obsessa & capta vrbe, periculoso certamine viuū cepit & interfecit, necatis etiam in carcere eius gentilibus ac amicis. Fisiragam verò familiam Vistarinae ex aduerso æmulam, quæ Turrianæ factionis nomē tueretur,



retur, aduersariorum opibus ditat, & principem in vrbe constituit. Vtque Guliermo Montisserrati regulo, ad quem fortè mortuo Pallauicino Patritii exules confugerant, rerum suarum metum incuteret, traiecto Ticino, & admotis ingentibus copiis, Viglebannum expugnauit. Iisdem diebus Urbano vita functo, Clemens Pontificatum adeptus, enixè contendit ut Otho à Turrianis reciperetur, ut sua in sede sacra populis id expetentibus administraret, prædixque Templo dicatis, & tota diuini iuris possessione potiretur. Cæterum Napus qui ad Othonis nomen fatali quodam metu expergisci, ac sermone & vultu inhorrescere erat solitus, Pontificis literas & preces atque item minas superbè contemnebat. Itaque indignante Pontifice, tanquam rebellis & impius, sacris interdicatur: Mediolani templa omnia clauduntur. Sacrificiorum solennibus intermissis, populus dolet & angitur: neque tamen timore contritus, postulare audet, ut admissio Antistite, ira Pontificis leniatur, simulque ciuitas his imprecationibus expietur. Hærebatur Imperii finibus Otho, ad eumque exules undique confluxerant. Erat enim in eo præclara autoritas, ex honestissimæque repetendæ patriæ belli causa, magna spes omnibus proponebatur. Quid enim æquius ac honestius, quàm pro libertate sacrati Antistitis, contra Tyrannum impotentem, sauum, inferorumque furiis, sacrosancti Pontificis execratione deuotum, arma ferre, crudelique dominatu detrudere? Quum in his consiliis Nobilitas omnis versaretur, ob idque in agro Vercellensi sapius coiret, Napus Paganinum fratris filium, acri ingenio iuuenem, & nobilium cadi-

B.i.



bus assuetum, Vercellensium Pratorem designat: petit à primoribus ciuitatis vt eum recipiant, in magistratūque constituent. Ea res delata ad Patritios, qui Vercellis erant, omnium animos metu concussit, doloreque succendit. Nemo enim vel ignarus rerū non prouidebat eo consilio Turrianum, & eū quidē cruentum ferocēque hominem, Vercellis Pratorem imponi, vt Patritios suæ gentis hostes vrbe pelleret, passimque opprimeret, ac omnibus latè locis persequeretur. Itaque exulum Principes, coacta armatorū manu, aduentantem cum Pratoriis insignibus Paganinum in itinere obtruncant. Quo nuntio Napus & Emberra adeò in vindictæ cupiditatē exarsere, vt immani eorum iussu, omnis sexus & ætatis exulum propinqui, quū Paganini cadauer ad Diui Dionysii templum atrata familia conuexisset, ad eius tumulum tanquam hostiæ, mactarentur: & quod miserabile spectaculum fuit, ad sepulchra maiorum plaustris in urbem referretur. Scribit Tristanus Calchus, adeò vefana rabie Napum fuisse correptū, vt Musca filius, ad quem postea ex diuturno carcere recuperati imperii laus peruenit, comprehenso medico, cui salutem ex lethali morbo acceptam referebat, vitam vix impetrare potuerit: quum grauissimè iuraret iuuenis, dolore ac inedia sibi vitæ exitum inuenturum, nisi vir sibi salutaris & innocens ab crudeli supplicio seruaretur. Napus tamen vbi totam immanis vindictæ libidinem expleuit, iræque deferbuit, id execrabile facinus dereffari, in Emberræ scuitiam tum externi repentini que hominis, tum & rarò sobrii, culpam referre, multa verborum ac vultus simulatione, facti a-



trocitatem lenire. Nec multo post ubi id populum grauius tulisse animaduertit, ad mitigandā inuidiam Gallus Prætura deiicitur, atque vrbe, ob iratos ciues, excedere iubetur. Nihilo secius tamen Carolo Regi, de interfecto hoste Manfredo Rege, partoque Apuliæ regno, victoriam gratulatur, misso ad id munus Francisco fratre, cum ornatissimo comitatu, donisque regalibus: qui alacriter susceptus, & donatus baltheo militari, Regiæque militiæ honoris causa adscriptus, ita demum Mediolani vitam egit, ut ad imitationem Gallici luxus, splendore & domesticarum rerum apparatu Napum Principem anteiret. Erat res Turriana in summo aridentis fortunæ fastigio, cruciabatûrque ingenti cura Antistes Otho, mœstaque & extorris Nobilitas errabat, ab infimo quoque Regulo opem implorans, uti consumptis opibus atque amissa dignitate, quando toties repetita patria, bellū graue & ærumnosū improsperè & diis haud dubiè inuitis renouasset. Residebat tamen in Othone mira constantia, & spes incredibilis adipiscendi imperii Sacerdotalis: & proinde infracto animo Patritii eo duce, qui iustissimam præferret causam, omnia sibi facilia fore existimabāt. Erat inter extorres Squarcin⁹ Burrus, vir apprimè nobilis & opulentus, vigoreque animi ac armorum peritia illustris: cuius filia nomine Bonacosa, virtute, forma & fecunditate insigni, Matthæo Magno nupserrat. Huic Otho Patritiique, Pallauicino per eos dies morte surrepto, imperium militare detulerant, inierantque fœdus cum Guliermo Montisferrati Marchione, qui Ferdinandi Hispaniæ Regis erat gener, eo consilio, ut maiore belli mole Turrianos oppugnarent.

B.ii.



Destinabat enim sibi Guliermus, si id bellum susci-  
peret, maiores opes, maiusque sibi in dies imperium.  
Verum externis foci auxiliis sibi opus esse iudica-  
bat, ut eximia virtutis gētem, bellicarumque artium  
maximè peritam, Germanis & Gallis opponeret. Re-  
manerāt enim aliquot Gallorum turmæ apud Tur-  
rianos, ex his quos Flandrius Comes, Caroli Dux, in  
Italiam adduxerat. Ipso enim in ea pugna interfecto,  
qua Pallauicinū & Gibellinos superarat, plerique ex  
eius equitatu, postquā debellatum esse videbatur, or-  
bati Duce, subsistere in circumpadana regione, quā  
Neapolim usque ad Regem contendere maluerant.  
Itaque ad Ferdinandum ipse Burrus in Hispaniā mit-  
titur, ut legationi maior inesset autoritas. Is uti erat  
gravi facundia, explicatis partium pariter ac hostium  
viribus, terminatisque consiliis, à Rege copias im-  
petrauit, impositisque in naues sexcentis equitibus,  
& aliquot iaculatorum & sagittariorum cohortibus,  
in Liguriam est reuersus. Nec multo post ab Sauona  
superatis Apennini iugis, cū ea manu ad Guliermum  
peruenit. Rex enim generū suum existimatione atque  
opibus adaugere, & prorsus efferre in spem ingentem  
amplioris imperii magnopere cupiebat. His confir-  
mati auxiliis cū Othone Burrus & Guliermus, ad Vi-  
glebanum quod Turrianus præsidio tenebat, procef-  
sere. Tētata est per quatuor dies oppugnatio, promo-  
ris scalis, & in coronā circumpositis funditoribus &  
sagittariis, ita ut murus continēter propugnatoribus  
nudaretur. Sed Turrianus miles pluteos ex crassiore  
materia pinnis coaptarat, quibus protectus magnam  
vim lapidū deuolvebat, vulnerabaturque subeuntes.



neque spes vlla expugnandi oppidi, nisi ingentibus balistis & machinis, longo laboriosoque opere ædificatis, relinquebatur: quod tum minimè conādum existimabat Burrus, ne vltra Ticinum quatiēdo oppido hærens diutius distineretur: quum superare amnem, & quamprimum oppidis Mediolano proximis bellū & pauorem inferre cōgitarēt. At Viglebanenses irrito hostiū conatu, & felici suorū successu elati, quum Burrus milites ab oppugnatione reuocaret, cōtinere se minimè potuerunt, quin adaperata porta protinus erumperēt. Hos temerè incumbentes, insolentiūque prouectos, Hispani suo more refugiendo, & latè pauorem simulando, opportunè ludificati, à porta longius abstraxēre, adeoque celeriter in gyrum reflexis turmis circumuenere, vt hostes, quum se penè oppido exclusos cernerent, & in receptu multis confixi iaculis laborarent, admixtis Hispanis intra portā refugere cogerentur: ac nisi impeditis atque occupatis valuis, demissa repentè cataracta, densato ordine irrumpentes exclusisset, Hispani proculdubio sine vulnere oppidū cepissent. Ex Viglebanensibus aliqui occisi, plures capti. Periēre & intus aliquot equites Hispani, superne tegulis oppressi: cæteri permutatione facta cū his, qui exclusi fuerāt, in castra redierunt. Erat tū Ticino amni sublicius pons ad Turbicum vicū impositus, munitusque ad capita lunato aggere & ligneis castellis, in quibus binæ vtrunque Mediolanensium & Comensium cohortes ad custodiā excubabant. Decreuerat fortè per eos dies Ticinus, ita vt expediti equites certis vadis haud magno cum periculo tranare posse viderentur. Itaque Othoniani equites fermè omnes, &

B.iii.



in primis Hispani confessores, totidē pedites in equorum clunibus transportantes, in aduersam ripā euaferunt, & vtrunque sub aurorā improuiso aggeres adorti, magno tumultu magnisque clamoribus subire cœperunt. Tanta celeritas Hispanorum fuit, vt in ea parte præsidium penè prius deiicerent, quàm alterum à tota mole pedestris exercitus expugnaretur. Paucis interfectis, omnes Burrus potitus ponte, inuiolatos cōseruauit, & quum liberaliter etiam dimitteret, pro accepto beneficio rogauit, vt iā tandē à Patritio sanguine temperarent, & sacrosanctum Antistitem templo sedēque sua, ac ipsos denique nobiles patria atque penatibus dignos existimare vellent. Ob eam humanitatē Burri nomen Mediolani & Comi clarissimum fuit, & magna quoque pars eius laudis ad Othonem referebatur, vel inuitis & negantibus Turrianis, qui plebis animos his humanioribus officiis, pietatēque hostiū deliniri posse metuebant. Huius Burri monumentum in peristylo ad ædem Eustorgianam nuper vidimus, exelsis literis, & superstante scutata equestri statua cum sceptro Imperatoriisque insignibus ad veram oris effigiem depicta. Cæterum Burrus & Guiliemus diffuso per Laumellinum agrum equitatu, atque inde cum magna agricolarum trepidatione Se-priensem ingressi regionem, ac demum trāsuerfis itineribus Comensem pariter & Ticinensem secantes viam, vicos Mediolano proximos inuasere. Erat ad Caratum oppidum in æstiuis Narbonensium Gallorum equitum ala, ad eam reliquæ Italarum turmæ atque item cohortes, vti cōscriptæ instructæque erant, Mediolano mittebantur. Napus interea, quanto maximo



conatu poterat, suas ac externas copias comparabat, ut iusto coacto exercitu, cum hoste patenti in campo congredieretur. Sed dum à Parmensibus auxilia expectantur, Carrocciumque cum signis militaribus & Valentes Prætoriani instruuntur (sic enim eos spectata virtutis milites vulgò appellabant, qui ad tuenda signa electi erant) Otho fit certior Gallos negligentius, ut in nullo metu, vigilas obire, atque eos noctu opprimi facile posse, si expedita cum parte copiarum, Hispani equites mitterentur. Nec mora, re ad consilium delata, expeditione suscepit Burrus, paucisque horis confecto per noctem itinere, Caratū peruenit. Fortè Gallos Italosque simul ea nocte liberalius epulatos, altior somnus oppresserat, & vigiles rari in statione segnius agebant, quum Caratenses exacerbati hospitem iniuriis, Burro faciliores aditus ostenderunt. Itaque magnis clamoribus occupato oppido, nequicquam tentata defensione, inermes discinctique equites capti, Italicaque turma eandem fortunā tulere. Sed quum victores ingenti potiti præda, captiuis indulgenter & non arcte custoditis, corpora & equos curarent, affuit instructo agmine Napus, Othoque & Guliermus eodem ferè temporis puncto superuenere. Commissa est extra oppidū pugna, Burro atque Othone inopinantibus: fœda utrinque militum concursatione, nam & oppidum Germani equites irruperant, & captiui resumebant arma: foris verò Turriani equites, & Mediolanensis legio, Valentiumque cohortes, Guliermi copias adeò perturbant, ut disiecta in fugam verterentur. Hispani quoque equites, qui satis maturè equos conscendere, atque arma expedire cœperant, angusto

B.iiii.



in loco densata Germanorum ala impetum non tulere, ut magna ex parte inermes, & Maurorum praeliis assueti. Sua tamen agilitate ita profecerunt, ut primis suorum interfectis, celeriter sese explicantes, euaderent. Napus primi successus victoria contentus, suorum agmina in acie continuit, siue quod dolum ab infidiosa gente suspicaretur, siue quod in ea admodum repentina utriusque exercitus perturbatione, quum nihil pro certo explorari posset, liberatis praesertim Gallis, legionem minimè dissoluendam existimaret. Otho, Guliermus & Burrus, cum integro ferme equitatu, & magna parte peditum euadentes, continuatis itineribus, ultra Ticinum se recepere. Ita Napus sua celeritate & opem oppressis suis opportunè attulit, & felici casu de hoste victoriam est consequutus. Huius rei gestae seriem tempusque Corius scriptor confundit, falsoque asserit ea die Theobaldum magni Matthaei patrem fuisse captum. Merula quoque, utpote eam annalium copiam qua nos utimur, minimè nactus, de Hispanis angustissimè perscribit. Ab hac victoria constat Napum odii sui iram violenter exercuisse, in eas praesertim familias, quae ad hostes inclinassent, aut comeatum ex itinere praebuissent: Castellionumque in primis diruisse, quoniam eius oppidi nobiles, quamquam Turrianis affinitate coniuncti, in Othonis partes transierant. Interea Otho ad Clementem, qui Urbano vita functo successerat, proficiscitur: orat ut eius ope in sedem suam patriamque restituatur. Favebant Othoni plerique Cardinales, hortabanturque Pontificem, ut sacrosanctae maiestatis iura, in ipso Principatus initio, fortiter atque magnificè tueretur. Itaque



Clemēs grauib. literis Turrianos adhortatur, vt An-  
rīstitem recipiant: abnuētes sacris interdicit, dirīsque  
execrationibus adiectis, ciuitatem inferorum pœnis  
deuouet. Ita obferatis templis, sacrorum expers popu-  
lus de Turrianis cōqueritur, consternatūque eo pia-  
culi metu, à Napo religionis iure postulat, vt pertina-  
ciā suā finem imponere velit. AEquum enim esse O-  
thonem recipi, postquam vti ciuis spectatā probitatis  
nomine, à summo sacrorum Principe, præsulatu di-  
gnus esset existimatus. In eius ancipitis curā delibera-  
tione aliquandiu fatigatus Napus, vt religione tangi,  
& populi precibus permoueri videretur, legatos Ro-  
mam misit, vt Pontificem magis ac magis auersum ac  
inensum Turriano nomini, explicatis eius contuma-  
ciā rationibus, mitigaret. Sed eos Clemens Christia-  
na seueritate, tanquam pollutos & execrabiles, vrbis  
Romæ ingressu prohibet, præcipitque vt maturè Pon-  
tificii imperii finibus decedant. Legati eo modo vrbe  
exclusi, continuo Neapolim ad Carolum perrexēre, vt  
ab amico rege, atque eo quidem Patrono & assertore  
Pontificiā libertatis, opem implorarent. Carolus re-  
cognita haud multum cunctatus, Turrianorum cau-  
sam suscipit, paucisque inde diebus, Turriani rege de-  
precante, simulque legatos suos Romam mittente,  
recipiuntur in urbem, statimque in Senatum introdu-  
cuntur. Regius primò legatus postulauit pro cōmuni  
iure gentium, vt Turriani, qui supplices ad dicendam  
causam venissent, æquissimis animis audirentur. Eos  
enim esse in fide ac amicitia sui Regis, ad cuius digni-  
tatē maximè pertineret socios tueri, vel ob id præci-



puè quòd semper Cæsaribus Pontificio nomini infestissimis hostes extitissent, Regémque in primis Pontificum iniurias vindicantem sequuti, eius victoriæ participes esse voluissent, & videri quoque procul à benignitate æquitatēque sanctissimi omnium parentis, eos sacerdotiis ac opibus ornare, qui cum nefariis tyrannis consilia atque arma miscuerint, & tum maximè pacis & otii tranquillitatem perturbare cōtenderent: ipsos verò Pontificiæ dignitatis defensores, & ob præstitam fortem fidelēque operam perampla etiam præmia meritos, hostiliter persequi, impositoque ipsorum vrbi Antistite, sæuo ac aeterno hoste, ipsoque duce exulum maximè factioso, exagitādos ac opprimendos præbere. Orantis Galli Turrianus legatus verba excepit, adeoque acerbè in causam Othonis est inuectus, vt quum vehementi & planè rabido ore modestiam omnem exueret, tanti cōfessus obliuisceretur, præsentisque Othonis famam maledictis ac inusitatis criminationibus lacerando, feruore intemperantis linguæ prouectus, magnam partem Senatus sibi ac Turrianis auerteret. Ea omnia Otho Antistes ex aduerso consurgens, moderata quidem, sed planè illustri & generosa oratione confutauit: repetitisque altè contentionū initiis, ostendit Turrianos omnium temporum tyrannos, astu, impietate atque sæuitia superasse: quando Mediolanensium insigni beneficio in urbē asciti, & ex præclaro tuendæ plebis titulo, summis honoribus honestati, ipsum demū vrbis imperium, imperitis hominibus deceptis, vt periuri ingrati que homines arripuissent. De sacerdotii autem ratione, & de calamitate nobilitatis exulantis, deque statu ipso de-



forma tæ vrbis, ita accuratè grauitèrque differuit, vt facto Senatus decreto, Pontifex respóderit se quamprimum Cardinalem legatum in Cifalpinâ Galliam misurum, vt ex eius auctoritate controuersia componeretur. illû enim sua virtute ac industria breui rationem inuenturum, qua Othoni pariter ac Napo certis præscriptis legibus caueretur : atque ita futurum esse vt Othone recepto, & de more diuini iuris dicundi facultate potito, ciuitati sacra redderentur. Nec multo post legatus Othonem reducturus Mediolanum venit : actum subinde est de compositione ex formula Romani Senatus, omniâque pollicente se facturum Napo, & excolente omnibus officiis ac largitionibus legatum, ciuitas expiatur, nec tamen Otho recipitur, magnóque eius incommodo, dum Napus nouas perficiendo negotio difficultates interferit, sensimque inde tempus extrahitur, eluditurque Legatus, Clemētem morbus admodum repentinus oppressit. Nuntiata Pontificis morte, Turrianus vel ob id etiam voti compos est effectus, quòd Patres foeda dissensione in diuersa studia proclinantes, in comitio aliquot menses contenderant. Peroportunè igitur Napus excluso summotoque Othone, ad firmandas imperii vires conuersus, Rodulpho Cæsari legatos & regalia dona in Germaniam misit, obtulitque vltro studium suum atque opes ingredienti Italiam, ad coronam Longobardici regni de more suscipiendam. His pollicitationibus lætatus Cæsar, Napum suo Augustali iure Præsidem, procuratorémque in Insubribus constituit : aliamque Germanorû equitum mirificâ ad eum præsidii causa misit, cui Cassonus Napi filius, iuuenis deco-



re formæ & militari virtute cōspicius præficitur. Interim Othone in omnem occasionem excubāte, Cardinales Theobaldum Vicecomitem Placentinum, indito Gregorii decimi nomine, Pōtificem creant: quū is infimi ordinis sacerdos, sed virtute insignis, nunquam de toga candida cogitasset. Magno quidem Senatorum probro, qui neminē ē corpore suo in ea pertinaci cōtentione, Pontificatu dignum existimassent, nolentibūsq̃ue similes, & casu quodā suffragiis ludentes, probitatem ex alieno humilique ordine quasiuissent. Ad hūc Otho profectus, de reditu in patriam sedemque suam diu agitauit, adhæsitque ei in Galliam contendenti, quum ille & Urbani & Clementis acta se defensurum in ea sacerdotii causa peramplē polliceretur. Sed Napis tanto cum honore apparatusque Pontificem Mediolani suscepit, tantæque liberalitate abeuntem in Galliam est prosequutus, vt Pontifex eius sacerdotii controuersiam nō prius se cogniturum diceret, quā peracto Lugduni Cōcilio, in Italiam reuerteretur, Raimundūque subinde in gratiam Napi fratris, totiusque Turrianæ domus, Aquileiensem Patriarchā crearit. Hic erat episcopus Comensis, multa morū grauitate, sed profunda ambitione & nefaria simulatione insignis: ab eo enim in id scelus tota familia conspirante, summissos percussores ferunt, qui Othonem Placentiæ in aula Pontificis obuersantem, obseruatis vestigiis obtruncarent: sed ille per seruum ex cauponariæ mulieris indicio, insidias subodoratus, noctu iter arripuit, Lugdunūque contendit. Refert Stephanardus Flamma, qui historiam carmine conscripsit, Pontificē ipsū (quod vix credibile est) nefariū



consilii conscium fuisse. Quod fortasse pro falso esset  
omittendum, nisi tum & postea quantum vita super-  
fuit, Othoni animū planē hostilem, & quò lethalius  
noceret, insidiosis honestorum verborum coloribus  
conuelatū ostendisset. Ita bis Othonem à gladiis Tur-  
rianorum fortuna conseruauit: semel in æde Ambro-  
siana, dum Octauiano Cardinali adesset, quæritātibus  
eum Turrianorum satellitibus, vsque ad latrinarum  
recessus: iterum ad Placentiam. Peraçto Lugduni cō-  
cilio, & composita duorū Cæsarum controuersia, de-  
cretoque nouarum copiarum supplemēto, ad instau-  
randum in Asia bellum, Gregorius in Italiam est re-  
uersus, comitante Othone, qui spei optimæ plenus ex  
præclara eius pollicitatione, diu exoptatū æquissimis  
postulatis suis exitum expectabat. Sed Pontifex iam  
planē Turrianæ factionis effectus, Othonem occultè  
oderat tanquam creditorem & aqua poscentem, pa-  
lām tamen multo cum verborum honore, veluti gē-  
tilem beniuolūque suum, vti bene speraret, horta-  
batur. Accurrerāt ad Othonem viri Patritii, magnū-  
que amicorum ac affinium, clientūque numerus in  
dies apud eum augebatur: quo illustri comitatu, Pon-  
tificis aula frequētior ac ornatior reddebatur. nemō-  
que iam exulum erat, qui non planē speraret propen-  
sione studioque Pontificis, Turrianos Archiepiscopū  
esse recepturos. Iam enim Franciscus Septariensis quē  
populus delegerat, vt Turrianorū potentiam autho-  
ritatēque minueret, tædio turbulentæ contētionis,  
sponte se abdicans, ad sacratī otii quietem se contule-  
rat. Cæterū Gregorius ab Alpibus descendens, Otho-  
ni nihil tale expectanti præcipit, vt Bugellæ Vercellē-



sis agri oppido subsisteret, ne eius aduentu ad urbem Mediolanum, ea omnia quæ de compositione pacis exulum prolixè tractata fuerant, noua Turrianorum suspitione aut iracundia turbaretur. Paruit Otho extrema compulsus necessitate, in occulto gemens & sæpe suspirans, nec tamen animum despondens. Paucis inde diebus Pontifex, ipso Patriarcha Raimundo ornatissimè lautissimèque excipiente, Mediolanum ingreditur. Festa fronde atque aulæis conuestitæ erant regiones. Napus & Franciscus qui honoris causa ab equis desilierant, astantes freno Pontificis equum deducebant. Umbella serica denis hastis à Turriana iuuentute præferebatur. Quibus obsequiis, aliisque muneribus Pontifex haud dubiè traductus in partes, & ab Othone diductus, ita demum Mediolano excessit, ut cum multa præfatione inanum verborum, æquissimam sibi videri Othonis causam dictitaret: sed eius controuersia iudicium in aliud tempus esse differendum: quòd nequaquàm è Republica Christiana fore videretur, si Turrianarum rerum statum, reducto potenti æmulo perturbaret: quando ii potentia virtutèque animi, magnis regibus æquarentur, queis fœdere & amicitia essent coniuncti: colerentque singulari officio ac pierate Pontificiæ maiestatis nomen, idque armis impigrè defenderet aduersus Gibellinos, quorum inter principes Otho præcipuus esse censeretur. Res enim tum in Italia aduentu Caroli Regis eò deductæ erant, detestabili populorum omnium insania, ut cunctæ ciuitates diris factionibus laborarent. Guelphi à Pontificibus stabant, quorum defensores erant Galli. Germanis verò Cæsaribus alteri studebant, qui Gibel-



lini vocabantur. Hi magna ex parte nobiliores familias ad se pertraxerāt. Populares verò familiae & plebs ipsa nouique homines Romanorum Pontificum iura tuebantur. Patritii siquidem superiorum Caesarum militiae adscripti, post emerita stipendia, clari potentisque euaserant, quū Imperatorum benignitate, praediis, oppidis, portoriis, aquarumque iuribus donarentur, speciosisque nominibus acceptis, Aurati equites, Valuasores, Capitanei, & Comites appellarentur. His uti Caesarū beneficiariis, mos erat pro insigni Romanam aquilam gestare, ingredienti Italiam nouo Caesarari adesse, praestare operam militarem, nouosque honores perpetuis officiis promereri. Ita honestati priuilegiis, & exempti ab communi foro iuris dicundi, inferiores populi classes, plebemque ipsam seruilem in modū despectui atque ludibrio habere, & saepe si iussa tardè facerent, contumeliis atque verberibus multare consueuerant: & quo nihil acerbius videbatur, vigebat iniqua lex, haud dubiè ad iniuriam populi promulgata: qua lege si quis è plebe à Patritio esset interfectus, paucis assibus ea capitis poena solueretur. Huius legis iniquitas aliquandiu tolerata, ad extremū plebis animos adeò vehemēter extimulauit, ut vi atque armis eam rescinderet, & nobiles Ducibus Turrianis prosequeretur. Nihil hercle medium & aequabile plebs volebat, quum arma teneret, & vindicandas superiorum temporū iniurias arbitraretur: frustra etiam Patritiis priorem licentiā suam moderantibus. Ea enim impotēter dominari, quā ex aequo iniurias propulsare malebat. Ea cōtentio Turrianos, uti suprà docuimus, in ciuitate Praetores & Principes, ac demum



recrudescente intestino malo, belli duces & dominos fecit. Tantæque demum fuit imperitæ plebis infania, vt odio Nobilitatis, quam vrbe pepulerat causa recuperandæ libertatis, nouæ demum & præduræ quidem seruitutis iugū æquo animo perferret, quum iam Turriani sublata publici consilii potestate, cuncta pacis & belli munia ad arbitriū reuocassent. Propterea vt Imperii opes validius confirmarent, in partes Caroli Regis & Pontificum opportunè concesserant, mutuifque foederibus initis, in eam curā iugiter euigilabant, vt Germani Cæsares Italiæ finibus arcerentur, Gibelinos vbique perderent, infirmarentque eorum vires, qui à Cæsaribus opem implorare viderentur. Per hūc modum Romæ, Neapoli, Florentiæ atque Mediolani exacta proscriptaque Nobilitas errabat, consilii inops, perculsa metu, attrita opibus. Ex aduerso autem Pontificii imperii maiestas, percolente tuentēq; Carolo, ac adiuuantibus Turrianis, viribus autoritatēque florebat. Sed necesse erat sacrosanctos principes, qui vti omnium parentes Christiana professione ad componendā pacem medii æquissimiq; arbitri esse deberent, factiones sequi: & quod propè impium videri poterat, sese Guelpharum partium principes profiteri. His de causis Gregorius, vt temporibus seruiret, præsentique otio consuleret, Othonis & totius Nobilitatis obliuiscendum existimauit. Verūm ad inanē iustitiæ speciem postulauit, vt Archiepiscopatus iura, atque item oppidorum & agrorum redditus, ad exilii solatium Othoni redderentur. Vix credibile videri poterat, Othonē qui eximia Urbani liberalitate creatus Præsul, singularique demum Clementis studio in repetenda dignitatis



gnitatis sede, vsus fuisset, ab eo demum qui & gentilis esset, & amicissimus putaretur, deserui & eludi penitus, hostiliterque traduci. Sed in Othone ea vis constantiæ virilis, exactæque prudentiæ confederat, asperimarum rerum vsu, & prouectæ iam ætatis cursu confirmata, vt tum maximè sperare inciperet, quum cæteri exules animum despondere videretur. In summa enim egregiæ educationis parte reponebat, non frangi animo in aduersis, putare fortunam viuida virtute inferiorem, eamque contemnere vti penitus instabilem: atque ideo quum auersa tam diu esset, non multo post in complexum commutata libidine rediturâ. In eo animi habitu quum aliquandiu ad Bugellam substitisset, intentusque in omnes rerum nouarum motus, aliquam efferendi sese & renouandi belli occasionem circumspectaret, Gregorius Aretii decessisse nuntiatur. Nec mora ad eam famam Patritia gens vndique ex infelicitate belli dissipata, ad Othonem coit: in comune consultitur: & quum duce militari atque opulento, qui afflictas res atque humi prostratas erigeret, maximè opus esset, Gothofredus Languscus deligitur. Hic erat natalium atque opum claritate apud Ticinenses facile princeps, gloriæ atque imperii avidus, & quo maximè placebat, Turriano nomini apprimè infensus. Nemo enim Cisalpina Gallia non suspectabat Napi opes, vti in immensum adauctas, coniunctasque Apulo Regi & Romano item Pontifici, quodque finitimos terrere poterat, noui etiam Cæsaris amicitia atque præsidio confirmatas. Bergomum enim, Cremam, Comum, Laudemque Pompeiam Turriani certo iure in potestate redegerant: interque Ticinum & Abduam

C. i.



ac in propinqua Rheticis Alpibus Volturena valle, expugnatis & excisis Nobilium arcibus, cuncta subegerant. Itaque Languscus amplissimis Patritiorum pollicitationibus oneratus (eum enim Mediolani Praetorem cum militari imperio, optimisque stipendiis designabant) & suo fatali iudicio inductus, se partium ducem futurum profitetur: euocat undique veteranos, & à Laumellino agro loricatas cohortes, sagittariosque item ex Liguria mercede conducit: ante omnia equitatus studet, ut Germanorum turmis resistat. Paucis diebus in eo apparatu consumptis, & sublatis signis ad Verbanum lacum proficiscitur. Nullum fuit in ea praefectura oppidum, quod non statim aperiret portas. Erat enim in eo tractu Vicecomitum familia admodum potens & illustris, & iam erat cunctis inuisa Turrianorum acerbitas, qui superiore bello praeda & caede aduersariorum non contenti, etiam in ipsa tecta & segetes igne sauerant. Itaque Arona & Angleria statim recipiuntur: Otho ipse cum valida manu in Sepriensem regionem irrumpit. Ea intercincta Ticino atque Olona amnibus, ad Verbanum usque vicis ac oppidis florens extenditur: ab oppidoque Seprio nomen ducit. Hoc Othoniani facile expugnant, & eo capto late undique excursiones fiunt, magnusque timor finitimis pagis incutitur. Tum vero Napolis à foederatis sociisque ciuitatibus auxilia parare: equos militares mutuo acceptos & à domestico stabulo, fidis & fortibus amicis distribuere: urbanam legionem ad Carroccii tutelam ea seueritate describere, ut octo Tribus (tot enim erant urbis portae) suffragio suo totidem quos maxime putaret acres & impigros fin-



gularū cohortium Tribunos pronuntiarent, Tribuni eligerent Cēturiones: hi verò eos qui pari delectu Decurias sacramēto rogatas, multa imposita ad vexillū vocarent. His celeriter administratis, Cassonū filium cū Germanorū turmis præmittit, qui effuso & vagāti hosti protinus occurrat: ac cōfestim vrbe cū Carrocio paludatus egreditur, cura scilicet vrbānarum rerū Francisco fratri demandata. Is diligenter vrbē nouo præsidio muniuit: suspectos relegauit: dubiis obsides imperauit: circumscripsit etiam metu & pœna nonnullos qui spiritu, gratia, opibūsq; valebant. Interim Napus cum graui peditum agmine Angleriā ire pergens, quartis castris ad Guasseram amnem peruenit. Labitur is ex proximis vallibus in Verbanum, saxoso passim impeditoque alueo, & quū imbris intumescit, minimè vadabili. Iam Gothofredus cognito hostium aduētū, in aduersa ripa aciem direxerat, prouectusque equo vt cuncta oculis perlustraret, ineundi prælii occasionem expectabat, eo animo vt hostes vadum petris atque virgultis impeditum ingredientiē adoriretur. Non dubitauit Cassonus, qui tribus fermè stadiis subsequenter cum pedestribus copiis patrem anteibat, Germanos per se pugnandi auidos cohortari atque incitare, vt contra hostes confertis turmis prouolarent. Erat in prima fronte præmio excitus à Cassono Antius Laufer Germanorum dux, armis cristisque conspicuus: hūc insolenter traiecto alueo ante alios pugnācientem, Lāguscus ipse pari alacritate concitato equo inuasit, hastāq; transfixit. Quo strato Lāguscāni clamore sublato victoriā ingeminant, tumultuariōque procursu in Germanos deferuntur. Fit

C. ii.



acre certamen in vado, quanquam tum humili admodum profluente. Balistarii Ligures in densatos hostes sagittas excutiunt, equites peditésque miscentur. Erat iam de Germanis magna ex parte vulneratis parta victoria, quū Languscus terrefacto equo in tenacē alvei voraginem abreptus, ab hostibus capitur, nec mora Germani cōmutata fortuna conglobantur. Languscanis amisso duce animus cōcidit. Appropinquat Napus, totaque mole copiarū impressionē facit. Fundūtur Othoniani viribus atque animis impares: insequitur fugientes recēs equitatus: magna cades editur. Nobiliū ala Theobaldo Vicecomite acriter depugnāte, aliquādiu resistit, & dum se in æquiorē locum subducere properat, circumuēta à Cassono ceditur. In ea receptus iniquitate Theobaldus ipse, & cū eo viginti duo Patritii capiuntur. Ferunt Napū filii virtute latantē, præ gaudio lachrymas tenere nequiuisse: quando ea victoria vnius horæ momēto parta, magno timori summisq; periculis & præduris laboribus finē attulisset. Franciscus Turrianus qui Mediolani ipso plebis Tribunatu superbus, & populi & libertatis defensor appellari volebat, quum rei feliciter gestæ nuntiū accepisset, essetq; rogatus sententiā de captiuis, crudelissimē rescripsit, asserens cuncta simul Hydræ capita ense recidēda, ne renata rursus venenum effundāt. Contra Cassonus generoso cōsilio in victoria, nobili virtute parta, clementiæ laudem quarens, ne suppliciū de Patritiis iure belli captis fumeretur, obnixè deprecari. Sed Napus iam pridem ex Emberræ fauitia extra aciē patritio sanguine cruētatus, laudata sed elusa filii lenitate, in duriorē partem inclinā-



uit, depofcentibus præfertim Germanis truci cum fremitu, vt in vindictam interfecti eorum ducis, Gothofredus necaretur. Nec multo poſt Napus vt lege capitali ageretur, dira voce pronuntiauit: atque ita ad Galaratum oppidum duo & viginti inſignes Patriitii, & ante alios Lāguſcus Dux ipſe & Theobaldus nefariorum hominū more, ſecuri percutiūtur: & quod inuidiam adauxit, ceruicibus tantorum Procerum ad plauſtri temonem ludibrio quodā appoſitis, atque ibi repetito ſæpe ictu ſæuiſſimè detruncatis. Erat Theobaldus Andreoccio Othonis fratrem genitus, ſua virtute & ſpecie corporis, ſed multo magis felici prole clariffimus. Reliquit enim Matthæū filium, qui poſtea ob virtutem Magni cognomen adeptus, imperium ab Othone acceptum cum admirabili laude poſteris propagauit. Id execrabile facinus non lege militari, ſed immani patratum rabie, nobiliſſimos quosque & inter primos Languſchæ familiæ Proceres, aduerſus Turrianos vehementiſſimè concitauit: adeo vt non toto planè exacto triennii ſpatio, parem omnino clade Turrianis funeſta admodum illata calamitate rependerint. Otho mœſtus, vti domeſtico publicoque ictus vulnere, è Seprio in Vercellèſem refugit agrum, diu immeritam Theobaldi necem lachrymis proſequutus. Toto autem tempore nunquam animo ſeſe demittēs, ſed hilari vultu acceptæ cladis mœrorem ſemper occultans, graui oratione Patriitiis oſtēdebat deos immortales nefario Turrianorum ſcelere permotos, occaſionem renouandi felicitérque cōficiendi belli procul dubio præbituros. Nec multi mēſes effluxere, quum ad excitandos animos initiū præ-

C.iii.



buit populus Comensis, acerbitate Prætoris ad arma concitatus. Is erat Accursius Cutica, vir ingenio rapaci, factioso, & quod à liberis hominibus ferri nō poterat, agresti quadā ferocia superbo. Eum sibi in Prætura suffecerat Napus, idque facile impetrarat pro amicissimo homine, & Patritiis maximè infenso: in hoc etiā Comenses pari obsequio remuneratus, quū pariter Corradinum Lauizarium Vitanarum partiū principem, Mediolanensi Prætura eodem tēpore perornasset. In hunc auarè ac insolenter ius dicentem, quum fortè iuueni è Ruscona fāmilia ad tribunal liberius loquuto, manus iniiceret, populus impetum fecit, fugatūque & in prætorio obsessum cepit. Post id factum Decuriones ad Napum scripsere, vt si Accursium incolumē & dimissum vellet, ipsis honesta permutatione Simon Locarnas remitteretur. Hunc ciuili bello captum, Turriani ad ignominia & cruciatū, clathrata in cauea, feræ bestię more concluderāt, septimūque iam annum tetro squalore & fœda illuie deformem ac miserum adseruabant. Erat Simō è Muralta fāmilia Comi admodum nobili, quæ originem à Locarno Verbani lacus oppido deducebat: ob id à Corio Merulāq; scriptoribus Locarnas appellatus: vir ingentis profectō animi, & proceri robustique corporis, ac alterutra fortuna sua clarus, sed iniuriæ vindicta maximè illustris. Visitur hodie lapideū eius sepulchrum superstante equestri imagine, ad vestibulū Abundianæ Basilicæ. Porro Napus amicissimi hominis periculo permotus, Simonē cauea eduxit, vti cōtracto morbo, non multo post aliqua vitæ aur aeris intemperie moriturū: improbante plurimū Frā



cisco, & prædicante Simonem suo astu viam aliquãdo reperturum, qua diuturni carceris contumeliam vlcisceretur. Caterum ea conditione Simon est eductus, vt solenni sacramento iuraret nunquam se aduersus Turrianos arma laturũ. Sed eius iurisiurandi fidem, vti summa expressam necessitate, non multis inde diebus penitus elusit: & quũ inhumani cruciatus memoriam animo minimẽ deponendam existimaret, grauibz apud veteres amicos habitis cõsiliis, ad Othonem est profectus. Eius viri aduentu erexit sese in nouam spem Otho, coiuerẽque subinde Patriat̃e gẽtis reliquĩ: nam hominem per se diuitiis & clientelis validũ, efferatõq; animo studii sui vires omnes ad oppugnandos Turrianos effudentẽ, magna exulũ multitudo sequebatur. Apparebat enim Comẽses Simone aũthore in Patriitorum partes esse transituros, quando iam à Turrianis singulari eius beneficio rebellassent. Dum arma, equi, militesque parãtur apud Vercellas, Otho per speculatores didicit, castrum Sepprium, de quo toties pugnatum fuerat, exiguo præsidio & nulla propẽ cura custodiri. Nam toties deuictis profligatisque hostibus, Turriani vti in nullo metu, alendi præsidarii militis sumptum, & custodes ipsi excubiarum diligentiam facilẽ remiserant. Itaque maturandum ratus Otho, Ticinum traicit, delatusque intempesta nocte ad portas, & oppidum & arcem cepit. Paucis inde diebus aucto exercitu, totam eam regionem peruagatus, finitimis Mediolano vicis, singularem, vti ex improviso hoste, trepidationem intulit. Ad eius rei gestã nuntium Napus cum sua veterẽ urbana legione, Cassionõque filio & Germanorum

C.iiii.



alis vrbe egreditur: ceteras auxiliares copias subsequi iubet. Is dolore simul atque ira angebatur, quod hostes toties superati cassique, adeo insolenter sese efferrent, nec superioris cladis exemplo extrema supplicia formidarent: sed in Othonem toto animo erat intentus, quem si aliquo aduersæ pugnae casu Fortuna defereret, eo semel oppresso, Patritios facile debellari delerique posse iudicabat. Appropinquante Napo, summa & ea quidem opportuna belli ratione, Othoniani ad signa reuertuntur: iuxta oppidum Seprium castra muniunt: murum oppidi atque item arcem præsidio firmant, eo consilio, ut freti Sepriensium com meatu, & tuti vallo, præferocis hostis impetum frustrentur. Quum aliquot diebus minutis præliis lacessendo, leuem armaturam exercuissent, Napis è proximis castris ad oppugnandam arcem scalas & machinas protulit, instructaque legione, & equitatu in præsidiis collocato, moenibus successit, ratus se potiturum arce: aut si Otho ferendæ opis causa, castris egrederetur, a quo in loco iusta acie certaturum. Quum aliquot horis vtrinque acerrime certatum esset ad murum, cominutisque scalis & multis vulneribus acceptis, Turriani decidentium lapidum tignorūque pondera vix sustinerent, visa est Othoni occasio rei bene gerendæ: communicatoque consilio, cunctisque approbantibus, oppido & castris in hostes erupit tanto impetu, ut pulsus & perturbatis primis, tota Mediolanensium legio in fugam verteretur: eaque vis repetini timoris apud fessos sauciosque, & de arcis expugnatione desperantes fuit, ut neque Napis, neque Cassonius conturbato à fugientibus equitatu, opem fuis & per-



territis afferre potuerint. In ea fuga Otho clementia nomen quærens, orabat suos ut à sanguine civium temperarent. Sed haud facile continere frænareque eorum ferociam poterat, qui amicos propinquosque suos crudeliter extra aciem interfectos, vlcisci properabant. conseruauit tamen multos. Nam nisi maturius receptui cecinisset, quum nox instaret, usque ad castra fœdæ fugæ & trepidationis plena, iratorum Patritiorum gladii cum magna hostium cæde peruenissent. Agnouere Mediolanenses lenitatem Antistitis sui. Sed Napus eius fugæ ignominiam animo minimè ferens, ubi perterritos confirmauit, cohortare Cassono ut amissum decus celeritate atque audacia sarciretur, præcepit præfectis ut corpora atque animos ad pugnam pararent: statuisse enim intra paucas horas hostem inopinantem, & ab recenti rerum successu incautum adoriri. Ita ea nocte insomnis Napus in albescente caelo ad hostes contendit, tanta celeritate, ut Othoniani vix arma induere, equosque frænare potuerint. Dimicatum est aliquandiu ad vallum, irrumpente vndique hoste, & repugnantibus satis constanter, qui pro custodia castrorum in armis excubabant. Sed reliquas cohortes agrè sustinentes, nec satis conglobatas, ex transuerso Germani densatis cuneis facile perruerunt. Quo conspecto reliquus peditatus, atque item equites effusi castris & ex oppido, protinus in fugam se coniecerunt. Ita prope sine vulnere perrupta & direpta castra: plurimi capti: cæsi pauci, adeo eius fugæ fœdo euentu, ut non facile appareret, quibusnam Fortuna humanis coeptis illudens, in spatio septem horarum, plus dedecoris, aut militaris laudis attulisset. Otho premente



vndique hoste inter tela volantia periculo elapsus, cū magna parte equitatus ex fuga Comum peruenit. Eū Comenses neque intra urbem recipere, neque vt diu in suburbanis ædificiis subsisteret, pati voluerunt, ne Turrianus victor, à quo iam planè defecerant, admotō exercitu per causam persequendi hostis, ipsorum agros euastaret. Præbuere tamen benignè & largiter comeatum, atque item sarcinaria iumenta, & peritos itinerum duces. Quorum fideli opera vsus Otho, ad septimū lapidē Luragum castellū primò petiit, atque inde profectus superato Lugani lacu, ad Zornigium subalpinum pagum contendit. In eo loco admodum tuto & syluestri aliquot dierum quiete recreatus, ad amicos literas dedit, vt de sua salute receptūque certiores redderentur. Sed nō multo post inopia & egestate compulsus, deflexit ad Canobium, insigne & opulentum in ripa Verbani oppidum. Ibi Otho admirabili facundia sua opportunè vsus, oppidanos claudētes primò portas, & mox bidui tantū moram fesso agmini concedentes, adeo appositè feliciterque permulsi, vt representata hostium suorum crudelitate, in amicitiam fœdusque pertraxerit. Nec multo post coiungere rursus Patritii exules fermè omnes. Nam vbi fama perlarū est Othonem benignè amicèque receptum Canobii constitisse, quisque vel inermis vel seminudus ex fuga & ab hostium castris, ad eum contendebat: nam Turriani captiuos, contenti spoliis, statim dimiserāt, ne qui felicitate in parāda victoria præstitissent, humanitate vinci viderentur. Affuit & Simon Locarnas inusitato tramitum flexu ex fuga seruatus: agitatūque subinde est de renouando bello,



& maiore quidē spe, maioreque apparatu: adeo vt vix credibile videatur Othonem tantos gessisse spiritus, neque vnquam tot aduersis casibus succubuisse, quando iam quinquies bello victus, tot propinquis & cliētibz sœuitia hostium amissis, summâque pecuniâ & rerū omnium inopia circumuentus, neque ipse conquiesceret, neque hostes otio frui diūque victoriis latari pateretur. Erat enim iam planē sexaginta quinque natus annos, sed viridi admodū viuacique senecta, ac aduersus omnem alboris & æstus contumeliā indomita. Sed fatale ei erat fortunā vel improbē semper cœptis illudētem, patientia & magnitudine animi superare, exercereque semper perrenni vigilia sese his cogitationibus atque consiliis, quibus dignitatem & patriam recuperare, & posteris cum insigni gloria latē imperiū parare posse videretur. Inuenio apud ineptum sed non iniucundum versibus rerum scriptorē, ab iis familiis quæ in Apennini atque Alpium tractu nobilitate diuitiisque florebant, Othonem à temperantia altitudinēque ingenii & pietate maximē venerabilem, benignē ac liberaliter fuisse adiutum. Fuēre inter cæteros Solarii, Rotarii, Malaspinæ, Scarampi & Valpergæ, qui in apparatus belli, equos, arma, tela, quadrigas, commeatum omnis generis, vestē & denique pecuniam contulerunt. Apud generosas enim gentes quodā misericordiæ genere, animos vehementer permouebat ea fortunæ iniquitas, qua tot Patritii diu extorres peracerbēque proscripti, ad luctuosam egestatem peruenerant: quando iam nihil eis vsquequaque afflictis, præter spem æruginosâque arma supererat. Nec defuēre voluntarii milites ab



Haſta colonia, Taurino, Eporedia, Auguſta prætoria, Vercellis atque Nouaria. Guliermus quoque Montiferrati regulus in ſocietatem certo fœdere eſt accitus: quo duce ſuperioribus annis Hiſpanorum aduentu Othonem & Burrum cū Turrianis infelicitè dimicaſſe demonſtratum eſt. Subegerat hic in Montiferrati regione complura oppida, & demū Albam & Aquas Statiellas ac Alexandriam, poſtremoque Derthonam imperio ſuo adiecerat. Potens æquè & impiger habebatur, bella ex bellis libenter ſerebat, vt is qui apud eum erat exercitus, ex reliquiis Hiſpanorū (eorū enim aliquot in Italia remanſerant) & ex fortiffimo quoque conſectus, perpetuis ſtipendiis aleretur. Comparatis autem copiis, terminatiſque cōſiliis ſtatuerè, vt Simon Locarnas naualibus præſſet copiis: Guliermus cum terreſtri exercitū ad Verbanum progrediretur. Exornarat claſſem validam Simō, totāque oram ad Othonis ſtudia cōuerterat. Stabat à Turrianis Angleria: ad eam Otho & Simon deuehuntur: oppidani refugiēte in arcem præſidio, ſe dedunt. Arx vti ex ruinis temerè & negligenter reſecta, quā machinas non perferret, certa pactione recipitur. Tū verò ad Aronā naualibus terreſtribusque ſimul admotis copiis, bellum tranſfertur. Arona & Angleria interiacente Verbano ab ea parte qua Ticinus effunditur, Seſtanæ atque Abydenæ arcium in Hellespon- to ſimilitudinem reddūt. Sed Arona ſicuti nobilitate inferior, ita opportunitate loci, ſitusque munitione celebrior exiſtimatur. In ea oppugnanda quū aliquot dies contriuiſſet Guliermus, agēdis maioribus baliftis, quibus teſta introrſus lapidum cumulis pro-



rueret, & è classe Otho & Locarnas ædificatis more  
maritimarum triemiũ in summitate mali, amplio-  
ribus caueis, atque inde scorpionum ingentium ve-  
rutis, muri pinnas defensoribus nudarent: præsidii mi-  
lites & periculo suo, & oppidanorũ lachrymis permo-  
ti, ea conditione deditionem fecerunt, vt nisi triduo  
opẽ ferret Turrianus, ipsi arcem atque oppidum re-  
linquerent. Vixdum confectæ erant deditionis tabu-  
læ, obsidesque recepti, quum Cassonus Ticino supera-  
to, quadrato peditum agmine & præmissis Germanis  
aduẽtare nũtiatur. Tum verò impigrè aciem instruit  
Guliermus, è classe promptissimi propugnatores ter-  
restribus copiis se coniungunt, editiorem occupant  
locum, frontemque maximè veterano ac armato mi-  
lite firman. Sed Cassonus coniectura iudicans validi-  
ores cohortes, equitumque turmas in fronte fuisse cõ-  
stitutas, ex duabus Germanorum alis, alteram in dex-  
tra coniunctam legioni consistere iubet, in qua Mu-  
fca eius frater, & Andreas ac Hereccus patruels cura-  
bant: alteram obliquo flexu in latus & terga hostium  
ipse duxit. hæc in lixas ignobilesque manipulos inue-  
cta, magnum tumultũ in tergo excitauit, adeò vt Ger-  
mani cadendo sternẽdoq; obuios, in interiora castro-  
rum penetrarint, coactũque sit. Guliermus nondum  
contracta in fronte pugna, equitatum suum conuer-  
tere, opponerẽque Germanis, qui fœda strage cuncta  
compleuerant. Sed dum Germanorum audacia repri-  
mitur, præliũque atrox in medio miscetur, tota a-  
cies respectare, ac mox nutantibus vexillis circum-  
gere sese trepidanter cœpit. Nõ defuit occasione Cas-  
sonus, statimque iussit vt altera ala relicta legione in



frontē procurreret. ea vis irrumpentiū fuit, vt priusquam Turriani pedites appropinquarent, Guliermus ancipiti acie circumuentus funderetur, atque vniuersi terga darent. Ex fugientibus complures classis appulsa litori peropportunē excepit, minorēque ob id eade Turrianus victoria est potitus, quod pedestres copiæ tardius appropinquantes, in vacua castra impetū fecerāt. Prædam autem, quæ non erat exigua, nobilitauit Guliermi tentorium Maurisiaco opere acupictum, cum instrumento militari admodū luculento, quo olim à socero Hispaniæ Rege donatus fuerat. At Guliermus perumpens cum equitatu Ticinum iter intendit. Otho & Simon diuersis itineribus cum reliquiis profligati exercitus, hic Comum, ille Nouariā se receperunt. Rebellarant (vt diximus) à Turrianis Comenses, capto Accursio Cutica Prætor, Simonēque recepto, neque tamē ad Patritios defecerant: medios enim se gerere, & neutris studere malebāt, quàm Turrianos iam planē victores, grauioribus iniuriis ac offensionibus aduersum se concitare. & magnopere Turrianis fauebat Vitana factio, quæ iam pridem Philippo opem ferente, Rusconam armis deuictam, principatu deiecerat. Vbi autem Simon aduenit, cōcionari passim cœpit, Othonem & Patritios primoribus ciuium enixē commendādo, vt indignē pulsos domo, proscriptosque, & crudelissimē à plebeis hominibus diuexatos. Quem (inquit) exitum consiliis nostris expectamus, postquam defecimus: nisi vt insolentissimo tyranno seruiamus, & ab his trucidemur, qui maioribus nostris patria expulsis, tecta huius vrbis & moenia in cineres redegerūt. Concordia nūc maximē



opus est, Ciues, vt libertatē cum dignitate tueamur. Otho supplex & Patritia gens orant, vt nostra ope in patriam reducantur: ad id vires abundē supersunt, vt omnia maturē atque feliciter confici posse speremus, dum Turrianus debellatum esse putat, & victoria sua, solutus metu, superbē lätatur. Erat Simon vehemēti eloquentia, & ea quidem authoritate ac opibus æquali, ipseque carceris calamitate clarior euaserat, cuius indignitas & cruciatus multorū animos ita permouerant, vt Turriani non mediocri inuidia deflagrarent. Eo modo Comenses tumultuario studio, & subita quadam acclamatione pro Othone Patritiisque decernūt. Sed ne statim per Decuriones decretū scriberetur, ambo vr̄bis Consules vehementer obstitere, Henricus scilicet Aduocatus, & Gaspar Ficanus Vitanae princeps factionis. His sese opposuit Ioannes vr̄bis episcopus, qui Othonem studiosē admodum colebat, Patritiorūque exulum causam insigni pietate ardoreque suscipiendam arbitrabatur. Ita tumultu exorto, diuisus in duas factiones populus, arma corripuit: mediāque in vr̄be atrociter est dimicatum. Luterius Rusca & Simon aduersarios ē foro cum multis vulneribus, in Prætorianas ædes compulerunt: cōtinuatōque certamine, Prætorio atque vr̄be, captis Cōsulibus, eiecerunt. Nec multo post constituta ad arbitrium Republica, & excisis Vitanorum turribus, Otho ē Nouaria publicis literis est euocatus. Is primus dies Othoni ē tantis calamitatibus feliciter illuxit. Nā inde postea (vti authores scribunt) Fortuna Turrianis nusquam arridens, eos ē tanto fastigio continenter visa est detraxisse. Exceptus est Otho à Ioanne



Comensi episcopo, singulari cum honore, priuatâque eius pecunia ad exornandas copias est adiutus. Cæterum Lucærius & Simon conquiritis vndique equitibus, atque item sagittariis & scutatis cohortibus è Verbano & Lario, Luganóque & Bilitona, armata etiam in primis Comensium iuuentute, iustum propè exercitum coegere. Interea Otho exulésque Patritii ad se Comum acciuerunt Ricardum Languscum Laumelli comitem, virum bello acerrimum, & in Turrianos ex Gothofredi fratris nece vehementer cõcitatum. Adduxerat is veteranam cataphractorum alam ex his qui sub fratre meruerant, statimque ei omnium copiarum imperium magno assensu delatû est. His comparatis, Otho concionatus ad Comenses, gratias cunctis eorû ordinibus humaniter egit, quòd liberali & peregregia voluntate defendèdas ipsius iniurias opportunè suscepissent, militaremque operam promptissimis animis præstarent aduersus Turrianos impios execrabilesque homines, ac ob id toties à summis Pontificibus inferorum poenis & cruciatibus deuotos: cuius studii immortalisque beneficii memoriã nunquam esset obliuione deleturus. Ioannes vrbis episcopus ad hæc totius populi nomine respondit, ea mète Comenses eius optimæ causæ studio adductos, sumpsisse arma; vt proficiscentem ad patriam sacramque sedem suam eductis vexillis sequeretur, fierentque eius victoriæ socii atque participes, quã dii iustitiæ defensores, ultoresque nefariæ tyrânidis, aduersus impios & periniquos homines pollicerentur. proinde lætissimo animo in hostes contenderet. Ipsos enim, si bellum extraheretur, societatis inita fidem  
ac amici-



ac amicitiam constantissimè seruatu-  
ros. Nec multo post Otho profectus, ad Liciniforum posuit castra.  
Ea vrbs quondam insignis & nota Ptolemæi tempo-  
ribus, in minores abiit pagos, dilapso, vti videre est,  
Eupyli piscoso lacu, in cuius ripa peramœnæ fertili-  
tatis Licinii forum adiacebat. Eius regionis tractum,  
corrupto vocabulo Incinii Plebem vocant, asserunt-  
que nonnulli ex vehementi terræmotu Eupylū, vti  
cæco hiatu terræ haustum subsedisse, profundioribus-  
que inæqualis aluei locis, reliquisse exiguos quin-  
que lacus, è quibus Lamber amnis emittitur. Eius re-  
gionis incolæ Othonianos lætis animis receperunt.  
At Napus, vbi nuntiatum est Othonem à Comensi-  
bus receptum, vehementique Simonis & Rufconor-  
um studio adiutum, instaurare bellum, dixisse fertur  
ad cōuiuas superbo sæuoque ore, quum è mensa dis-  
cederet, Paruo, vt arbitror, labore nostro, magnum  
certè negotium agasombus nostris afferemus: sunt e-  
nim nobis horum manibus, & exules & ipsi rebelles  
infidique Comenses latronum more laqueis punien-  
di. Atque ita properantius atque turbidius quàm so-  
leret, veluti rapiente fato, in hostem porta Iouia co-  
pias eduxit. Pridie enim Cassonum fatali errore præ-  
miserat cū Germanis equitibus, qui Canturiū quin-  
to ab vrbe Como lapide opportunum oppidum præ-  
occuparet, ne eo ad excursions faciendas hostis po-  
tiretur, & inde ipse proximos Comensium agros eua-  
staret. Posuere vitiferis in collibus urbem Caturiges,  
antiquissimi populi, authore Strabone: sed ea demū  
mutante cuncta æuo cōsenescens, in oppidum abiit.  
Turrianorum hic erat ordo: Præcedebat Pontius  
D.i.



Amatus Prætor cum legione urbana & mercenariis equitibus . Ipse Napus relicto ad urbis custodiã Ol-drado Tangentio, insequeris anni Prætoris designato, propinquos omnes amicosq; & familiares citato & disiuncto agmine secũ trahebat. Eodem die quo Calfonus Canturium est profectus, Othoniani ad Caracã nobilem olim urbem supra Lambrum deflexere . Ea Ptolemæo nota, hodie defectis vltimis literis , antiquũ nomen retinet. Quum ibi de inferendo bello à ducibus in consilio sententiæ dicerentur, è Decimo vico sacerdos quidã pernici equa deuectus, ad Otho-nem peruenit. Erat enim Decimi præclarũ Othonis nomen: nam ab adolescentia sacris initiatus, summũ in eo pago sacerdotium à Pontifice impetrarat. Vnde postea & in æde maxima Mediolani, & in diui Ambrosii templo canonicas dignitates fuerat consequutus. Is sacerdos singulari vsus officio, Othoni nuntiavit Mediolanensium copias cum Prætoris, ipsosque Turrianos principes sub occasum solis Decimũ peruenisse : cuncta ibi militari strepitu compleri, & tumultuosius ac acerbius quàm pro sociorum consuetudine, milites tecta, cubilia, stabula, pulsatis hospitibus eiectisque iumentis, occupare, nec adesse Germanos qui pridie ad Canturium præcessissent: putare se Turrianos ea nocte posse deleri, si improuisus confecto per noctem itinere, dispersos somnòque sopitos adoriretur . Hoc nuntio maximè lætatus Otho, Dii (inquit) qui à Decimo dignitatis initia præbuerunt, nõ inani procul dubio loci omine, promissam nobis de hostibus victoriam dabunt. Atque ita tota re ad consilium delata, singulari omnium alacritate decer-



nitur, nō prātermittēdā rei bene gerēdæ occasionē,  
& eo quidē ardentius & audētius, quōd dudū per ex-  
ploratores de Cassoni consilio ac itinere certius co-  
gnouerant. Nihil enim æquē metuebāt, quā ap-  
erto in campo manus conferere cum Germanis equi-  
tibus, quorum vim atque impetum, duce prāsertim  
Cassono, iā tribus fusi prāliis ferre nequiuissent. O-  
tho vt à cadibus impollutas seruaret manus, Ricar-  
do Langusco copiarum imperium dedit, superindu-  
itque sibi lintheam stolam, sacerdotali habitu multis  
striatam rugis, prāferrique sibi iussit argenteam cru-  
cem, veluti pacato itinere sacri imperii sui sedem adi-  
turus. Magno demū silentio de secunda vigilia Ricar-  
dus castra mouit, tribusque ferme horis ad Sereniū  
vicum est peruentum. Inde prāmissi speculatum ex-  
pediti equites ducibus agricolis, non multo pōst re-  
nuntiauerē apud hostes, vt in ipso cōticinio accidit,  
cuncta quīeta, nocturnique silentii plena: conspici  
tantum semiextinctorum ignium fulgorem, nec ex-  
audiri castrorum fremitum: ita vt nec ad ipsos pagi  
aditus frequentium vigilū stationes esse iudicarent.  
His diligenter exploratis, & instructis ordinibus, pri-  
usquam dilucesceret, in conspectū oppidi se dedēre,  
oppresserēque aliquos excubantiū: nam sine facibus  
iter & silenti quidem luna cōfecerant, ne ab alta sa-  
cræ Turris specula, patētibus in campis vaga lumina  
cernerentur. Eo inopinato hostium aduentu exter-  
ritus Napus, vix spatium habuit ad induēda arma: tu-  
barum tamen clangore & pulsu tympanorum cuncti  
excitantur. Pontius Prætor legionem semiinstructā  
in apertiore locū educit: equites aggregantur: ma-

D.ii



gnis clamoribus pugna cōmittitur. Pugnat in hac parte Languscius admirabili virtute: interfectioque Pōtio Pratore, stratisque vexillis, legionem cum multa caede pepulerat, quū altero egressu & angustiore quidē via prouectus in aciem Napus, irrumpētibus Comēsis occurrat: ita ut eum Fortuna Simoni infensissimo hosti obiicere videretur. Eo in loco summa contentione aliquandiu dimicatum, quum Turriani proceres in prima acie, de imperio, de vita fortunisque omnibus dimicarent: ex aduerso autem Simon & Lucerius Rusca incitati efferatque diuturno inimica gentis odio, in aduersos vesano impetu deferretur. Inalbescēte iam cælo Andreoccius Turrianus interficitur: Franciscus qui hosti equi frenum cōprehendere auso, dextram ingenti gladio detruncarat, multosque huc & illuc concitato equo vulnerarat, cōiecta in inguē cuspide cōfoditur. Napus ipse equo deturbatus, quū in purpurea trabea, cœnoso in loco volutaretur, à Ruscono milite capitur, seruatūque ægrē ab irati Langusci gladio, deprecante plurimum Othone, & trepidū perhumano sermone cōsolante. Capiuntur quoque in ea aduersi praelii fuga, summæ spei adolescentes, Conradus cognomento Musca & Guido, Turriani: hic Frāncisco, ille Napo genitus erat: quibus aliquot post annos carcere eductis, paterni imperii decus Fortuna restituit. Itēq; Hereccus superioris Pagani ex Hermano pronepos, Lombardusque eius patruus, & Cauerna pater Pagani iunioris Patriarchæ Aquileiensis, & Napi germanus frater. Hos omnes Simon atque Lucerius, tanquam peculiari ipsorum sorte, Comensiumque militum felici virtute



superatos & captos, Comum deducendos curauere, vt in Baradelli arce custodirentur. Ea est edito in mōte, excelsa turre insignis, à Luithprando Longobardorum Rege ante octingentos annos ædificata, vt latè speculam in subiectos cāpos ad tutelam vrbis præberet. Ferunt Simonem, quòd eius animi ferociam victoria mitigasset, non aliter insultasse Napo, quàm vt diceret, Non reposcam à te sanguinè & opes, Nape, postquam dii me voti compotem fecerunt, sed æquo iure pœnam talionis: experieris enim tantum, quale cruciatus & contumeliæ sit genus, in cauea ferarū more custodiri: & vir certè sapiens & egregiè fortis inter paucos numeraberis, si ea quæ ego diu miser & non semper infelix tuli, pari patientia feres. Napus constanti animo fabrefactam cancellatis trabibus caueam intrans, nihil pro se, sed tantum pro Guidone & Musca deprecari, se meritas luere pœnas sinerent: eos verò qui vitæ innocentia nihil durius mererentur, humaniter custodirent. Non caruit scribendi legèdique solatio Napus: cæterum adeò acerbè custoditus est, vt ei neque cultelli, neque forfices concederentur, quibus sibi mortem consciscere posset. vnde illi ad deformitatem prælōgi vngues, promissæque casaries, & illuie turpis barba prouenerat. Reliqui, & ante alios Musca & Guido decori iuuenes, cum Luçterii viri pernobilis humanitate, tum pacati iam Simonis indulgètia, liberalius asseruati. Otho memorabili potitus victoria, ante omnia apud duces militesque grauiter ac humaniter egit, vt moderatè victoria vterentur, cædi vindictæque finem imponerent, spoliis contenti essent, captiuosque dimitterēt.

D.iii.



Agēdas enim diis immortalibus gratias , quòd toties bello profligati, ac omnibus exilii, fugæ, ac egestatis oppressi malis, hostes septies acie victores, tantisque subnixos opibus, ad internicionem eorum nominis, vnius horæ momento debellassent. Remisere impetum Patritii, condideréque extemplo gladios. Commouerat enim generosos animos Francisci cadauer, lutulento in solo sædè proculcatum: cuius etiam caput gregarius miles ob fratris necem decisum trunco, hastæque præfixum, victoribus pariter & captiuis ostentabat. Fuerat enim Franciscus Napo fratre sæuior & asperior, vtpote qui nutantem in consilio Napum ad sumendum de captiuis, Theobaldóque præfertim supplicium, vehementibus literis impulsisset, semperq; acerbissimè grassatus in nobiles ciues, plebem satis superque sua temeritate concitatam, ad audenda facinora intemperáter accendisset. Tum verò Oldradus Prætor, clade Mediolani nuntiata, aduocare in consilium ciues, plebem ad arma vocare. At ciuium optimus quisque parum ad eius imperia commoueri: de pace & cōcordia plurimum loqui: in virtute pietatēque Othonis Antistitis summā spem reponere: propterea sanandæ ciuitatis & parandæ quietis occasionem diuinitus oblatam arbitrari, postquā vniuersi ferè Proceres Turriani, qui renouare bellum possent, aut in acie essent cæsi, aut in fuga capti, ad manus hostium peruenissent. Quibus rebus Oldradus valde cōterritus, ac sibi admodum timens, in Prætorium se recepit. Interim Cassonus de aduerso prælio certior factus, è Canturio Mediolanum peruenit, sperans aut patrem, aut patruū, aut certè reliquos fa-



miliæ principes ex fuga in urbem se recepisse . Sed ibi de suorum calamitate certior factus , non deserit sese: & quum non statim admitteretur, refractis portis, introductoque armato agmine, in forum contendit. In eo tumultu suburbani incolæ Comēsis portæ, postremos ex Cassonianis equitibus inuaserunt: ex his multi vulnerati, exutique armis & equis in diuersa diffugerunt. Porro Cassonus urbem percurrrens, & veteres amicos plebēque præsertim ad arma euocans, & crebrò libertatē se aduersus veteres tyrannos defensurū repromittens, quum nemo cōmoueretur, desperatis rebus, Romana porta se proripuit: adeo enim ex euentu eius pugnae apud omnes populi classes, veteris studii & fauoris ardor territis mentibus exciderat, ut nemo vel egregiè factiosus in medium prodiret, qui elato vexillo Turriani imperii nomē se defensurum profiteretur . Hinc videre licuit, quantam rerū animorūque mutationē aduersæ pugnae casus attulerit, adeo ut facile iudicari possit, in toto tuendi principatus negotio, nihil omnino esse populari præsidio incertius ac inanius . Cassonus continenti cursu Laudem Pompeiam peruenit, & quum ibi minimè reciperetur, Cremonā, atque inde Parmam ad veteres amicos confugit. Eodem die Mediolanenses ad Othonem legatos miserunt, qui omnia amica paratāque ingressuro urbē pollicerentur. Ita haud multo post insigni pompa in speciem triumphi Mediolani receptus, cunctos qui aduersarū partium fuerāt, metu liberauit, habuitque orationē ciuili clementia & Christiana pietate plenissimam: pacatisq; omnium animis, Respublica ad eius nutū constituta est. Creā-

D.iiii.



tur quoque Prætor Ricardus Languscus, & Magister equitum Simon Locarnas, quorum illustri virtute se victoria potitū Otho gratissimo animo prædicabat. Dedicauit subinde arā in tēplo maximo diuæ Agneti, quam in prælio vouerat, addiditque agros in alimēta sacerdotum, qui quotannis eius diei memoriā celebrarent: Idque adhuc singulis in vrbibus Mediolanensi imperio contributis, Prætores Decurionēsque ad tubarum cantum instauratis sacris, religioſe repetere poſt ducentos & ſexaginta annos videmus. Pugnatum eſt duodecimo Calēdas Februarii, anno à natiuitate CHRISTI milleſimo & ducēteſimo ſeptuageſimo ſeptimo. Eius verò ſummæ victoriæ hiftoriā Otho pingendam curauit in Angleriana arce, regio ſumptu ab ſe ædificata: extantque adhuc in maximo teſtudinatóque conclauī, incorruptæ præliorum cum veris Ducum vultibus imagines, Latinis elogiis paſſim ſingula rerum argumenta indicantibus. Quamquam Muſca Turrianus demum victor, recenti calce maculare potius quàm obliterare eius infauſtæ hiftoriæ memoriā contenderit. Auxit eius diei laticiam Bonacoſæ Burræ partus: ea enim nocte qua ad Decimum pugnatum fuerat, Magno Marthæo filiū peperit, cui ob galli cantum Galeacio nomen inditū ferunt. Hic eſt ille qui poſtea omnes eius ſæculi principes & Duces magnitudine animi, liberalitate ac imperatoria laude ſuperauit. His conſectis rebus Otho ad expugnandam Montis orphani arcem, copias miſit, in quam Turrianorum reliquiæ confugerant: vexabantque inde diurnis nocturniſque decurſionibus, ſociorum agros. Ea arx ad tertium à Como lapidem



imposita est monti, qui ob id orphanus appellatur, quod vndiq; discretus ac abiunctus à cæteris, ab ima planitie molli fastigio in nemorosam cautium metam assurgit, insidetque viæ militari ad Coxia torretis vallem, qua iter est ad Liciniforum. Hæc quum machinis capi nō posset, operibus circumuallata, sexto mēse fame domita est. Desæuiit in muros Otho, sed nō planè totam diruit, ita vt Guido è carcere elapsus, rerūque potitus, eam post viginti annos facile restituerit. Euerfa Montis orphanæ arce, Turriani finibus excessere, & veteres eorum cliētes, quum Othonis clemētiæ salutē minimè cōmittendam iudicārēt, in Cremonēsi Parmēsiq; agro, & in Venetia ad Aquileiam familiæ proceres aggregabantur. Tum verò Otho à belli studiis ad pacis ciuiliſq; administrationis munia conuersus, ciues de se bene meritos locupletare: omnibus iustitiæ ac humanitatis officiis nouas amicitias parare: procurare res diuinas: singularique moderatione Principis simul atque pastoris officia implere. Quum in his rebus esset occupatus, renatum est repente bellum, initio à Laudēſibus exorto. Nam Othone mirum in modum Vistarinis fauēte, qui (vti diximus) principatu pulsi redierant, æmuli eorum quum neminem ciuem dominatu potiri paterentur, ad se Cassonum & Gothofredum, atque itē Raimundum ab Aquileia cum magnis copiis acciuerunt, indeque auxiliis Cremonensium & Parmensium adaucti, in agros Mediolanensium sese effuderunt. Cassonus multis expugnatis direptisque oppidis, Tritio & demum Vaprio in ripa Abduæ occupato, Lambrum traiecit, conflixitque collatis signis cū



Mediolanensi legione & urbano equitatu, qui cum Carroccio temerè vsque ad sanctum Donatum Romana porta processerāt. In hac pugna Cassonus, paucis cæsis, supra viginti septem spectatæ nobilitatis ceturiones cepit, & in his Mutium Soresinam, Gasparè Vicecomitem, & Antifossam Vercellinum, & præter hos magnum numerum peditum & equitum. Inuenio apud quosdam authores, Othonem cum expedita manu ad Cassianum vsque processisse in ripa Abduæ, vt primis hostium incurfibus occurreret: maioréque conspecto hostium exercitu, refugisse ad Gorgoncio-læ vicum, superuentuque hostium non aliter seruatum quàm munitione sacræ turris, in quam nemini cognitus ascenderat. At Cassonus eius pugne successu elatus, per suburbana ad Ticinensem portā adequitauit, terroremque ostentatis copiis ad fossas vndique circumtulit. Tum verò Otho in graui periculo mira vsus constantia, fidis cohortibus portas firmare, Prætozem in foro cum signis militaribus excubare, suspectos ciues apud se habere, eoque vultu cuncta administrare, vt in multa dissimulatione pauoris, excellens fortitudo & prouidentia singularis eminere videretur. Nec multo post Cassonus, nemine ex veteribus amicis, vti sperauerat, ad arma concurrente, retrò vertit agmen, transgressusque Abduam, ad oppugnandum Bregnanum cōtendit. Discessu acerrimi hostis Otho recreatus, nihil potiùs & expeditius existimauit, quàm è Monteferrato Guliermum veterem socium & militari laude florētem euocare: quo duce vim imminentis hostis propulsaret, & insigni apparatu, conatuque egregio bellum conficeret. Nec



multo pōst Guliermus accepta ingenti pecunia, Mediolanum venit, statimque liberali stipēdio ad quinque annos, Mediolanēsiū Othonianarūque partium, aduersus Turrianos eorūque socios imperator deligitur. Nec mora cum eo Prætores (duo enim tunc erant) Antonius Langusq̃ Ticinensis, & Lucetius Rufca Comensis, exercitum instruunt, Carroccium educunt. Coarctarat siquidem Otho Praturæ tempus, vt pluribus honorem impartiretur, eoque beneficio plures ciuitates atque familias sibi cōciliaret: nam qui annuus fuerat magistratus, semestris effectus est, ea lege, vt qui designatus esset Prætor, dignitatis insignibus vteretur: sed exclusus vrbana iurisdictione, bello tantū collegæ operam nauaret. Cæterum promotis castris, ad Vaprium recto itinere est peruentū. habebat enim id oppidum cū arce traiciendi fluminis opportunitatem. Itaque arx magnis vtrique viribus oppugnata defensaque est, bellumque protractum, ita vt nihil præter vastationē agrorum, incendiāque villarum memorabile gereretur. Verū Guliermus noui consilii cogitationem suscepit, ut resecto ad Tricium ponte, vltra Abduā bellum transferret. Erat in castris Otho, & ab alia parte Raimundus Turrianus: ab his vti decuit à sacratīs viris, Bergomates legati impulsī ab optimis vtriusque partis ciuibz, impetrarūt vt de pace loqueretur: eoque res interpositis aliquot dierum induciis deducta est, vt deposito metu, singulari familiaritate vtrique milites amicos & propinquos conuenirent, adeo vt vna castra ex duobus facta viderentur. Sed quum à multis ex illustri ordine Mediolanensium Turrianos



principes salutari, studiosiusque complecti Guliermus conspiceret, inuectus equo in commeantium turbā, ferrea claua minabūdis, colloquia militum diremit. Paulo post tamen Raimundus Cassonus & Gothofredus Melenianum venere. Affuitque ad conditū Guliermus cum Othonianis, in quibus erat Conradus Castellionus iureconsultus insignis: breuique, disceptatore & arbitro Guliermo, pax his conditionibus dicta confectaue est: scilicet ut in summa, Bipriana & Vapriana arces ipsi Conrado & mercatorū collegio custodiendæ traderentur: agros porro suos, paternasque possessiones, castella, domos Turriani recuperarent: loca tamen munita, his ciuibus qui neque harum neque illarum partium censerentur, custodienda relinquerent: potestasque his esset uti luberet, habitare in agro Mediolanensi, & vtrinque captiui sine pretio dimitterentur. Tabulis ritè confectis Turriani captiuos Guliermo ea conditione tradiderunt, ut nō prius soluerentur, quā hi qui in Baradelli arce erant, dimissi forent. Id verò facturos Comenses Lucterius & Simon pernegabant, qui iure belli captos peculiarēque hostes suos, ad alienum nutum & commodum minimè dimissuri viderentur. Nihilofecius Guliermus, quanquam id à Comensibus quod Turriani petebant, nō impetraret, Mediolanēses captiuos omnes dimisit. Nec Otho ceteris pacis cōditionibus diu stetit, & sua sponte & impulsu clarissimorum ciuium, qui priuato quodam inito fœdere, aduersus Turrianos conspirarant. In his fuere Vicecomites fermē omnes, Sorefinæ, Mandellii, Pufferulæ, atque item Cribelli. Ita Turrianis neque redditæ res, neque restituti



agri, neque concessa patria, neque captiui è Baradello custodia liberati sunt: magna quidem cum Othonis inuidia, qui securitatem imperii fide & iureiurando potiozem habuisse dicebatur. Prouidebat enim amicos clientésque suos, quibus Turrianorum bona dono data fuerant, ex lege & conditione pacis, omnibus victoriæ præmiis ad contumeliam spoliari: quæ res ad conturbandas multorum fortunas, abalienandósque animos, manifestè pertineret. Igitur Turriani à Guliermo Othonéque decepti, eo cum dolore animi latè finibus exceßerunt, vt iniuriam violatæ pacis ad ciuitates passim regulósque deferrent: ab his opé implorarent: focia & mercenaria arma pararent, quibus acceptas iniurias vlcisci, & patriam repetere possent.

Sub id tempus in Baradello moritur Napus, foeda illuue, & enatis subinde pediculis consumptus: Fuerat in eo squalore & vitæ tædio annum vnum, menses septem, & dies viginti tres. Corius & Merula raptum pedibus, & in sylua iumentum more sepultum tradút. Sed nos Tristano Calcho potius assentimur, qui Comensem episcopum agenti animam astitisse scribit: collatisque Christiano more sacramentis defunctum, in ædícula Diui Nicolai piè atque honestè tumulasse. Eundem vitæ exitum tulerunt Lombardus & Cauerna biennio post, ex morbo ægritudineque animi Napú sequuti. Interea Raimundus ex Veneria, Foroiulio atque Histria, & ex Carnis femique Illyricis gentibus, ad duo milia equitum, & bis totidem peditú, sacerdotii opibus armauit. Quibus Cassonius veteres Germanos, & Parmensium Cremonensiumque & Laudensiu auxilia adiunxit. Accessere etiã



plerique Mediolanensium, qui Othoni principatum inuidebant, ægerrimèque ferebant Turrianorum iniuriam, & communem patriam fructu pacis & otii fraudatam querebàtur. Propterea sponte in exilium abierant, & Turrianorum signa sequuti, quantis maximè artibus poterant, per affines & propinquos in Republica, Othonis auctoritatem conuellebant. At Otho in eam curam experrectus, ex fidissimo & fortissimo genere militum exercitum parare: à sociis ciuitatibus auxilia accire: & veluti in supremo conatu, supremàque spe conficiendi belli, omnem armorum apparatus, ac ingentem denique pecuniam proferre. Cunctabatur autem Guliermus prauis ac insidiosis artibus, nec adduci poterat, vt rebus celeriter administratis, in hostes copias educeret: vtpote qui pericula adaugeri, confirmari hostium vires, terrerique magis ac magis Othonem magnopere cupiebat, vt operam suam ampliore pretio periculi necessitate circunuentis venditaret. Erat enim Guliermus animo ingenti, & in omni belli munere prorsus intrepido, sed auri ac imperii foeda cupiditate maximè corrupto. Adduxerat enim Mediolanum superiore anno Beatricè vxorem, quæ mirifico apparatu ac insigni liberalitate suscepta, ornatàque regalibus donis ab Othone, ab ipsiisque Decurionibus, & demum introducta in Nobiliū domos, admirari lautitiam, magnitudinem atq; opulentiam vrbis, inuiderèque fortunæ Othonis, & demum Iberica cupiditate, id imperium affectare coepit. Hæc quum impensè laudaret apud virū, Quin tu (inquit) si planè vir esse velis, hac vrbe potiri posse non speras? Pater certè meus tibi nō deerit, si pro te potius quam



pro multis imperitis, belli peritissimus pugnare decreueris. In hanc spem Guliermus ab inani & cæca, ut plerunque accidit, ambitione facile prolapsus, in Hispaniam enauigarat: ubi cōmunicatis cum rege consiliis, quum voti cupiditatisque suæ fortunam tentare decreuisset, galeatos amplius trecentos equites, & leuem armaturam equitum & peditum in naues sustulit, & in Italiam est reuersus. His de causis Otho profunda prudentia & solerti ingenio probè agnoscens, quantis animi recessibus Guliermi consilia cōderentur, nihil antiquius atque validius habuit, quàm parum synceri ducis animum per amplis pecuniæ muneribus expugnare: & Matthæus Vicecomes iam planè bello & pace spectatis operibus magnus, dies mora extraherem iocabundus incitabat. An (inquit) Gulierme, illā vim bellici vigoris, qua vna laude maxime flores, hac infami cūctatione amittes: ut nos tecū militaris nominis dignitate spoliemur? Conuenere iam vndique auxilia, tantæque nobis adsunt copiæ, ut hoc tempus quod tibi segniter deperit, morari de hoste victoriam videatur. Aduenerant enim Simon Aduocatus à Vercellis, à Nouaria Guliermus Brusatus, Antonius Languscus à Ticino, & Lucterius Rusca, Simónque Locarnas è Como, qui suarum ciuitatum magni roboris auxilia contulerant. Itaque Guliermus compressa ægritudine animi, uti non minus accepto auro quàm pudore deuictus, Carrocciū eduxit, & ad Vaprium, ubi hostes cōstiterant, contendit. Fuere in eius exercitu, uti aliqui authores scribunt, ad triginta milia peditum, & sex milia equitū, in quibus supra duo milia cataphractorum equitum censeban-



rum. Inuasit Cassionum insolitus pauor tanto conspecto exercitu, ita ut in eo semper antea intrepido pugnacique, expediendi consilii vim omnem excuteret. Non putarat enim Mediolanenses publica Carroccii signa aduersum se adeo celeriter educturos, remque sibi tantum fore cum Guliermo Othonianisq; clientibus, bona victoriae spe plenus existimabat. Appropinquante itaque hoste, in id consilii discrimen erat deductus, ut si ultra amnem se recipere, exercitumq; seruare vellet, id nedum commode, sed nec sine ingenti perturbatione, summoque periculo facere posset. Relinquebatur ut audacter irrumpendo, iniqui certaminis aleam subiret, aut se ad oppidum circunvallari atque obsideri pateretur. Quod quum indecorum ac miserum fore iudicaret, uti dignum erat fortissimo Duce, & toties victore, instructa acie conflixit, ediditque supremo virtutis conatu egregium facinus. Nam quum undique circunuenta acie, a tanta hostium multitudine caderetur, Germanos equites cohortatus ut honesta nec inulta morte concideret, conglobato cuneo, ad Guliermi vexillum prostratis Hispanis penetrauit: occisoque signifero, illud arripens discerpsit, atque ibi demum interclusus a legione interfectusque est. Tum vero Turriana acies undique pulsa trucidataque ad flumen se conuertit: ibi quum plerique natando metu mortis, mortem non timerent, magna ex parte summersa est. Perit & in vado Gothofredus Turrianus Cauernæ filius, deletaque sunt penitus Raimundi auxilia: is enim Laudi Pompeiæ substiterat. Cremonensium vero & Laudensium Duces capti. Pugnatum est ad Vaprium septimo Calendas



lendas Iunias, anno quarto ab Decumana victoria, quæ ficuti Principatum Othoni dederat, ita hæc eum sublato vndique metu confirmavit. Honestatus est Cassonius sepulchro non ignobili, quod adhuc extra Vaprium in ædícula conspicitur: retinetque adhuc proximus ager eius prælii memoriam, quum ab incolis Turrianæ cladis nomine vocitetur. Nec multo post Laudensibus bellum indictum, depopulatusque est eorum agros Guliermus tanta acerbitate, ut Laudenses villarum castellorumque vastatione perdomiti, de pace legatos ad Othonem miserint. Inde Guliermus in Cremonenses duxit, multisque detrimentis illatis, bellum aliquandiu est productum. Nam Placentini, Parmenses, Mantuani, Regienses Cremonensibus opem attulerant. Ad extremum inter eos inita pax, & in centum annos proclamata, ea conditione ut captiui vtrinque dimitterentur, & Turriani, eorumque ex professo fautores his urbibus exularēt. Interea Comenses Guliermum in decem annos Imperatorem suum declararunt, concessaque est ei suprema potestas condendi atque antiquandi municipales leges. Sed id vnum omnino est cautum, ut de captiuis Turrianis, qui in Baradelli arce erant, ius omne Comensi populo relinqueretur. Atque ita à Comensibus liberaliter susceptus, iuravit se populi Rusconarumque partium iussu, aduersus eorum hostes, ut res posceret, bellum egregia fide gesturum. Inde frequenti comitatu Mediolanum rediens, uti tot rerum secundo successu elatus, ad infana consilia reuerti, secreto hostilia moliri, & cogitare demum cœpit, quibusnam artibus Othonis existimationem cō-

E.i.



uellere, circumuenire hominem iam planè senem, & deniq; vrbis imperium inuadere posset. Ipse primum ingenio procaci, auido, inexplibili, Reipublicæ accumulatis tot sumptibus, grauis & inuisus esse cœperat, quum sibi arroganter adscriberet recentis prælii victoriam, & Othoni & ciuibus pacis beneficium obiectaret. Ob id inflatus atque superbior quàm antea sese gerebat, ita vt non omnino dissimulater ad principatum aspirare videretur. Ante omnia Bosiu Doariam veterem aduersæ factionis ducem, Cremonensiumque tyrannum, in cuius tabernaculo Actiolinum expirasse docuimus, Soncino in oppido Othone frustra reclamante constituit: utque familiam illustrem ac opulentam imperii vtique æmulam Othoni opponeret, Soresinas incitauit vt sese efferrent, & his ciuibus æquarentur, qui nobilitate pares, nec omnino virtute & diuitiis superiores, libertatē opprimere viderentur. Postremo postulauit vt Ioanni Pogio, ipsius familiari, Prætura cōferretur. inde enim sibi gradum facere ad dominatum maturabat. Itaque Pogio Prætore statim duæ sunt exortæ factiones: magna pars ciuiū Othoni fauebat: in altera cōspiciebantur Guliermus ipse & Pogius Prætor, atq; itē Soresina familia: & quanquā occultè Castellioni duce Guidone, cuius opera per id tempus auro corrupti custodes è carcere Baradellæ arcis Guidonē Turrianū eduxerant, Musca & Hereccus eripi nequiuerunt. Ea res Othonem grauissimè pupugit, tuleréque id iniquo animo Comenses, qui à Mediolanensibus capitalem iniuriam ingratè sibi fieri querebantur. In id graue salutis ac imperii discrimen intestini hostis perfidia coniectus Otho,



diffimulatione in præsens opus esse existimabat, adeò vt cuncta iniqua & immoderata petenti, perblando & familiari ore condonaret. Cæterùm intensissimè vigilabat, vt consilia & progressus eius notaret, multaque pollicendo amicos hosti detraheret, & sese à repentinavi domestici hostis tueretur. Interim Guliermus domestico bello in Montemferratum reuocatus, Vercellas proficiscitur. Ita celeriter adhibitis in consilium amicorum fidelissimis, non deest occasioni Otho : quid faciendum sit Matthæum admonet, correptisque armis ipse equo prouectus, ad Prætorianas ædes contendit : Poggius domo magistratūque & vrbe excedere cogitur. Creatur nouus Prætor Vbertus è Beccaria familia, siue (vt ait Merula) Iacobus Sūmaripa Laudensis, in reliquos scilicet menses, vt coniectari lubet. Ita breui in tutiorē statum restituta Republica, & depulso omni metu, Iacobus & Carolus Sorefinæ in exilium aguntur. Nōnulli porrò ex Terzaghis & Balbis qui cum Guliermo consilia miscuerant, extra decimum lapidem relegantur : & Sorefinarum domus, quam illi ex ruinis Turrianarum ædium condiderant, incurfu plebis solo æquatur. His confectis rebus Otho, vt sese aduersus vim acerrimi & potentis hostis confirmaret, in Germaniam ad Rodolphum Cæsarem legatos cum muneribus misit, obtulitque ei amicitiam, liberalēque operam venturo in Italiam ad recipiendam Romani imperii coronā. Cæsar tametsi Turrianis antea fauerat, ex vsu tamen rerum suarum, cum Othone certo amicitix fœdere coniungi maluit, quàm profligatarum partium, quarum Principes cæsi captiq; essent, inane nomen tueri.

E.ii.



Itaque Othonem, trāsmissis more Cæsarum amplissimis literis, in clientelam fouendum tuendumque recepit, misitque ei Germanos equites, qui in speciem Prætorianæ alæ corporis custodiæ adessent. His de causis Guliermus bellum quod parabat, facile auertit in Derthonenses & Alexandrinos. Sed non multo post Turriani in spem renouandi belli, repetendæque patriæ sunt erecti, initio à Comensibus exorto: qui quum veteres & laxiores agri terminos sibi reddi, vti antea ex auorum memoria possedissent, à Mediolanensibus postularent, & ab his nequaquam pro iure fœderis & amicitiae benignè & liberaliter responderetur, armata iuuentute agros Leucensium & Cluiatensium expugnatis castellis occuparunt, finesque eos protulerunt victricibus armis, vti ex iure & æquo antea petierant. At Mediolani quum hæc essent nuntiata, Senatus Comenses arroganter ac hostiliter fecisse iudicauit. Ita in eos numerosus exercitus est eductus, cui præfuit Marthæus Magnus. Ab eo Comenses superati & castris exuti sunt, multisque cæsis & pluribus captis, onusti Comensium præda, Mediolanenses domum redierunt. Hanc cladem grauissimè tulit Comensis, quòd in se vicinum & socium, atrocius quàm in barbarum hostem Mediolanenses gladium exercuissent: isque potissimum & dux & author cladis extitisset, qui paulo antè ciuitatis ipsorum Prætor & imperator fuisset: cuius recentis beneficii memoriam, vti superbus & saeuus amisisse videretur. Itaque in eo dolore grauius decernitur: aduersus enim Vicecomites repente coniurant: vinculis exoluunt Muscam & Hereccum Turrianos: eos Praturæ digni-



tate exornant: pecunia armisque instruunt, & bellum vehementibus animis in Matthæum ac Othonē parant. Ad id etiam ipse Guliermus, eo Comensium decreto magnopere latatus, opes atque operam pollicebatur: cuius viri vim, tanquam pugnacis & ab recenti iniuria concitati, grauē & valde periculosam Othoni futuram intelligebant. Eo modo Turriani iuuenes peracerbo carcere post septimum annum & mensem vndecimum educti, acre bellū, & tum Othoni, & Matthæo demum, eo pulso & in exilium acto, variis successibus intulerunt. Sed quoniam ductu Magni Matthæi hæc gesta sunt, in eius vita aptius ac illustrius perscribentur. Iam enim in eum ab eximia virtute & rebus feliciter bello gestis, præclaris ducibus parem, Otho senex omnia humana iura contulerat, adeo vt vtrūque magistratum vnus occuparet & impleret. Gerebat enim bellum vti Dux & equitum Magister, quum opus foret, & è Tribunali Prætoris partitissimè ius dicebat: scilicet vt ipse omnium litium disceptator & iudex ex arbitrio iudicaret, & omnis sub inde prouocatio tolleretur, graui ciuium incommodo ad ferendas lites excogitata. Sed mirum in modū eius nomen atque potentiam adauxit Guliermi inexpectata calamitas, qui Turrianis & Comensibus opportunè coniunctis, iam Othoni graue bellum intulerat, atque id tum vehementiore studio reparaturus esse videbatur. Nam & Guido Castellionus Turrianis adhæserat, vir inter primores consilio, clientelis atq; opibus insignis: erat enim Guidonis Turriani qui è Baradello effugerat, auūculus. Igitur Guliermus quū nefario scelere Derthonensem Episcopum necasset,

E.iii.



in manus Alexandrinorum ex insidiis captus deuenit, apud quos ferrata in cauea atrocibus corporis atque animi tormentis excruciatu interiiit. Gratias igitur Otho diis immortalibus agens, quod se votorum omnium compotem fecissent, uti iustam ab omni labore vacationem nactus, apud Claræ vallis cœnobium sacrata quiete fruebatur, apprimè confusus præcellenti prudentia virtutèq; Matthæi Magni. Hūc enim ipse à tenera ætate seuerè & diligenter educarat, institueratq; his moribus quibus in omni bellica vel ciuili actione ad certam laudem semper illustris, tanto imperio dignus esse videretur. Magnitudine quippe animi, patientia, humanitate, religionèque & domesticò splendore cunctos anteibat: nemo ei corporis ac ingenii vigore par erat: altitudine verò consilii, facundia, & oris atque habitus dignitate, antiquis heroibus æquabatur. Nec eo quisquam prole felicior fuit. in quinque enim eius filiis Otho ipse peracri iudicio, miram certamque indolem ad propagandum imperium quasi diuinans prouidebat. Et iam ex his Galeacius, & Marcus cui Balatroni cognomen fuit, ad militarem ætatem peruenerant: & in Ioanne atq; Luchino, optimorum Principum indoles elucebat. Postremus Matthæi liberorum Stephanus fuit, cæteris prole quàm vita felicior, quum ad hunc filii nepotèsque, & qui nouissimè imperarunt pronepotes, recta serie respiciant. Eo modo quum ad Claram vallem amœnissimis in hortis Otho tuendæ valetudini operam daret, frequentique comitatu insignium philosophorum sacratorumque virorum oblectaretur, sæpe de diuinis humanisque rebus iucundissimè



disputans, senio potius quàm morbo confectus, è vita discessit, Augusto mense eius anni qui fuit à partu Deiparæ Virginis nonagesimus quintus supra mille & ducentos. Impleuerat septimum & octogesimum annum, nullis paulo molestioribus morbis obnoxius. Ita vt mihi procul dubio omnium Principum longè felicissimus decessisse videatur. Vsq; eò siquidem, paucis concessò Parcarũ munere, vixit summa gloria plenus, vt, quod ambitiosa cupidàq; mortalitas maximè optat, posteritati suæ lætissimus interfuisse videatur.

*Hoc epitaphium marmoreo eius sepulchro insculptum,  
ante sacrarium Templi maximi legitur.*

Inclytus ille pater patriæ, lux, gloria patrum,  
Fulgor iustitiæ, fidei basis, arca sophiæ,  
Largitor veniæ, portus pietatis egenis,  
Intrepidus pastor, quem moles nulla laborum  
Ardua deuicit, populo latura quietem,  
Ille pius princeps, & præsul amabilis, in quem  
Altus virtutum splendor conuenerat omnis,  
Quo Mediolanum radiabat lampade tanta,  
Totâque fulgebat regio: nunc pallet adempto.  
Clara Vicecomitum proles, venerabilis Otho,  
Oh dolor, oh vulnus, cinis est hoc marmore factus.  
CHRISTE pater vitæ requiescat spiritus in te.  
Annis vndenis, ter senis térque diebus  
Præfuit Ecclesiæ pastor bonus Ambrosianæ,  
Mille ducenteno, quinto, nouièsque deceno  
Quarto hic Augusti bis liquit gaudia mundi.

E.iiii.





Imago Matthæi Magni in habitu purpureo Vicarii  
 imperialis Modætiæ in templo maximo conspicitur,  
 effigiem templi à se instaurati Diuo Ioāni Baptistæ  
 offerens: sed alteram Valterius Corbitius Senator  
 in tabula nobis ostendit.



## M A T T H A E V S M A G N V S.

**N**emo, si Fortunæ ludos spectare lubet, certiore vtriusque fortis merito, M A G N I cognomē adeptus est, quàm hic ipse M A T T H A E V S Vicecomes, cuius imagini ad verā oris effigiem ducta, insignes etiā excelsi animi dotes breui elogio expressas appendimus. Nec titulus (vti reor) vel summæ virtutis atque potentia Regibus insolens & grauis, huic omnino ad inuidiam cesserit: quum illi superiores, Alexander, Pompeius, & Carolus, tanquam humanæ virtutis modum supergressi, inter Heroes referantur: hic porro intra patriæ fines parta laude contentus, pudore incolumi id tulerit, quod ciues post inuidiam morte extinctam, præclara etiam hostium confessione detulerunt. Natus est Masino in pago ad Verbanum lacum, eo fortè insigni die quo Federicus secundus dirus Italiæ Cæsar, à filio Manfredi Rege, coniecta in os stragula veste, necatus interiit. Tradunt autem non insulsi annalium scriptores, armenta eius vici spontè soluta, proripientiaque se magno tumultu è stabulis, domum in qua Anastasia mater infantem enitebatur, inusitato mugitu edito salutasse, adeò vt experrecta tota vicinia, puerperæ magnus timor incuteretur. Sed id Theobaldus pater pro lætissimo ostento accepit, gratulatus vel ob id uxori felicem partum, quòd miræ magnitudinis infantem ad ingentis spei fortunam edidisse videretur. Erat Anastasia Vberti Pirovani pernobilis ac optimi Mediolanensium Antistitis ex fratre neptis. Hæc puerum



rara charitate propriis vberibus aluit, adultumque virili cura honestissimis moribus instituit, ita ut Otho nescio quid egregium & verè magnum in pueri indole se conspiciere fateretur. Cæterum Matthæus iam planè vir, quanquam impubes, orbatu patre viro fortissimo, ærumnosique exilii Othoni patruo comes, ita corpus pariter ac animum exercuit, ut vtrunque viriliter aduersus rerum omnium contumelias indomitum, inuictumque voluptatibus præstaret: & duris atque asperis gaudere, nec aduersis vnquam frangi, nec secundis efferri videretur, quod nihil vnquã demissum aut insolens ore gestuq; eius excideret, præaltaque semper ac ardua ad imperium & gloriam intentus agitare. Summum quippe decus in clementia & moderatione reponebat, quibus virtutibus Turrianos omnino caruisse, idcòque celeriter excidisse principatu, prædicare erat solitus. Oderat enim gladios extra aciem cruentos, quum in neminem Turriani sanguinis, vel nunquam paternæ cædis oblitus, sæuierit, neminemque ex infensissimis hostibus bello captis occiderit: uti videre licuit quum omnes ferè aduersarum partium summi duces, ac sibi capitali odio inimicissimi, mira perpetuæ victoriæ felicitate in potestatem eius deuenissent. In his fuere Simon Aduocatus, Guliermus Brusatus, Philippus Languscus, Antonius Fisiraga, ac ipse demum Albertus Scotus, qui Vercellis, Nouariæ, Ticini, Laudi Pompeiæ & Placentiæ, Gibellini nominis hostes tyrannidè exercebant. Ad hanc quoque generosi & clementis animi laudem, moderati nomen addiderat, quum in omni bellicarum & ciuiliu rerum actione, nimix cupid-



tatis excessus effugeret, & nusquam timore aut superbia præpeditus, cuncta consilia certis temperantiæ finibus terminaret, & id quidem eo diligentius, quòd vel in speciem religiosè pius existimari vellet. Sed ei inter sæua arma nato atque educato, nihil potius vnquam fuit quàm augere factionis opes: aduersarios persequi, & latè imperium proferre: vel si id non facile sine cædibus ac incendiis pararetur, plura tamen se rectis consiliis & occulta largitione, quàm vi & cruenta manu confecisse, & plura denique auro quàm ferro feliciter expugnasse differebat: scilicet vt liberalibus ab inanique sumptu facile prodigis & natura pugnacissimis filiorum ingeniis vtiles frenos imponeret. Hæricum hercle Cæsaris fratrem ab inimicis aduersum se è Germania in Brixianum agrum cum ingentibus copiis euocatum, multo auro aggressus auerterat: parique felicitate Philippum Valesium, qui postea Gallia regnum tenuit, Pôtificis impulsu formidolosum exercitum ad Vercellas adducentem, multis legationum artificiis, & denique magnis muneribus peruicerat, vt amicus quàm hostis esse mallet, in Galliàmque rediret, quum Galeacius filius pugnae quàm pacis audior, viginti peditum & septem galeatorum equitum milibus transituro hosti obiectis, quin prælii aleam subiret, paternis monitis ægerrimè paruisset. Imperauit Matthæus ab Othonis morte septem annos: nouem in exilio tolerauit, quum malignitate propinquorum & subita nobilitatis conspiratione, ac Alberti Scoti perfidia circumuentus, vt inuidiæ cederet, Mediolano excessisset. Sed eum post patriam frustra armis sæpe repetitam, deformis exilii incommo-



da constantissimè tolerantem, nec vnquam despondentem animum, in spem non dubiam erexit Henrici Cæsaris aduentus. Fatali nanque insania Turriani inter se dissidere cœperant, & Guido patrueli Muscæ morte extincto succedens, consanguineis & ciuibus vsque adeò superbia intolerandus euaserat, vt Muscæ liberos, ad quos paterni auitique imperii hæreditas redibat, custodiæ traderet. His cognitis Matthæus agresti habitu, auiisque itineribus Astam ad Cæsarem contendit, vbi Cassionus Turrianus Mediolanensis Antistes cum Napino fratre, atque item principes Guelpharum partium conuenerant. Quis crederet sexagenarium senem, venerabili canitie, & malè tecto frontis honore, ipsoque præsertim arduæ cervicis habitu conspicuum, sed pedibus iter habentem, tot insidiantium oculos fallere potuisse? Proiecto ad pedes, & iuris & æqui opem imploranti, admiratus facundiam & oris decus Cæsar, spem dedit vt reduceretur, atq; id egregia fide præstitit, Philippo Langusco & Antonio Fisiraga, qui aderant, atroci oculo intuentibus, acerbaque voce cum totius pacis & quietis turbatorem appellantibus. Sed Matthæus numeroso cōcursu, liberalique studio veterum amicorum & clientium, qui prodeuntem ornatissimo comitatu deducebant, iam pristinae fortunæ suæ persimilis, pacificatore Cæsare, cum Turrianis fœdus percussit his legibus, vt beneficio Cæsaris reducti, in patria libertati restituta, æquo iure viuerent, & paternis bonis ciuili actione partis vtraque factio potiretur. Nec multo post Henricus Mediolanum venit, eique obuiâ egressus Guido cum insigni ordinum omnium pompa, &



ab equo defiliens, Cæsarem salutauit, sed vultu non occulta bile perturbato, quòd Germani equites Turrianum vexillum signifero vi extortum, solo affligerant, indignati quòd aliud insigne quàm Romana aquila præsente Cæsare præferretur. Cæsar eum humaniter alleuans, & equum conscendere iubens, renidenti ore, Guido (inquit) noli contra stimulum calcitrare: atque ita medius inter Matthæum & Guidonem, urbem intrauit, Guidone de Principatu planè desperante, quum aspectu tanti hostis qui dextrum Cæsaris latus regebat, & propinquorum qui aderant rebellione conterritus, omnem vim expediti consilii penitus amisisset. Caterum Henrico de more coronato, atrox in vrbe tumultus, casu an fraude incertum, exortus est, quum populus arma caperet, excitique ad arma Germani fora & compita expeditis cohortibus & turmis occuparent, & Galeacius cum globo equitum discurrens, & veteres clientes ad arma vocans, Germanos vt nihil timerent hortaretur. Sed ea vis armatae plebis, quum nec causa nec author tanti motus extaret, repente versa est in Turrianos nihil tale timentes: momentoque temporis domus procerum expugnata direptaque sunt. Guido equum nactus, ægrè profugit: Cassionus Antistes per hortos vix ereptus est: reliqui Turrianæ factionis inter se dissidentes, eandem improvisi mali fortunam tulerunt. Iam propè reum patrati facinoris apud iratum Cæsarem rumor Matthæum fecerat, nisi senem quietum pacata familia domi epulum parantem Prætoriani Cæsaris inuenissent, ipseque digressus ad Cæsarem falso credita multiplici testimonio diluisset. Relegauit tamè



eum Cæsar Ticinum, vt de ea re certius agnosceret, & Turrianis per summum populi scelus, omni honore atque substantia spoliatis, æqui iudicis officium præstare videretur. Sed ea disceptatio eum habuit exitum, vt Matthæus singulari Cæsaris studio Mediolani præficeretur. Henricum enim, vt Romam ire pergeret, Cæsariani nominis studiosi ex Etruria frequentibus literis euocabant, & ipse quantum Guelphis fidendum foret, præclare intelligens, certo fidelique præsidio factionis opes cõfirmandas arbitrabatur. Itaque Matthæus summa potitus potestate, iterum decem annis imperauit. Quo spatio aliquot subactæ vrbes, capti hostium principes, Turrianorumque opes attritæ deletæque sunt. Ipse enim domi ab inueterata prudentia consilio pollens, & foris filiorum ductu (ii enim præclari duces euaserant) multis præliis victor ad consumatam gloriæ laudem peruenerat: ita vt insigni merito Magni pariter atque felicitis nomē mereretur. Sed qui longa infracti animi patientia, rerum omnium difficultates egregiè superarat, inuidiâ veræ virtutis comitem superare non potuit. Præcipui enim amicorum gloriæ eius splendore offensi, ab eo descuerant, quū Robertus Neapolitanus Rex, Guelpharum partium suscepta causa in Liguriam venisset, Beltrandusque Vasco Cardinalis, Pontificis legatus, Matthæum diris persequeretur. In eam nanque vnâ curam animos intenderant, vt cõminuta Cæsarium authoritate, Guelphos tot aduersis præliis profligatos, contra Gibellinos erigerent, Matthæusque in primis tâquam maximè validus aduersarum partium imperator, dominatu pelleretur. Nam superioribus



annis in Erruria ad campum Aldinum semel, ac iterum ad Arbiā flumen, nouissimè autē ad montem Catinum Guelphi cum Gibellinis funesto euentu contenderant: quo pralio Roberti Regis frater fuerat interfectus, & Luchini Matthæi filii paternorum auxiliorum ducis mira indoles enituerat: ipseq; demum Robertus à Marco Matthæi filio pro Spinulis atque Auriis exulibus depugnante, Genuæ obsessus & miserè circumuallatus, in multo discrimine multum dignitatis amiserat. Quibus de causis acerbissimo consensu bellum atrox Matthæo parabatur. Ipse porro Beltrandus conflato iam ingenti exercitu, & receptis ad se Turrianorum proceribus, diuini iuris tela contorquens, Matthæum tanquam impietatis reum, æternis inferorum cruciatibus deuouit, & Mediolanensibus eo nomine sacra ademit, vt populum diro piaculo consternatum, in authorem tantæ labis concitaret. Nec legatum ea res fefellit: nam hæc emissa tela aliquanto grauiore mole quàm promoti ad portas ingentes exercitus, hostibus inciderunt. Clausis itaque templorum foribus, expers sacrorum populus, duodecim legatos ad Beltrandum decreuit, vt expiationem accuratis precibus impetraret. Sed in eo delectu de industria plures fuere Matthæo infensi, & ante alios ex amicis veteribus effecti noui hostes, ac ideo peracerbi & maximè pestilentes, Leodrisius Vicecomes patruelis, & Franciscus Garbagnatus, quo authore Matthæus in amicitiam Cæsaris fuerat receptus, & Simon Cribellus numerosa familia potens, vir atrox & inquietus, propterea alienati quod paria ingentibus meritis præmia minimè retulissent. Fa-



cilè enim superbos animos natura pronos ad leuitatem atque perfidiam, inuidia alienæ felicitatis inuaserat. Ita ut periniquè ferrent quòd non iam secus ac ex merito sperauissent, ipsis Matthæi liberis dignitate atque opibus æquarentur. Verùm Matthæo alioqui moderato, tardatèq; senectà parū expeditè liberali præcipua cura inerat, liberos eximia virtutis Duces, amicis & propinquis omnibus anteferre: augere diuitiis, ac bellicis honoribus honestare, quàm cæteris proximas spes maturæ liberalitatis relinquendas existimaret. Itaque Legati à Beltrando redeuntes referunt, nihil à viro peracri, iracundo, & validis copiis instructo impetrari potuisse, nisi Matthæus ob conceptam hæresim, aqua & igni interdictus vrbe pelleretur: eo pulso ciuitatem expiatā fore, & creatis Decurionibus qui æquissimo iure gubernent, ad pristina libertatis decus, deletis factionum odiis, continuo redituram. Nec mora incondita plebis fremitus auditur, pacem atque concordiam postulantis: & coniurati ad augendum tumultū idoneos homines subornant, qui specie religionis inducti exclament, non esse omnibus propter vnum deuotum caput, æternas pœnas apud inferos subeundas. His vocibus Matthæus & perpetuis inimicorum infidiis circumuentus, ad cōsiliū summæ prudentiæ, quod ei supremum & ad salutem expeditum fuit, extemplo decurrit: à Galeacio enim filio qui tum Placentiæ imperabat, opē implorat. Nec differt ille vir impiger de summo rerum periculo certior factus, quin statim coactis veteranis equitibus ad patrem aduolet. Eius aduentu inimici maximè perterrentur, dubii deprauatque ad antiquā fidem



fidem redeunt: confirmantur clientium animi: duodecim etiam legati, occupante metu tecti primò latebris, mox intempesta nocte elapsi vrbe diffugiunt. Nam Galeacius bellici vigoris plenus, nobilique facundia insignis, vti erat propter memoriam æditorum toties ludorum & totius Regiæ magnificentiæ, populo charus, popularique humanitate percelebris, aduocata passim concione, ciuium propè omnium studia quæ fortè nutabant, ad se conuerterat. Quum præclare doceret vnam eam esse mentem Pontificis atque Roberti Regis, vt Guelpho nomini latum atque stabile imperium in Italia oppressis Gibellinis adstruerent, quod facile consequi possent, si Turrianos viros crudeles implacabilique odio non inique omnibus iratos in urbem reducerent. Confirmatis eo modo ciuium animis, ac accitis vndique veteranis militibus, sedatoque tumultu, Matthæus duorum & septuaginta annorum senex, vti administrando bello viribus impar, & vt plerunque accidit in concursu asperimarum rerum, mente perturbatus, sed virtuti filiorum plurimum confidens, Principatu sponte se abdicat, Galeacioque militaris imperii vexillum tradit, deducique se ad templum maximum iubet. Inustam enim sibi vir contumeliæ insolens, & egregie pius, hæresis notam ferre non poterat, ita vt ad aram aduocatis sacerdotibus, Christianæ fidei symbolum præclara voce recitaret, testareturque iureiurando sibi immeriti sacra eripi, quod nusquam à sacrosancto dogmate discessisset: itidemque Dei maximi ultoris numen inuocabat, postquam iniquissima factiosi Legati sententia condemnatus, patria excedere cogeretur. Sequenti

F.i.



porro die Moguntiacum, quod hodie Modoetia dicitur, ad Diui Ioannis Baptistæ templum, ob memoriam Longobardicæ pietatis venerabile, & à se multis donariis exornatum contendit, ibique eadem professus, in febrem incidit. Accurrerunt illico filii, quû ad Crescetiæ cœnobium lectica deferretur. Id enim templum triginta ferè stadiis à Mediolano distat. Suprema autem morientis verba ad circumstātes quinque liberos hæc fuere, Stabit incolume vobis, charissimi atque optimi filii, hoc imperium quod relinquo, si concordibus animis cum virtute tum fortuna vestra vtemini: si verò diffederitis, vel eximia vestra virtus frustra erit, & à vobis ad hostes illico Fortuna trāsfugiet. Nec præcepto tanquā veri vatis eūctus defuit, vti mox dicetur. Exinde quû omnibus manarent lachrymæ, integris hercle sensibus, sed collabēte ceruice, supremū charitatis osculum singulis dedit: ita vt mox inter amplexus expiraret, eiq; tot liberi (vti maximè optarat) oculos clauderēt. Defunctum autē pio maximè consilio, secreto ac ignobili in loco tumularūt, celata etiā aliquādiu morte, vt cadauer in aduersa fortè belli fortuna, sæui Legati cōtumeliis eriperetur. Sed destinata iusti funeris pompa, & toto vel operosi sepulchri honore facile carere potuit, qui publico cōsensu illud perenne latēque diffusum decus ab excelsa virtute meruerat. Tumulo tamen eius hoc carmen affixum est,

*Matthæus factis merito cognomine Magnus,  
Tempore tam belli summus quàm tempore pacis,  
Mortuus est, & nullum habuit sublime sepulchrum:  
Claudere nanque illum non marmora sufficiebant.  
Sed nunc propterea tellus est tota sepulchrum,  
Et totum nolit Matthei fama per orbem.*





GALEACIVS PRIMVS

Galeacii effigies spectatur in templo ad vicum Boldonum Romana via, sexto ab vrbe Mediolano lapide, flexis genibus ante Christum crucifixum.



**G**Aleacius Matthæo Magno genitus, nouum id nomen, quod postea manauit ad posteros, primus familiæ intulit, à matre Burra ioco inditum, quum ea fortè in multo gallorum cantu enixa puerum apertis oculis altè vagientem, Gallacium appellasset, idq; arridentes ancillæ sæpe repeterent: nec abnueret pater, tanquam præclaro ab aue Martia militari augurio iucundè accepto, idque præsertim insigni euentu, fortuna cōprobante: quòd ea nocte puerum nasci contigisset, qua felici prælio ad Decimum interfectis aut captis Turrianæ familiæ proceribus, ab Othone parta est ea insignis victoria, quæ Principatus initium fuit. Nec demū strenuè educatus puer augurii fidem fefellit, quum singulari vigilantia & superbo spiritu, ac indomito vigore pugnacis animi, generosum & ferocem gallum æmularetur, & conspicua quædā alludentis naturæ dona hos mores adornarent: multo quippe rubore suffusa facies, flagrantibus oculi, subcrispa fuluâque cæsaries, & lato in pectore erecta ceruix, maximi Ducis speciem reddebant. Ipse porro vel planè puer tanta equorum ac armorum cupiditate erat incensus, ut aliquanto maturius quàm ætas ferre posset, thoracatus galeatusque ludicra certamina equestresque ludos inter puberes agitare: querereturque admirante Othone, tanquam par obeundis militiæ laboribus, quòd adhuc neque patris castra, neque hostium aciem vidisset. Ab hac indole nouum quotidie maturæ virtutis specimè præbēs, per omnes



bellici muneris ordines pluribus aditis superatisque periculis decurrit, sic ut in dies ab insigni aliquo facinore laude cumulus patri, pariter ac militi charior evaderet. Facile enim accidit impigro iuveni, ut multis expeditionibus exerceretur, quod ea tempestate nullum bello vacuum, aut ab hoste propinquo otiosum tempus esset, vigentibus odiis inter factiones ciuitates, ac ob id rediuiuis Turrianorum studiis, quibus Guelpharum partium duces nitebantur. Ceterum ei ad præalta contendenti, quum sæpe egregii militis & strenui equitum præfecti nomen tulisset, summus honos militaris imperii deerat: sed fortuna ad id maturè ianuam aperuit. Quum enim ex prætura Nouariam obtineret, repentina Guelphorum cōiuratione expulsus, summa celeritate coacto exercitu aduersarios profligauit, confugientesque Mortariam, magna vi expugnato oppido, penitus deleuit, tanto terrore hostibus illato, ut Matthæo patre dux acrior atque felicior crederetur. Nec multo post patre, Alberti Scoti perfidia Mediolano eiecto, eandem exilii fortunam sequutus, in maxima pericula se coniecit, quum senem inuicto animo irrita arma circumferentem, minimè deferendum arbitraretur. Sed patre demum fractis opibus animum despondente, in ulteriore Galliam transiuit, fortèmq; operam aduersus Britannos nauans, à Carolo Philippi Regis patre, militari baltheo donatus est, quod est equestris dignitatis insigne maxime decorum, ubi spectato in acie facinore edito, imperatoris iudicio paratur. Inde autem in Italiam reuersus, eo bello quo Pelagura Cardinalis oppugnata Ferraria, Atestini Actii opes maxime con-

F.iii.



ruderat, multis inusitata virtutis operibus æditi, vehementer inclaruit. Constat enim vno prælio per multas horas crescentibus vtrunque subsidiis sapius instaurato, tres equos acerrimè depugnâti fuisse suffossos: eumque postremò quum vexilliferum adacto per inguen mucrone ab ephippio deturbasset, insiliisse in equum prostrati hostis, atque ita impetu facto, perruptaque aduersa acie ad suos, cum suo tum alieno cruore oblitum rediisse: summa enim pericula, vt inde claresceret, extorris & exul facile cõtemnebat. Erat etiam Actio summa propinquitate coniunctus, vt vel hinc ostendendæ virtutis studio vehementer accenderetur: nam Beatricem eius sororem in matrimonio habebat, suscepératque ex ea biennio antè, qui de nomine auunculi Actius, summæ postea virtutis Princeps, appellatus est. Hæc Beatrix præstanti quidè forma, sed nouem annis Galeacio maior, antea nupserat Nino Pisano Galluræ in Sardinia Regulo, antiqua stirpe & multis diuitiis claro: ex eoque gentam nubilem puellam Mediolanum adduxerat, vt ludis nuptialibus interesset, qui Regio sumptu æditi, totius Italiæ vrbes inusitata magnificentiæ fama compleuerunt. Nam præter simulachra certaminum, & castellorum expugnationes quæ armatis cohortibus & turmis inter se cõcurrentibus ædebantur, publici epuli apparatus & matronarum saltationes, qui ad spectacula conuenerant vehementer admirati sunt. Mille siquidem per tres classes discumbentibus conuiuiis singulæ vestes cum sericæ aureæque, tum lanæ coccineæ aut acu pictæ dono datæ sunt: Burra socru eas miro ordine, eruditòque iudicio sublatis mensis



distribuere. Tot verò nouæ nuptæ collata munera gē-  
marum atq; monilium, cælatique argenti & purpuræ  
textilis, à legatis sociarum urbium Patritiisque ciui-  
bus, vt opulentissimorum regum diuitiis æquarētur.  
Et hercle vel hinc mirari iuuat tam malignū, quàm  
postea falsum Danthis poetæ iudicium, quum ex hoc  
coniugio Viperam Gallura inferiorem putarit. Cæ-  
terum Galeacius confirmatis Actii opibus, Taruisii  
Præturā obtinuit à Gerardo Caminate eius vrbis do-  
mino, cui ex Beatrice priuigna nupserat. gessit autem  
eum honorem summa cum dignitate, ita vt nulla in  
re exulis vultum præferret, profitereturque se breui  
ad veteris fortunæ imperium rediturum. Nec id vo-  
tum diu fefellit, Henrici Cæsaris aduentu, quo diffi-  
dentium inter se Tyrannorum opes vehemēti ruina  
prostrata sunt. Aderat Matthæo patri Galeacius ex pa-  
terno consilio vti oporteret arma expediens, & felici  
virtute semper dimicans: nam paternis auspiciis ad-  
uersæ factionis vires attriuerat, Ducēsque belli, & Guel-  
phi nominis Principes in potestatem redegerat. Qui-  
bus sublatis, singulæ Cispalinæ Galliæ vrbes ad Ma-  
gni Matthæi auctoritatem se contulerant. Ipse quo-  
que proprio vtens consilio, & suis subnixus copiis,  
quum ad augendam potentiam per se bella gereret,  
Guelphis formidandus esse cœperat, vel ob id quòd  
Placentiam, Alberto Scoto vetere patris proditore ar-  
mis eiecto captoque, suæ ditionis fecisset: nec multū  
inde Iacobo Caualcaboue Cremonensium Tyranno,  
ad Bardum vicū acie profligato atque interfecto, Cre-  
monā valida classe, & magnis copiis circumuallatam,  
ferroq; demum & fame perdomitam subegisset. Nec

F.iiii.



minore virtutis fama Marcus frater à patre rei Ligusticæ præpositus, aduersus Robertum Regem bellum gerebat : & Luchinus bellica laude nulli fratrum inferior, Guelphoque nomini vehementer infensus, in præcipuo terrore erat, quòd ab eo ad Tanari pontem, Vgo Baucius Roberti Regis equitum magister commisso prælio victus atque interfectus extitisset. Quibus de causis Guelphi nominis Principes admonebatur, vt accisis in Etruria partium viribus, & tum in Cisalpina Gallia maxime profligatis, maiora præsidia compararent, quibus Matthæi potentia obuiam iretur. Itaque renouatis inter se fœderibus, Pontifex, Robertus, & Florentini peritos rei militaris duces, & validas bellicosarum gentium copias è Narbonensi prouincia, Burgūdis scilicet Allobrogibus ac Heluetiis, in Italiam adduxerunt, vsque adeo ingenti studio sumptūque, vt transmissa grandi pecunia, Henricum Austrium designati Cæsaris fratrem è Germania, & è Gallia Philippū Valesium qui postea Rex fuit, aduersus Vicecomites in Italiam euocarint. Sed Germanos Matthæus multa largitione demum auertit : Gallos verò Galeacius & Marcus ostentato exercitu ita terruerunt, vt facile demum humanitate & multis muneribus victi, ex colloquio trans Alpes nusquā districtis gladiis redierint. Descenderat Philippus ingenti cursu ad Sesithem amnem præter Vercellas, iuuenili quodam vigore animi hostem contemnens, nec ob id sociorum auxilia expectans : ita vt in insidias præceps datus esse videretur, nisi Galeacius paternæ grauitatis æmulus, vel in multa spe exploratæ victoriæ, à conferenda pugna, inuito etiam fratre collega



temperasset. Nolebat enim validam atque propinquā gentem, nulla propē de causa nullōque odio, sed leui admodum bellicosæ iuuentutis alacritate ad bellum excitam, ipsūmq; præsertim regium sanguinem inexpiabili iniuria afficere: vti esset necesse, si conferto prælio totius ferē Galliæ Nobilitatem profligari ac interfici contigisset. Impetrato siquidem colloquio, & per inducias ostentatis miro ordine vniuersis copiis quas vallatas castris eduxerat, facilē Gallorū proceribus demonstrauit, quā stultum & miserum foret, pro alieno commodo propriæ dignitatis & vitæ periculosam aleam subire. Nec vlla res Galeacii faciundo ore differentis fidem eleuabat, quum veteris beneficii memoriam præferret, quod à Carolo Rege balthei militaris honore fuisset honestatus: & tum produceret præter numerosum peditatum, quinque milia vtriusque armaturæ equitum, in quibus sexcentorū ferē nobilium cataphractorum ala, decore simul atque terribili coruscantium armorum cultu stupentes Gallos permouit, vt authore Ebrardo equitū Magistro, viro æquē prudenti ac strenuo, certam pacem potius quā anceps bellum percuperent. Cum hac enim ala Marcus Galeacii frater, cū specie ipsa excelsi corporis, tum sua feliciū præliorum fama inclytus, explicatis turmis decurrerat. Gestabant singuli equites in cono cassidis & in lacinia, Phrygii operis squamosam viperam, cruenti pueri crura dentato ore deuorantem. erat enim familiæ vetus insigne. Qua inusitata specie Gallos, vtpote non intellecto argumento, vehementer commotos fuisse, ideoque magnis muneribus excultos, vtili consilio potius quā



decoro, Villanus Florentinorum annalium scriptor in Galliam rediisse perscribit. Sed Matthæo patre vita functo grauiora demum Pontificis & Roberti Regis arma, conspirantiumque Patritiorum vim, ac Germani militis perfidiam summo cum discrimine salutis expertus est. In eo enim vetere decreto fœderati hostes permanferant, vt pulsus Principatu Matthæi liberis, res Mediolanensis sub inani libertatis nomine, Guelpharum partium auspiciis regeretur. Itaq; Leodrius & Garbagnatus atque Cribellus cum suo liuore ac odio perciti, tum honoris maximi & certæ potentia non dubia spe inflati, in id satagebant vt ciues deprauarent atque diducerent, Pontificiique legati nomine Germanos, diuisa inter eos pecunia, optimisque stipendiis propositis, ad defectionem impellerent. Primi omnium Rogerius & Anechinus Vindelici Centuriones, soluto pudore defecerunt: nec ciuitas per se instabilis dubitauit quin Germanorum exemplum sequeretur. Qua repentina veteranorum defectione circumuenti Galeacius & Marcus, quum atrociora timerent, Laudem Pompeiam ad Vistarios veteres amicos se receperunt. Eorum autem discessu ciuitas creatis ex vnaquaque tribu Decurionibus, libertatem arripuit. Cæterum immutatus in vrbe status hunc habuit euentum, vt factiosi ad arma excitati, duce quodam Burro, Guelpharum partium vexillum attolleret: admirantibusque primo, & mox non temere sibi metuentibus Gibellinis, tumultuosè per urbem deferrètur: Guelphi quoque ex Martiana Abduani agri regione, & Brigantinis montibus, Liciniforóque præsertim, Tignaca Parauicino duce, ho-



mine turbulento, Modoetiam occuparent. Id facinus Mediolanensis Reipublicæ Decuriones magnopere commouit, quod noui imperii maiestas seditiosorum temeritate sugillari contemniq̃ue videretur. Ipsos porro Gibellinos admonuit, vt armata præsidia compararent. Mittitur ergo Leodrisius cum exercitu, qui Modoetiam, si dicto audiens esse Tignaca nolit, admotis machinis expugnet. Nec mora Guelphis maiore pertinacia quàm vi resistentibus, Leodrisius disrupto muro ac excitatis ad prædam Germanis, opposita munimenta perrumpit: multisque caesis capitur Tignaca, oppidumq; diripitur. Hinc non obscure animaduersum est, non aliam ob causam Galeacium fratresque eius Mediolano expulsos fuisse, quàm vt Guelpharum partium dominatus induceretur. Nam veteres hostes semperque antea exules Turriani reuocabantur, & Legatus hominem natione Burgundum, quod esset à Turriana familia, vrbi præfecerat. Nec Germani, quanquam mercenarii milites, Roberti Regis atque Pontificis nomen Cæsaribus infensum, pacatis auribus accipiebant: & tum fortè stipendia à Legato Cardinale Regisq̃ue præfectis largissimè promissa, nequaquam liberali manu soluebantur. Quibus de rebus Germani Henrico Gruniftenio pernotabili duce concionante, sublatiis dextris Galeacium continuo reuocandum censent, decernuntque ad eum legatos summæ dignitatis Centuriones, qui condonata veniæ fidem accipiant, vt Rogerio & Anechino cæterisque recentis infidæ leuitatis authoribus caueretur. Gruniftenius enim virtutem, fidem, munificentiam, ac animi magnitudinē, quæ in Galeacio



spectabantur, eximiis laudibus extulerat, ita ut se vadem atque obsidem præstaret. Marcus quoque opportunè in urbem noctu regressus, Leodrisium inexpectata Guelphorum audacia perturbatum, animaduersoque periculo consilii sui non obscurè pœnitentem cum lachrymis exorarat, ut iure sanguinis ad familiæ salutem pariter ac dignitatem cum Galeacio in gratiam rediret, nec veteres Vicecomitum hostes ipsorum intestino malo latari pateretur. Itaque postridie Galeacius non secus ac si ex venatu suburbanòque secessu, non ab exilio domum rediret, læta ciuitate in urbem est reductus. Eius aduentu Garbagnatus & Cribellus ad Legatum arrepta fuga perfugerunt: Burgundusque Turrianus urbis præfectus cum Guliermo Ruramonte Regio legato pariter euasit. Sed nō multo post Pontificiæ Regiæque copiæ adiunctis Florentinorum auxiliis, & Pagano Turriano Aquilegiæ Patriarcha cum gentilibus suis ad id bellum euocato, ad Abduam contenderunt: eo cōsilio, ut superato amne, recta Mediolanum contenderent. Imperii militaris nomen erat penes Gastonem, Legati ex fratre nepotem. Cæterum Raimundus Cardonius Hispanus, Hêricusque Flandrius & Simon Turrianus clarissimi duces, gerendi belli munia susceperant: censebanturque in eorum exercitu quadraginta milia peditum, & decem milia galeatorum equitum, ex omnibus ferè Europæ gentibus mercede collecta. Vbi ad flumen peruentum est paulò supra Tritium, vado reperto cū primis equitum agminibus Garbagnatus & Cribellus transiuerunt. Tum verò Marcus qui ad id vadum aduolarat, ita primos vrgēdo cædendòque perturbauit,



vt ambo duces intercepti atque agniti, fauiente in eos Marco protinus interficerentur. Sed compulsis in amnem primis, Florentinorum turmæ eodem vado tranantes, quominus reliqui ad vnum interirent, maturè opem tulerunt. At Marcus acerbissimorum inimicorum cæde contentus, vti impar viribus, Mediolanum se recepit. Nec multo post ipse Marcus atque Luchinus cum hostibus ad Tricellā pagum, sexto ab vrbe lapide, dimidio minore, sed aliquanto promptiore exercitu freti, audacissimè insigni cruentoque prælio contenderunt, ad non dubiam hercle victoriā, nisi graue Luchini acceptum vulnus, incumbentis in obuersa iam planè hostium terga Marci impetum retardasset. Exinde hostes promotis ad Comensem portam castris, Mediolanum per aliquot menses obsederunt. Interim Galeacius à Ludouico Bauaro Cæsare auxilia equitum postulauit, venitque Mediolanum Bertoldus Guiffes cum quingētis galeatis equitibus: strenuèque id bellum aduersus obsidētes multis prosperis eruptionibus gestum est. Sed hostes quum vera vi nihil proficerēt, ad insidias versi Heluetiam cohortem multa pecunia corruerunt, vt quum in statione esset, Galeacius reuisens custodias interficeretur. Sed detecto scelesto consilio, primus omnium Ioannes, tametsi sacris erat initiatus, militari animo captis armis proditores adortus, conceptæ perfidiæ poenas dare coegit. Hic est ille qui Archiepiscopus Mediolanensis factus, secundissima eximiæ virtutis fama, maiorum suorum imperium latè propagauit & auxit. Post detectam & continuò vindicatam Heluetiorum coniurationem, Gastone morbo absumpto,



Cardonius & Flandrius desperata victoria, noctu, nec conclamatis quidem vasis, Modoetiam sese receperunt, noua item auxilia à Legato qui Placentiæ confederat, expectantes. Eam enim urbem Vergusius Landus, expulso ex infidiis Actio Galeacii filio, acceptaque pecunia Legato tradiderat. Propterea Cardonius & Flandrius Modoetiæ planè obseffi, ad Vaprium vicum Abduam ponte constrauerant, ut ab eo expeditus recipiendis commeatibus venturisque auxiliis transitus præberetur. At cognito hostium consilio, Galeacius eum pontem omnino sibi præcidendum statuit, coniectura iudicans, si eò properaret, nihil hostes cunctaturos, quin educto exercitu ad tuendum pontem conuolarent, & quam ipse omnibus artibus quærebat conferendæ pugnæ occasionem, non iniquo loco protinus aperirent: quòd in eius pontis beneficio, obtinendi commeatus & parandæ demum victoriæ spes omnis posita videretur. Nec Galeacium summæ prudentiæ ducem opinio fefellit. Cardonius enim è Modoetia prægressus Vaprium, quam hostis optabat nobili prælio facultatem præbuit. In dextro cornu ubi Burgundiones Belgæque erant, Henricus curabat: in læuo, Simon & Passarinus Turriani, Vergusius item Landus cum Florentinæ alæ ducibus curabant: mediam aciem tenuit ipse Cardonius, Gotholanis & Narbonensibus atque Apulis turmis septus. Peditatum omnem qui ex Italis & trāsalpinis gentibus constabat, ita diuiserant, ut inualidis strenui ac inermibus loricati miscerentur. Cæterum Cardonio copias ex Vaprio in patentem campū educte, instruentæque acies Galeacio, à diuersa parte



vacuum ab hoste vicum inuadi atque incendi protinus iussit : quo incendio auersus hostis adeo perturbatus est, vt respectare & de insidiis intestinaque perfidia dubitare cogeretur, quum ex aduerso vexilla Aquilis Viperisque fulgentia pleno passu appropinquare conspiceret. Nec mora Galeacius & Marcus hostem sarcinas suas ac impedimenta ingenti incendio pereuntia deplorantem, vtrinque inuadunt. Marco primam aciem perumpente, Flandrius aliquandiu restitit : sed eo strato, tota eius acies fusa profligataque est. Nec ab altero cornu Galeacii impetum Turrianæ Florentinæque alæ diu tulerunt, ita vt media acies à Gaudentio Marliano (is nobilis & vetus miles & dux impiger peditatui præerat) recta fronte loco mota, turbatis ordinibus in fugam verteretur : & Cardonius ad primum incursum magno à sagittariis & mox ab irruentibus cataphractis detrimento accepto, quod flamma deflagrantis vici receptum eriperent, & in vtrunque latus victores fratres vehementer inuherentur, & præaltus amnis ex fuga vadū tentantes primis vorticibus absorberet, viuis in potestatem hostium deuenit : Præfecti Florentinæ alæ pariter capti. Simon Turrianus Guidone patre qui Mediolani imperium tenuerat genitus interiit. Sed ex minoribus ducibus promptissimus quisque aut occubuit, aut in manus hostium deuenit. Vexilla quoque maiora Roberti Regis, atque Pontificis, & Florentinorum Turrianorumque relata sunt. Vnus ferè Henricus Flandrius à Germano equite captus, temerèque dimissus, quum pedes exutis armis totam noctem per sylvas errabundus effugisset, prima luce Modoetiam peruenit, quo Vergusius



ex merito extremi supplicii poenā timēs, quòd Actiū Placētia pepulisset, ab initio aduersæ pugnae, cum reliquis profligati exercitus perfugerat. Ab his Ducibus instauratum est bellum, & Modoetia per aliquot menses fortiter defensa: sed magnis demum operibus circunvallatam oppugnatamque acriter, Vergusius ea conditione dedit, ut nisi iustis auxiliis à Legato missis obsidio solueretur, ipse cum praesidio saluis rebus exiret. Iam enim Flandrius desperatis auxiliis noctu ex oppido profugerat, & Passarinus Turrianus quum opē obsessis afferre maturaret, à Marco ad Tiniosam turrē equestri praelio fuerat profligatus: quū paulo antè & ipse eadem usus belli fortuna, Narbonē fium equitum manum, ad Caracam supra Lambrum negligenter excubantē, oppressisset. Sed tantis hostiū copiis aut ferro aut pestilentia deletis, victor Galeacius praecellenti iudicio vir, sibi omnino pacē parandā esse constituit, quòd inexhaustis rediuiuisq; potētissimorum hostium opibus se imparem cerneret, saepeque dimicando vires experiri, ac instabilem fortunā toties laceffere periculosum arbitraretur. Erat in custodia Raimundus Cardonius dux hostium, vir solerti grauique ingenio praeditus: hunc idoneū existimans per quem à Pontifice pacem peteret, carcere liberaliter emisit, usque adeo egregiè simulata fuga, ut duo ex intimis familiaribus insigni nobilitate iuuenes Becalcus Landrianus & Phoebus Cōtes, elabentē secuti prodidisse custodiam putarētur, singulari quidem cum infamia & summo cū dolore propinquorū, quum Galeacius eos tanquā admissi sceleris reos per praconē exilio multauisset. At Hispanus (vti generosum



nerosum decebat) syncera fide causam egit, Placentia primò apud Legatum, & mox Auenionem contendens, apud Pontificem, Landriano & Phœbo arbitris, & peculiari oratione prolatisque mandatis suppliciter pacem petentibus. Nec abnuuit Pontifex, quòd eā Cardonius omnino vtilem fore differebat, videreturque ex commodo dignitatēque Pontificii nominis, si Christiana benignitate clementiāque inductus, eos in clientelam fidemque reciperet, qui ab eximia virtute diis & Fortunæ cordi essent, & vti bellis omnibus inuicti, non temerè ab his qui virium periculum fecissent, insuperabiles crederentur. Petebat autem Pontifex ex consilio Roberti Regis, qui super ea re consultus fuerat, vt postquam Galeacius conuerso studio amicum fidelēque clientē Romani Pōtificis se fore profiteretur, etiam gerendo bello focius esse eosdēque hostes habere vellet. Sed is vnum Cæsarem beneficiariosque eius excipiens, adduci non potuit vt quicquam polliceretur, quod familiæ suæ antiquissimo studio indignum cēseri posset. Cæterum eo modo confecta pace, Cardonius iterum magnis exercitiibus à Pontifice Robertoque Rege præfectus est, postulantibus eum Florentinis, qui à Castruccio vehementer exagitati, veteribus innixi studiis Guelpharum partium nomen magnis opibus tuebantur. Itaque Cardonius ab ostio Rhodani triremibus Telamonem deuectus, Florentiæ militaris imperii sceptrum solennēque vexillum accepit, & contra Castruccium ad Phocesium paludes castrametatus est. Phœbus autem & Landrianus ab eo humaniter dimissi ad Galeacium contenderunt, quibus protinus pristinae famæ

G.i.



decus restituit: quanquam confecti negotii arcana tū minimè nudanda viderentur. Eos enim non obscure de se benemeritos liberali gratoque animo tota ea simulata perfidia suspicione liberandos existimabat, qui nihil subeūda infamiae nomen veriti, modò iussis fideli obsequio parerent, periculosi officii munus impleuissent. Nec demum Galeacius vel Castruccio, sibi priuato publicoque nomine coniunctissimo, vel ipsis Etruriae Gibellinis defuit, quin maturè transmissis auxiliis opem ferret. Actius enim filius per Apuanos Ligures Lucam descendere iussus cum septingentis cataphractis equitibus magna ex parte Germanis, ad Castruccium in castra peruenit, usque adeo opportunè atque feliciter, ut commissa ad Altopassum nobili pugna, Cardonius iterum caperetur, & Florentinorum vexilla cum legatis & ducibus, caeso profligatoque toto exercitu, in Castruccii potestatem deuenirent. Caterum Galeacius, qui tantos coniuratum hostium exercitus, totq; vario euentu commissis praeliis, & parta demum memorabili victoria, inuicto animo superauit, postremò vel vndique victor & felix, propinquorum insidias effugere non potuit. Leodrius enim & antè aduersus Matthæum, & nuper perfidiosa malignitate infamis, ac ideo semper inquietus, ex interuallo, ut plerunque accidit, validior ad insaniam redierat, adauctoque scelere Marcum Galeacii fratrem facilè deprauarat, plenum quidem bellica laude, sed ob id multa superbia multaque occulti liuoris bile redundantem. Hic ingenii captu supra aequū turbidus & ferox, tanquam periculorum omnium socius, & totius victoriae praclarus adiutor, fratrem re-



rum dominum ferre non poterat vel natu maximū,  
 & prudentiæ authoritate potiozem. Et quum regnū  
 duos non caperet, quibus modis id assequeretur vio-  
 lentus & vecors agitabat. Præbuit autem occasionem  
 maturando flagitio Ludouici Bauari Cæsaris aduen-  
 tus, qui euocante Galeacio vt Pontificis Robertique  
 Regis & Florentinorum adauctæ potentia obuiā ire-  
 tur, Veronam peruenerat. Itaq; Marcus & Leodrisius  
 officii simulatione Cæsari obuiam eūtes, Veronæ Ga-  
 leacium multis oneratum calumniis, maiestatis reū  
 fecerunt, conueniente ad id scelus Cane Scaligero,  
 qui ex aliena discordia turbatis rebus obuenturā sibi  
 commoda vir utique astutus ac ambitiosus expecta-  
 bat. Cæterum Cæsari à Marco & Leodrisio per Camo-  
 nicos tramites Comū perducto, Galeacius affuit or-  
 natissimo comitatu Cæsarem æquans, donaque affe-  
 rens nouo nec admodum opulenter instructo Cæsa-  
 ri gratissima. Ibi de fraternis infidiis certius didicit,  
 Franchinūque Ruscam Comensium Tyrannum ab  
 se Scaligeri Canis exemplo diductum sensit. Accusa-  
 batur atrociter quòd importuna parandæ pacis cupi-  
 ditate adductus, Gibellinarum partium graui damno  
 cum Pontifice transsegisset, Cardonio præsertim tan-  
 to duce periniqua plenāque perfidiæ simulatione ho-  
 stibus restituto : & Mediolani sublata libertate, pro-  
 pinquis amicisque veteribus planè contemptis, im-  
 potenter superbēque regnaret. His quoque summæ  
 offensionis criminationes addiderant, quibus diluen-  
 dis quum vehementer æstualet, graui admodum vo-  
 ce dixisse fertur, Dum me Marcus frater impiè ferit,  
 sese temere consauciat. Id verò deferentibus amicis

G.ii.



audiens Marcus, acutè respondit, De hoc quid in fati-  
futurum sit Galeacius viderit, qui ædepol fratrem nō  
habet, quum solus regnet. Sed eam disceptationem  
Cæsar distulit, Comoque profectus per Modoetiā Me-  
diolanū peruenit, quo Galeacius præcesserat, ut quæ  
ad solennis pompæ ornatum & lautitiam pertinebāt,  
magnificè atq; celeriter appararet. Itaq; liberali sum-  
ptu & planè regio splendore Cæsar exceptus est, & Ca-  
lendis demū Iuniis in templo Diui Ambrosii ferreo  
diademate coronatus, tradēte insignia Guidone Tar-  
lao Aretinorum Antistite. Is in Italia Gibellinarum  
partium principē agebat. Interfuit & ipse Canis Sca-  
liger, qui mille equites galeatos & delectorum pedi-  
tum aliquot cohortes, ad ornandum augendūque  
Cæsaris comitatum adduxerat, ut studium suum er-  
ga Cæsarem ostentaret. Hic præalta ambitione incē-  
sus, oblata ingenti pecunia, petebat à Cæsare, ut Me-  
diolani Augustali iure princeps diceretur: magno si-  
quidem astu apud procures Germanorum, Galeacium  
vel nullo certo indicio maiestatis reum, nec adhuc ad  
dicendum causam ad tribunal Cæsaris vocatū, mali-  
gno infamique iudicio prædamnabat. Sed Cæsar gra-  
ui admodum ancipitis consilii suspensus cura, quid  
sibi decernendum foret minimè statuebat. Ita Scali-  
gero respondit, ut spem minimè præcideret, & præ-  
sentibus eius copiis ad patrandum facinus vteretur.  
Interea dabat operam ut Germanici sanguinis vetus  
miles perpetuis stipendiis & beneficiis Galeacio ob-  
strictus, vel ab ipsa Matthæi Magni Othonisque me-  
moriam fidē mutaret, nouūq; sibi, reiecto superiore,  
sacramentum diceret. æquum enim postulare vide-



batur, quum pro sua & Germanicæ gentis dignitate salutēque peteret, vt firmissimo consensu Aquilā Romani imperii signū respicere, idq; tueri, & se vadentē Romam sequi vellent: futurum enim esse vt maturē opima stipendia, & digna ipsorum fide virtutēq; præmia consequerentur. Nec mora Germanis graui scelerē, nisi id præsentia Cæsaris eleuaret, fidem occultē mutantibus, concilium solenne proceribus indicitur, vocatūque ad id Galeacius cum fratribus Actioque filio. Tum verò Marcus prodit, venenūque dirum domui sibi que demum lethale euomens, petit supplex vt æqui iuris libertatem ciuitati restituat, oppressam & planē extinctam inusitata tyrānide superbi fratris. Id si æquissimus Cæsar impetrari à miseris pateretur, Mediolanenses quantam oporteret in stipendium pecuniam præbituros, nec à fide ac amicitia Cæsarum vllō vnquam tempore discessuros. Aderat fortē persoluendi stipendii dies, nec eam pecuniā Galeacius exhausto iam planē ærario, cui per tres menses Cæsar auiditate insatiabili & grauis & importunus extiterat, nisi cunctanter expediebat, quam sine graui discrimine tanta oneratus calumnia imperare non poterat, Patritiis iam planē Marci & Leodrisii malignitate deprauatis, populōque per se cupido rerū nouarum, ad spem libertatis erecto. Cæterum Galeaciū generosa oratione obiecta crimina refellentem, nec talem omnino iniuriam veritum, ex cōposito Prætorii præfectus cum Luchino Ioannēque fratribus, Actioq; filio in proximum cubiculum deducit, quasi Cæsar remoto reo liberius loqui vellet. Sed iam captis Cæsar capitale supplicium comminatur, nisi triduo

G.iii.



Modoetianam arcem tradi iubeant . Id autem à forti fidelique custode vix multis cum lachrymis impetratum est. Quum in tanto coniugis periculo trepida Beatrix vxor Modoetiam peruolasset, missus est qui deditam arcem reciperet, nouumque praesidium imponeret Guido Tarlatus, biduoque post Nonis Iuliis Galeacius cum Actio filio, Luchinoque & Ioanne fratribus, in ea arce dura custodia traditur : non equidem omnino iniqua sorte, vt fabrefacti paulo ante ab setetri carceris furnum, ita à depressa testudine vocatum, primus experiretur, quem aduersarum partium captiuis ad poenam parauisset . Verum eam calamitatem vehementer adauxit custodia praefectus, è Norico Antius Rizaccus, ingenio ita immiti erga miseros tanta modo fortunae Principes, vt nec quotidianis muneribus emollitus, quicquam de inhumana feritate remitteret . Mirum porro dictum est quum rerum domini tantis muniti praesidiis dolo caperentur, neminem omnino se commouisse : pauci enim ex his qui aderat, id factum fenserunt. Quis hercle perpetuum ac acerrimum Caesariani nominis defensorem, ab ipso Caesare summis precibus in Italiam euocato excultoque tantis officiis atque muneribus, capi potuisse credidisset, & tum praesertim quum nulla in Caesare vel alienati animi, vel commutati vultus signa praecessissent: nec in damnato verius quam reo, ullus omnino metus ex conflata calumnia (si ingenuum concitati ac aestuantis animi ruborem demeres) conspiceretur? Sed potiundi auri dira cupiditas, quae in Ludouico profunda atque infinita demum apparuit, accusante Marco & immodica pollicente, vehementer excitata, &



veteris clientelæ & recentis officii, & hospitalis amicitia iura facile resoluit. Sequenti enim die astuto Cæsaris consilio, viri insignes viginti quatuor è singulis tribubus regendæ reipublicæ creati sunt ad imaginem antiquæ libertatis : sed imperata subinde est pecunia honorarii subsidii nomine, & ea quidem multo amplior quàm à Galeacio poposcisset. Nec multo post qui summæ rerum publicoque consilio & tutelæ vr-  
bis præesset, cum delecta manu Germanorum delectus est Guliermus Monfortius. His rebus Mediolani constitutis, Cæsar Vrceos Brixiani agri oppidum cōtendit, vbi concilium indixerat, euocatis vndique sociarum vrbiū tyrannis. Ibi ad leniendam invidiam atrocis facti, literas protulit concepti cum Pontifice foederis indices, captis (vt dicebat) Galeacii tabellariis interceptas: quas tamen pleriq; commentitias & falsas existimarunt, vt Villanus Florentinorum annalium eius ætatis scriptor, vel ex professo Vicecomitum nomini infensus, scriptum reliquit. Gibellinæ siquidem factionis principes, inexpectata Galeacii calamitate tanquam communi malo atq; periculo cōsternati, Cæsarem non obscure oderant, ingenio suspicaci ac sæuo maximèq; rapaci partium nervos atrocissimè conuellentem. Verum paucos post dies impetratis à Scaligero & Atestino Passarinòq; Mantuano equitum auxiliis, Romam iter intendens in Etruriā descendit. Pisani portas clausere, nec Cæsaris expilatis socias vrbes dicto audiētes futuri videbātur, nisi Castruccius, à quo Cæsar amicissimè receptus, pecuniāq; adiutus fuerat, nouo adiuncto exercitu Pisanis, nisi Cæsarem reciperet, extremas suburbanī agri cla-

G.iiii.



des denūtiasset. Cæterum Cæsar Pisanis pecunia multatis, ascitōque sibi Castruccio, via Aurelia quæ maritima dicitur, Romam contendit. Nec mora insigni studio Sarra Columnæ Iacobique Sabelli, in Vaticano coronatur, tradente diadema Petro Coruario, quē cœnobio eductum, Pontificiæque tiara exornatum, Nicolai quarti nomine Pontificem appellant, ut in vrbe Ioannis legitimi Pontificis autoritas aboleretur. Ludouicum enim Bauarum Ioannes, Roberto Regi fœdere coniunctus, tãquam Gibellinarum partium præcipuus hostis, Pseudocæsarem appellabat, ac anathemate persequabatur. Romanus quoque populus præsentem Pontificem colere, quàm venerari absentem malebat, vel ob id inuisum, quòd multis legationibus euocatus, Auenionem sacrosanctæ vrbi prætulisset. Dum hæc fierent, Castruccius quem antea Lucensium & Pistoriensium Lunensiumque ducem Cæsar appellarat, accumulatis honoribus, Senator Urbis, Comes Lateranus, & Cæsareæ Aquilæ vexillifer effectus est. In eo enim vno Cæsaris spes & opes sitæ erant, quoniam nemo eo vel acumine ingenii & consilii grauitate validior fuit: quum etiam cæteris eius ætatis ducibus, in tota gerendi belli fortuna felicior haberetur. Is maximis officiorum vinculis familiæ Vicecomitum obligatus, nullam prætermittebat occasionem quin Galeacium Cæsari commendaret, oraretque supplex, ne diutius Guelphos Romani imperii internecinos hostes præstantissimi viri calamitate lætari pateretur. Verum Cæsar, ne infontibus iniuriam temere fecisse videri posset, æquo durius respondebat, quanquam & Sarra & Sabelli maximæ au



thoritatis & gratiæ procerum continuæ preces adde-  
rentur: & Marcus admissi sceleris pœnitentia addu-  
ctus, castigante atq; exorante Castruccio à vetere diri-  
odii insania discessisset, peteretque excussis ingenuo  
pudore lachrymis, vt exutis imperio fratribus saltem  
cû libertate vita redderetur, quæ in eo carcere breuif-  
sima censi posset, nisi Cæsar clemetiæ nomine satis  
pœnarû eos pro vetere superbia, ex beatissimis factos  
mortaliû omniû miserrimos, dedisse existimaret. Dû  
Romæ tantis deprecationibus res ageretur, Castruc-  
cio nuntiatû est Florêtinos Pistorium urbem pauco-  
rum proditione in potestatem redegissee. Qua re vehe-  
menter perturbatus, nec obscure Cæsari succensens,  
quòd aliquanto grauior hostis Gibellino quàm Guel-  
pho nomini præposteris cõsiliis euasisset, abducto suo  
milite ad recuperandam amissam urbem magnis iti-  
neribus Lucam contendit. Eius viri discessu permo-  
tus Cæsar, quòd pecuniæ inopia premeretur, nec Ro-  
mani in ea expedienda præstò essent, & propinquæ Vr-  
bi ciuitates intestino bello laborarent, Robertiq; Re-  
gis exercitus ab Aquila Latioq; demum Romanis fi-  
nibus immineret, animi sententiã mutauit: perscri-  
ptisque literis Antio Rizacco Modoetianæ arcis cu-  
stodi, Guliermoque Monfortio Mediolanensi Reipu-  
blicæ præposito, Vicecomites custodia educi, pristi-  
næque libertati restitui iussit. Itaque Galeacius cum  
fratribus filioque, quum à Nonis Iuliis ad Sexto Ca-  
lendas Apriles in prædura custodia fuisset, incredibili  
veterum amicorum latitia, Modoetianorûque in-  
signi gratulatione liberatus est: ea conditione vt pro-  
ficiscenti ab Vrbe Cæsari, honoris causa Pisus occur-



rerent. Sed Galeacius curato corpore instructaque ad  
profectionem veterē familia, ac ascitis ex numero ve-  
teranorum lectissimis Cēturionibus, equitumq; Præ-  
fectis, nihil antiquius habuit quā ut ad Castrucciū,  
tanquam salutis partaque libertatis præcipuum au-  
thorem, ad agendas gratias communicandaque con-  
silia in Etruriam contenderet. Is tum Pistorium cir-  
cunvallatū præaltis aggeribus, graui obsidione pre-  
mebat: ita ut imitatus Cæsarem Dictatorem ad Ale-  
xiam, contento intra munitiones exercitu, vtrinque  
vallo fossaque munitus, eruptiones facile sustineret:  
nec exteriores hostium copiae, quanquam essent am-  
plissimæ, adoriri munitiones auderent. Ingētes enim  
balistas, quæ tum erant pro æneis tormentis, atq; item  
maiores scorpiones in æditis aggerum propugnacu-  
lis peritissimè collocarat. Is venientem Galeacium ar-  
ctissimè complexus, quod eum vnicè adamaret, ac in  
eo ex tot rebus militiæ fortiter atque feliciter gestis  
animi magnitudinem admiraretur, omnibus copiis  
ac absoluendis operibus præfecit, dum ipse ad expli-  
candas ararii difficultates Lucam profecturus, confe-  
cto ibi negotio in castra reuerteretur. Eo itaque non  
multos post dies reuerso, & munitiones mirificè adau-  
ctas laudante, ita inter se compararunt, ut Galeacius  
interiores munitiones aduersus erumpentes circum-  
positis nocturnis diurnisq; stationibus tueretur: ipse  
exteriores, obuertendo vrbi terga, cum multo maxi-  
ma copiarum parte defenderet. Nam Florentini du-  
ce Philippo Sanginetto Gallo, qui Pistorium ex insi-  
diis ceperat, ac Beltromone Baucio, qui erat Pontifi-  
ciorum equitum magister, supra numerosum pedita-



tum, septem milia galeatorum equitum in conspectum obsessæ urbis adduxerant, assiduo tubarum clangore Castruccium ad pugnam prouocantes, quod subire aggeres eosque ultro percurrere conari, à peritissimis eius ætatis ducibus defensos, stultum & luctuosum fore existimabant. Nec multo post Florentini inde copias in Pisanum & Lucensem agrum vertentes, discesserunt, ut Castruccius suarum rerum incendiis permotus, Lucensibus opem ferre cogeretur. Sed degeneris consilii conatum irridente Castruccio, ac itidem ignauiam exprobrante, Pistorienses animis conciderunt, ita ut mox desperatis rebus se dederent, ea conditione, ut nisi sociorum exercitus intra quintum diem aut iustam com meatu copiam inferret, aut praelii fortunam experiretur, ipsi continuo vita incolumi saluoque presidio portas aperirent. Dum hæc ageretur, vehemens atque lethalis morbus Galeacium inuasit, exustum scilicet Augusti solibus, perpetuisque laboribus ex diuturna obsidione fatigatum. Nihil autem de sano impetu febre remittente, ut commodius opportuna remedia pararentur, ad Pisciam oppidum lectica delatus est. Ibi cum triduo post absumpsit morbus, quum impleisset alterum & quinquagesimum ætatis annum. Videri hercle potuit infelix, ex tanta utique fortuna collapsus, nisi viro ad victorias nato, vel exuli, in ipsa victoria mori contigisset. Funeratus est Lucæ miro studio in eum supremos honores conferente Castruccio. Tumulum autem hoc epigrammate poeta eo rudi sæculo non infusus, honestauit,

*Hic iacet in parua (maiori dignus at) Vrba,  
Sanguinis Anguigeri Galeæ & gloria belli.*



*Magnanimus, contemptor opum, formæque decorus.  
 Extulit hunc virtus, mala fors mox fortiter vrsit,  
 Quam rursus vincens, simul & virtute refringens,  
 Victor decedit, felix & in astra recedit.*

Nec ipse quoque Castrucci diu victoriæ suæ gloriæque superfuit. Ingruente enim pestilenti autumnno ex hisdem Pistoriensis belli laboribus accersita febre, intra vigesimum diem Galeacii fatum est cōsequutus: vir haud dubiè antiquis ducibus bellica virtute comparandus, nisi tyranni nomen ex atrocibus factis inuidiæ expositum, vel præcellentis virtutis famam facile prægrauaret. Excessit è vita tribus annis Galeacio minor, ita vt ad consummati Imperatoris existimationē, nisi præmatura fata vitæ cursum præcidissent, Etruscis periuicturus esse crederetur. Quancquā Machiauellus Florétinus, improbè corrupta historiarum fide, in eum præferocem patriæ hostem impudentissimè iocatus, dum eius vitam commentitiè lasciueq; contra veritatem ad risum nausæamque perscriberet, id vnum malignè cōtenderit, vt Nicolai Tegrini Lucensis syncerissimè cuncta de Castruccio Latine enarrantis, spectata authoritas interposito mendacio apud posteros eleuaretur.





Actius egregii artificis manu depictus in templo Di-  
 ui Gothardi ad læuam introeuntibus conspicitur.  
 Videmus etiam parem eius effigiem in templo Di-  
 ui Marci, extra Beatricem portam. Sed statua exi-  
 miæ cælaturæ ex Lunensi marmore sepulchro im-  
 posita, depictæ similitudinem exactè reddit.





Actius vigore bellico & præalto constā-  
tis ingenii spiritu patri Galeacio faci-  
lè par, efficaci verò prudentia & lon-  
ga infracti animi fortitudine auo Mar-  
thæo persimilis, collapsam familiæ for-  
tunam admirabili virtute restituit: tanta quoque fe-  
licitate, vt recuperato dominatu, imperii fines paucis  
annis protulerit. Sed ab initio multa ei aduersa obue-  
nere: nam in exilio natus & educatus, pueritiā simul  
& adolescentiam nulla certa cum laude transegit. Po-  
stremò iam planè vir Placentiæ in præsidio à patre re-  
lictus, quum is perditis propè rebus opem ferens, Me-  
diolanum conuolasset, eam urbem tantis laboribus  
partam, vnius horæ momento infelicitè amisit, oc-  
cupante Vergusio Landa, qui valida Legati Cardinalis  
ala equitum & magna exulum manu fretus, irrupe-  
rat, vitatis quidè diuerso itinere Actianis copiis, quæ  
aduersus aduentantem exierant. Tanta porro irrum-  
pentis Vergusii celeritas fuit, vt Actius breue ad fugā  
spatium nactus, ægrè hostium manus euaserit, adiu-  
uante præsertim matre, quæ tam subito quàm saluta-  
ri cōsilio, effusis in limine domus aureæ monetæ fac-  
culis, intrantes, statimque auidè sparsam pecuniā col-  
ligentes, aliquandiu morata fuerat. Erat Vergusius vir  
bello acer, sed ab ingenio maximè turbido semper  
inquietus: qui tametsi Gibellinæ factionis erat prin-  
ceps, commutata voluntate ad Legatum perfugerat,  
quòd Galeacius vxoris eius pudiciā procacius quàm  
deceret, pertentasset. Verum Actius collectis copiis



fuis, & Ferrariensium Mātuanorūque opibus adiu-  
tus, Sancti Domini oppidum in potestatem redegit,  
accuratēque bellicis operibus permuniens aduersus  
hostes egregiē bellum gessit, vsque ad id tempus quo  
Galeacius post deuictum captūque Cardonium, &  
deletas eius copias, Modoetiāq; receptam, Castruc-  
cio opem imploranti auxilia in Etruriam transmi-  
sit. Florentini enim nouas equitum alas ex vltiore  
Gallia mercede conduxerant, coniunctisq; Roberti  
Regis & Pontificis copiis, Cardonium qui nuper di-  
missus à Galeacio ad Pontificem peruenerat, inge-  
ntis exercitus imperatorem effecerant, ita vt Castruc-  
cius sibi timere & maturam opem à sociis, Galeacioq;  
imprimis & Passarino Mantuano Caneque Scaligero  
implorare cogeretur. Quamobrem coactis iam auxi-  
liis Actium parantem sibi iter ad Apenninum, vt in  
Etruriam transcenderet, in Sancti Domini oppido  
alia atque alia Florentinorum & Legati copia vehe-  
menter obsederant, vt deiectus spe auxiliorum Ca-  
struccius, priusquam succurri posset, à Cardonio circa  
Focensium paludes opprimeretur. Sed magno cum  
dedecore obsidentium illatus est in oppidum com-  
meatus, & recentes demum cohortes & sociorū equi-  
tes intrarunt, Actiusque eductis signis detrectate cer-  
tamen hoste, cum octingentis galeatis equitibus per  
Apuanos Ligures ad Castruccium contendit, vsque  
adeo opportunē, vt quum collatis castris praelium dif-  
ferri minimē posset, Castruccius eius aduentu ma-  
gnopere lataretur, & Cardonius triste omen accipe-  
ret, quum fatales sibi vyperas in vexillis aspexisset. Tū  
quoque latū de ea victoria augurium Actio obuenerat,



ficuti à Francisco Petrarca his verbis scriptum legimus: Actius Vicecomes, qui postea Mediolani dominium obtinuit, iuuenis nempe victoriosus antequam à podagris vinceretur, iussu patris profectus cum exercitu Apéninum transiit, & victis hostibus apud Altopassum, duce quidem Castruccio, sed egregia opera eius adiuto, ad vincendum Bononienses pari impetu fortunâq; se conuertit. In ea expeditione, quum fortè equo descendens requiescit, ingens vipera nullo comite aduertente in galeam iuxta positâ irrepfit, quam quum mox capiti reponeret, sinuoso quidem & horribili, sed prorsus innocuo lapsu per decoras interriti ducis genas illa descendit. Eam à nemine lædi passus animosus adolescens, ad omen geminæ victoriæ traxit, hinc præcipuè quòd ipse pro signo bellico vipera vteretur. Nec multo post cõmissa est ea nobilis pugna ad Altopassum, in qua victor Castruccius præclara virtute Actii feliciter adiutus, vniuersas hostium copias deleuit, captis fermè omnibus ducibus, ipsôq; præsertim Cardonio imperatore cum filio in potestatem redactò, & direptis castris. Quibus captiuis & spoliis aliquanto post splendidissimum Romano more triumphũ adornauit. Qua in pompa ducti ante currum Cardonius Vrlimbacâque Germanus, & Guliermus Narseius Gallus, & plerique illustres Gotholani & Narbonenses equitum præfecti cum legatis Florentinis, gratissimum Lucensi populo spectaculum præbuerunt. Sed Castruccius statim ab Altopasso victoria vtendum ratus, victrices copias Florentiæ mœnibus admouit, suburbanas delicias in oculis hostium crudeliter euastans, & pleraque ædificia incendens. In ea expedi-



expeditione Actius Florentinis è muro spectantibus, ludos equestres in Arni insula edidit, proposito ad præmium velo serico purpurei coloris, vt reddito cōtumeliæ talione Florentinis illuderet, qui similes decursiones Mediolano obsessio ante Comēsem portam iactanter ediderant. Inde verò Actius spoliōrū parte magnificè donatus, Etruriæ finibus excedens, in Mutinensi agro Passarini Mantuani Atestinique Ferrariensis copiis se coniunxit aduersus Bononiensium exercitū, Legati auspiciis Mutinæ Rhegiōque imminentem. Nec multo post circa Scultemnam profligatis hostium copiis, alteram Etruscæ penè parem victoriam est consecutus: atque inde ad patrem geminata cum laude Mediolanum contendit. Insecutus est demum annus, diro Ludouici Bauari Cæsaris aduentu, Vicecomitum familiæ & toti penè Italiæ infestus, quo Actius eādē quam pater patruique indignè subierunt, carceris fortunam tulit. Cæterum expiata inuidia cum patre patruisque libertati restitutus, quanquam immaturo Galeacii patris interitu, ac importuna Castrucci morte plurimum angere-tur, accisāsque spes propè omnes noua ac inopinata calamitate cōspiceret: nihil tamen (vti Magni Matthæi nepotem decebat) sese animo demisit, quin ad fortunam pertinaci virtute subleuandam, cuncta experiretur. Summa consilii hæc fuit, vt datæ fidei nō deesset, ab vnōq; Cæsare à quo vulnus acceperat, præsentis remedii opem suppliciter peteret, postquam Marcus patruus infami suo consilio deceptus, perosusque non obscure Cæsarem, decus Imperii, Gibellini que nominis opes, vel parua ab hostibus accepta

H.i.



pecunia passim euertentem, ad sanitatem rediisset. Eo enim deprecante Cæsar post subirati Castrucci ab Roma discessum, custoditis fratribus libertatem concesserat, territus utique aduersarum partium secundis successibus, & non obscuro conscientia pudore vehementer timens ne socii clientisque deficerent. Itaque Actius cum Ioanne patruo ad Cæsarem Pisas profectus, post multa colloquia, egregiè nauante operam Marco, Cæsaris animum inflexit, promissaque pecunia ad summam quindecim myriadam, ut paterni imperii Princeps appellaretur impetrauit. Erat enim tum Cæsar multis aduersis rebus, & super hæc, extrema pecuniæ inopia circumuentus. Roberti enim Regis copiæ Bertoldo Vrsino duce, Cæsarianos præfectos vrbe Roma expulerant. Ioannis Pontificis autoritas studio Iacobi Columnæ apud populum vigeat: Gibellinorum studia magna ex parte refrixerant, quod Syluestrum Gattum Viterbii partium principem indignè torsisset, ut eius pecuniis, quæ ingentes esse dicebantur, summa cum iniuria potiretur. Sed Cæsare grauis metus incefferat, quod Germani Saxones & Chati, validissima pars exercitus, consternati animis & stipendia debita flagitantes, à Vindelicis & Sueuis secesserant, cum quibus antea apud Velitras ex cruenta seditione armis contendissent: & tum fortè renouato odio, spretoque Cæsaris imperio, Pisanorum & Lucensium agros impune prædabatur, castrisque demum in Cæruleo monte positus (qui supra Viuinaiam iampridem à Castruccio permunitus, ad agendam prædam magnas habet opportunitates) eo terroris & foedæ calamitatis circuniectam regionem ad-



duxerant, vt incolæ, incendiorum metu, commeatû, vestem, & castrensia instrumenta conferre cogerentur. Nam paulo antè in Lucensi Camaioris oppidi incolas, quòd irrumpentibus aliquandiu restitissent, direpto incensòq; oppido crudelissimè trucidarant. Timebat quoque Cæsar, ne ea manus quæ octingentis armatis equitibus constabat, vt pote quæ nullo pudore defecisset, tanquam planè venalis ad Florétinos opima stipendia pollicentes deficeret. Quibus de causis faciliè cum Cæsare transactum est, vt Marcus ad Saxones mitteretur: is Actianæ pecuniæ dimidiâ partem ex præteritis stipendiis à Cæsare debitam promitteret: interim apud eos datæ fidei obses foret: altera pars Cæsaris procuratoribus Mediolani certis pensionibus numeraretur. Non abnuit conditione Marcus, vt prioris maleficii inuidiam nouo officii genere deliniret: auidèque à Saxonibus tantæ pecuniæ vades receptus est. Addidit quoque Cæsar perscriptis obsignatisque codicillis nouum munus, vt magis ac magis Vicecomites sibi obstringerentur, quum veteres iniurias accumulatis beneficiis expiandas existimaret. Ioannes enim Actii patruus à pseudopōtifice Nicolao, suffragante Cæsare, in Senatu Cardinalis effectus est: sed vir ille summæ grauitatis atque prudentiæ gratias agēs, beneficiū quidè agnouit, ne spernere videretur, verum vsu purpuræ galeriq; honore semper abstinuit, nō obscure in gratiā Ioānis legitimi Pōtificis, insigni quidè ipsius cum laude commodòq;: nā ei episcopatum Nouariensem postea contulit: quo permutato demum cum Aycardo Camedoio, Mediolanēsis Archiepiscopus effectus est. Actius & Ioan-

H.ii.



nes Pisis profecti, diplomata Cæsaris Modoetiam detulerunt, quòd eos Guliermus Mõfortius liuoris plenus, magnis obuiam euntium ciuium gratulationibus passim exceptos, Mediolano recipere noluisset: sed eius cunctationem præbita pecunia celeriter resoluit: atque ita Monfortius dolore amissæ præfecturæ percitus, in Germaniam reuersus est. Exinde Actius à veteribus amicis clientibusque, & ex publico ciuitatis ærario pecuniam mutuò sumpsit, vt præsentì Cæsaris procuratori solueretur. Is erat Cõradus cognomento Porcarius, rapaci ingenio, togatus miles, ac ob id facilè fidei pudorìque pecuniæ lucrum anteponēs. Accepta siquidem quarta ferè promissæ totius pecuniæ parte, in Germaniam perfugere, quàm ad Cæsarem reuerti maluit. Eius potiundæ pecuniæ spe deiectus Cæsar, exacerbatisque propterea Saxonibus, efferrato animo vt vndique corraderet pecuniam, graue auri pondus Pisanis imperat: Raimundum Cardoniũ auro se redimentem, pretiòque nobiles aliquot Florentinos è custodia educit: Castrucci vxori pretiosa mundi muliebris ornamenta aufert: Castrucci filios Pifarum dominatu spoliatos Luca extrudit, & Francisco Interminello, accepta ab eo grandi pecunia, vrbis principatum adiudicat: Pisisque discedēs Mediolanum contendit. At Mediolanenses immanis auaritiæ Tyrannum se recepturos negant. Eo modo exclusus, ad Modoetiam iter vertit. Id oppidum Actii præsidio tenebatur: quamobrem oppidani fortunìs suis Mediolanensium exemplo non temerè timentes, venienti portas occludunt: nec per arcem aditus in oppidum datur, quòd Lamber amnis intumuerat, & qui



vadum tentarent, profluente mergerentur. Eo modo Cæsar ludibrio habitus, quum infamis auaritiæ pœnas daret, Papiam deflexit, vbi ab Actio collata pecunia facile delinitus est. Nec multo post quum per focias vrbes prædabundo similis vagaretur, nec consiliis suis dignum Cæsaris nomine exitum reperiret, Gibelinis pariter & Guelphis odiosus, in Germaniam rediit. Interea Saxones in Monte caruleo Marcum audaci ingenio fortia quæstuosq; consilia, ac ob id grata militibus, explicatam, admiratione virtutis ex obfide captiuoque ducem sibi creauerunt. Is ante omnia Henricum & Valeranum Castrucci filios graui ingrati Cæsarini iniuria Luca pulsos, & in proximo exulantes, Germanis conciliat, & per eos occupandam Lucam consilium init. Ab his Augustæ arcis custodes, quod erant Germani veteres Castrucci milites, facile oblatis præmiis corrumpuntur, vt improuisus in urbem introitus paretur. Nec mora Marcus ad constitutam diem à Caruleo monte cum Saxonibus Lucam noctu peruiolat: vrbs capitur: Franciscus Interminellus à Cæsare ad Principatum euectus, profligato eius præsidio aduersa porta profugit: aduersæ factionis ciuium domus in prædam vertuntur: sedatoque mox tumultu per nouas acclamationes, Castrucci filiis paterna sedes restituitur. Tanta re feliciter patrata, ditatisq; militibus, Marcus fortuna vtendum ratus, cum Fatio Donoratici regulo, qui Pisana nobilitatis erat princeps, consilium suscepit restituendæ libertatis, vt Cæsariani præsidēs pellerentur. Nec voto defuit euectus. Marcus enim cum valida manu equitum Luca profectus, Pisis à Fatio recipitur: ingens prælium excitatur: cō-

H.iii.



cisóque ponte vetere, Cæsariani in vltiorem vrbis partem protruduntur. Libertatis nomen armati populi vocibus attollitur. Ipse Tarlatus Aretinus à Cæsare Pisis præfectus, vbi se à Saxonibus circumuentū suosq; profligatos videt, pontes occupatos expugnare conatus, cum ea præsidii manu quæ supererat, desperatis rebus vrbe excessit. Tum verò Pisani à Ioanne Pontifice interdicti sacris, expiari promeruerunt, quòd à Cæsare ab se damnato defecissent: traditúsque est consensu publico Nicolaus pseudopontifex, què discedens Cæsar Comiti Fatio commendarat. Is demum Pontificiis triremibus Auenionē deuectus infelix, & alieno potius quàm suo crimine miser, in terra custodia periit. At Marcus à Pisanis Fatioque, vti præclarus author libertatis, magnis muneribus liberaliter donatus, vbi se honesto euentu è manibus Saxonum explicatum videt, maiora sibi agitata ratus, accepta fide Florentiam contendit. Offerebat Octo uiris qui Reipublicæ præerant Saxonum nomine Lucam urbem, si octuaginta milia aureorum nummum persoluerent, ea conditione vt sub fide publica Castrucci liberis honestus in patria locus relinqueretur. Interim vt bona fide pecunia repræsentari posset, Saxones in Augusta arce Florétini militis præsidium acciperent, & ex numero præfectorum insigniū obfides darent. Erat eius comparandæ tantæ vrbis facultas populo longè gratissima: sed quominus decretum fieret, factiosi ciues Simone Tosa principe vehementer impediabant, obrectatione eorum laudis inducti, qui eam occasionem minimè prætermittendam suadere conabantur: quū supra ararii difficultates Mar-



co tanquam veteri infensoq; hosti, ac ipsis præsertim fluxa fide Germanis, tanto amittendæ pecuniæ periculo, minimè fidendum differerent: nec Tyranni liberis, qui atrocissimi nuper hostes extitissent, parcendum arbitrarentur. Sed non deerant ciues vti publicæ dignitatis augendæ studiosi, amantesque patriæ, qui eam pecuniam ex priuatis opibus, in eius vrbis coemptionem liberaliter offerrent, modò ipsis Lucëfium vectigalia non iniqua licitatione in triennium addicerentur. Interim à Marco acciti primores Saxonum Florentiam venire, & in his Bambergus Regulus & Arnaldus castrorum magister, vt coram Octo-uiris de obsidibus & pecuniæ summa tráfigeretur. Verùm inuidia & conceptus inter altercantes Patritios importunus liuor, populi decora ac vtilia cupiētis votū interruptit. Nec multo pōst Saxones irrita punitaq; Florentinorū cunctatione, urbem Lucā ipsamq; Augustam arcem, integrumque in ciuitate dominatum Gerardino Spinulæ Liguri vendiderunt: tanto cum dolore indignantis populi Florétini, vt in Simonem Tosam penè coniectis lapidibus omnes ordines inueherentur. At Marcus iam non obscurè Actio subiratus, quòd ad se redimendum pecuniam nequaquam diligenter atque celeriter expedisset, ad fatalem veteris odii ac insitæ ambitionis insaniam redierat, vsque adeo vt se Pontificis, Robertique Regis, & Florentinæ Reipublicæ clientem futurum iuraret, si ad pellendum Actium auxiliis atque pecunia iuuaretur. Sperabat enim Saxones qui iam planè à Ludouico Cæsare defecissent, nomē eius omnibus bellis illustre, ad optima stipendia nouamq; prædam continuo secuturos.

H.iiii.



Hoc concepto scelere, fœderèque percusso, quum per xxx. dies Florêtia viros nobiles & militiæ claros quotidianis epulis liberaliter excepisset, & vti erat excelsò corpore præaltoque animo & facièdia insigni, dignus paterno imperio videretur, pro lautiis mille aureis liliatis publicè donatus, Bononiâ cōtēdit: proficiscēti autem additus est comes Prætoris filius, qui ciuis erat Bononiensis. Hunc iuuenem Octouiri ingenio utiq; validum delegerant vt ab eo Marcus ad legatum deduceretur: eoque arbitro cuncta ordine quæ Florentiæ promissa constitutâque fuerant, iterata sacramēti fide confirmaret. Itaque magna spe inflatus à Legato Bononia discedēs Marcus Mediolanum peruenit, exceptusque est ab Actio & fratribus cum honore & lætis utique vultibus. Sed dum in rem suam nouandis rebus clientelas exploraret, tentaretque veteres amicos, & turbido atrociq; animo cōsilia aspera ad inuadendum dominatum agitaret, ab Actio & Luchino Ioannēq; nefariæ temeritatis cogitationes facilè deprehēduntur. Iam enim vesano vultu orēq; idētidem querebatur, quòd se tam diu contra fidē datam, apud barbaros fœuosq; homines reliquissent: & fortè tum seipso amarior atque turbidior erat effectus, quoniam adamatam nobilem fœminam, è matrimonio Othorini Vicecomitis impudenter abreptam, subita cōcitatatus iracundia apud Bosatum in profunda arcis fossa demerferat, quòd illā leuitate muliebri mentitâ partum, sibi alieni ventris puerum supposuisse didicisset. Sed eam ab eo flagitio ita oderat, vt necatam impotenti amore percitus, fera præcipitis vindictæ pœnitentia deploraret, indeque nouus perturbatæ menti



furor adderetur. Eo modo Actius patruſque ex multis indiſiis quid Marcus agitarer molireturque non obſcurè diuinantes, quum in vnum ſumma prudentia conſentirent, vitandam omnino diræ belluæ rabiem, vindicandūque prioris perfidiæ immane facinus ſtatuere. Nec mora Marcus in Arenæ curia poſt epulas in cubiculum colloquendi ſimulatione deductus, à delectis aliquot prætorianis comprehenditur, eliſſique linteo faucibus ſtrangulatur, nullo ex eius nece tumultu exorto, quum proiectum cadauer è fenestra in publicum nemo lugeret, & tanquā ſpōte præceps datus, ſumptuoſis honeſtatis exequiis, ad Euſtorgium ſepulchro maiorum inferretur. Florèrini verò prætoris filius vel totius conſilii conſcius, & funeſti exitus ſpectator, ab Actio benignè dimiſſus eſt. Nec multo poſt Ioannes Bohemiæ Rex, qui Henrici Cæſaris filius & Caroli quarti Imperatoris pater fuit, cum valido exercitu in Italiam deſcendit, neque Ludouico Bauaro Cæſari planè hoſtis, neque Guelpharū partiū amicus. Bergomates primi eum receperūt: nec Actius dubitauit quin amicitia, quæ maioribus ſuis cū Hèrico patre præclara fuerat, renouāda cauſa, ad Bohemū trās Abduā contenderet, munera deferēs vtroque digniſſima. Auxit exiſtimationem Bohemo id Actii officiū: & Actius ex eo colloquio confirmatæ potētia apud ſocios pariter ac hoſtes opinionem retulit, ita vt à Vercellenſibus ad ciuitatis Imperiū vocaretur. Nec multo poſt Bergomates à Bohemo præſidii iniuriis exagitati, ad Actium defecerunt. Ioannes enim ingenti curſu Brixia, Cremona, Papia, Parma, Rhegio, Mutinæque potitus, ſuperato Apennino Lu-



cam occuparat, Gerardino vrbe eiecto, & Florentinis copiis quæ Beltramone Baucio duce Lucam obsederant, longè summotis. Is rerum successus Gibellinos non secus ac Guelphos magnopere contreruit: eoque vehementius quod Bohemus cum legato Pontificio in colloquium deuenerat: famaque ferebatur Philippum Galliarum Regem cum Pontifice occulto inito foedere conspirasse, ut Bohemo duce cuncta subigerent, ac inter se Italiae vrbes partirentur. Erat enim Bohemus Gallica pecunia instructus. Quibus de causis Florentini tanquam à Roberto Rege planè deserti, metu noui hostis, cum veteribus inimicis communi commodò foedus inire coacti sunt. Itaque Actius, Mastinus Scaliger, Passarinus Mantuanus, Obitius Ferrariensis cum Florentino populo foedera percusserunt, ea pactione ut coniunctis viribus bellum gereretur: subactæque vrbes, Actio Cremona, Parma Scaligero, Regium Mantuano, & Obitio Mutina redderetur: Luca Florentinis cederet. Nec multo inde quum Bohemi Regis exercitus Ferrariam oppugnaret, ingenti prælio edito fusus profligatusque est, Pinalla Aliprado Actii duce felicissimè operam nauante. Nec fortuna victoriæ cursum diu morata, sociorum votis defuit: pulsoque Ponzono Ioannis præfecto Actius Cremona potitus est, Papiamque mox in ditionem recepit, quum in Vrbeculam compulso hostes, desperatis auxiliis deditionem facere coegisset. Placentiam demum à Francisco Scoto pecunia coemptam recuperavit. Postremo Franchinum Ruscum Comensium Tyrannum, multis illatis detrimētis eo adegit, ut accepto Bellizone oppido ad solatium amissi domina-



tus, vltro urbem dederet. Caterum paulo ante id tempus quum pedibus ager decumberet, maximum rerum suarum discrimen subiit, Leodrisii perfidia circumuentus. Is antea Matthæi Magni gloriæ inuidēs, quanquam esset patruelis, primas partes legationis ad Pontificis legatum susceperat, vt excitato inani libertatis nomine, Matthæus eiusque liberi Mediolano pellerentur: cum Marco demum aduersus Galeacium atrocissimè cōiurarat. Nec animus inquietus ambitionēq; mutabilis vllis omnino donis ac honoribus euinci mitigariq; poterat, vt Actiū rerū dominū imperio potiri pateretur. Itaque correptus vetere insania, inopinato transfugio abducta Germanorum ala, ad Frāchinum Ruscam, & mox ad Mastinum Scaligerum Veronam contendit, conductisque Rhetōrum Heluetiorūque cohortibus, & Germanis equitibus, magnāq; manu exulum passim collecta, ad Abduā profectus est: nec transitu prohiberi potuit, quanquam diuersa vada amnis Aliprandus Pinalla tueretur. Ea improuisa gentis irruptione agricolarū fœda & planè miserabilis fuga facta est per totum ferè Insubrum agrum, quod tum præaltæ niues herbidi soli campos integerent, nec pecoribus armentisque in loca tutiora refugientibus, deserto pabulo pascēdi facultas daretur. Porro Actius, quanquam pedibus ager, nihil de celeritate diligentiaq; remittit, quin ex omnibus locis milites cogat, munitioraq; oppida subitario præsidio confirmet, donec auxilia conueniant. Aliquot enim diebus antequā hostes Abduam transirēt, quid Leodrisius Veronæ moliretur, per exploratores didicerat, ita vt auxilia opportunè implorata trāsmissaq;



à propinquis focisq; principibus singulis horis expectarentur. Igitur coactis in vnum è Liguria, Ferraria atque Placētia magnis auxiliis, Luchinus patruus dux vetus & multis præliis felix Mediolano totius Nobilitatis equitatum, & delectam ex promptissimis ciuiū legionem educit, ad hostēsque progreditur. Confederat Leodrisius ad Neruianū vicū, duodecimo ab vrbe lapide: nec mora ad conspectum hostis ineundæ pugnæ signum dat, ordinēsque componit. Verūm irruente Luchino, prima Leodrisii acies sternitur. Sed ex aduerso Rheti Germanique more suo conglobati secundum impetum excipiunt, Luchinique equitatū primis cæsis intemperanter prouectum vehementer vrgent: multi vtrunque cadunt: cruētum & atrox vndique prælium editur. Cæterū Actianis ægrè sustentibus & iam planè profligatis, Luchinus ipse dum reparare perculsam aciem ingenti animo contendit, interfecto equo Heluetiorū securibus sternitur & capitur. Tū verò Barbari clamorem attollunt, & legionē Insubram armis animisq; imparem adoriuntur: tātāq; vi Placentinas cohortes propellūt, vt Dōdatio Maluicino viro fortissimo, Lancilottoque Anguisola ducibus interfectis, vniuersa acies fugā respiceret, Leodrisioque parta victoria videretur: nisi Diuus Ambrosius Mediolanensiuū tutelare numē, in nube equestri effigie à multis cōspectus recentis auxilii opē planè perditis rebus attulisset. Superuenit enim Hector Panicus cum ala cataphractorum Allobrogum à Ludouico Sabaudio Actii focero transmissa. Hæc Rhetos intempestiuè exultantes, & cædi prædæque solutis ordinibus incumbentes, ita protriuit atq; cecidit, vt in-



staurata pugna, & fortissimo quoque ex nouo euentu defumante vires ac animos, Leodrisiani terga darent: Luchinusque ad arborem deligatus barbaris custodibus eriperetur: & Leodrisius effugiens in manus hostium incideret. Eo die interfecta sunt supra quatuor milia hominum: sed minus lætam Luchino victoriam fecit Ioannes Fliscus Fuscæ vxoris frater, Ligurum præfectus, qui in prima acie ceciderat. Externus Leodrisii miles agricolarum sæuitie dum vagatur, & frustra effugium quærit, inedia, frigore, vulneribusque consumptus ferme omnis interiit. Leodrisius cum liberis in arce Diui Columbani custoditus est, vt post Actii & Luchini mortem, Ioannis Archiepiscopi clementia seruaretur. In eo autem campo vbi pugnatum est inter Parabiacum & Neruiatum, Luchinus & Ioannes templum in acie Diuo Ambrosio votum, ad rei gestæ memoriam condiderunt: vbi quotannis insigni pompa, effuso Mediolanensi populo cum Prætoribus & Decurionibus altero & vigesimo Februarii die, sacra solennia celebrarent. In eo templo ad læuam spectatur effigies Hectoris Panici cum armata Allobrogum ala perditis rebus opem ferentis, quod facile dignoscitur, quum in purpureis equitum laciniis albæ cruces Sabaudiani principis insignia discernantur. Secundum eam victoriam confirmato imperio, Actius Mastino Scaligero graue bellum intulit, atque ei demum, iniuriam probe ultus, Brixiam ademit. Exinde pacatis rebus Mediolani mœnia iam cœpta antiquitus, ad iustam altitudinem educta sunt, additis per intervalla altioribus propugnaculis, in quibus marmoreæ ingentes viperæ visuntur. Perduxit etiam in urbem



fluuiolos duos euerrēdis vrbanis sordibus, ad salubritatem opportunos, Lironem scilicet & Cantaranam, qui iam penè defecerunt, quum negligentia publica sensim oblimati, iam pridem alvei curatoribus caruerint. Tum quoque admirandæ magnificentiæ Curiam in harena priscorum temporum iuxta frontem templi maximi ædificasse constat, addito Diui Gothardi templo, cuius sacram turrem nobili fastigio insignē cum admiratione suspicimus. Id multis admodum pretiosis diuini apparatus instrumentis refererat. Mortuus est Augusto mense, octauo & trigésimo ætatis anno, quum integros nouem annos regnasset, usque adeo improbè vrgente fato, & articulorum doloribus assidue laceffit, ut ne lodicibus quidem in lectulo sine intolerabili cruciatu volueretur. Ex Catharina autem Sabaudia vxore pudicissima nullā suscepit prolem. Erat Actius facie candida lætæque, naso autem simo, quod nemini superiorum gentiliū contigerat: coma item barbæque ad patris similitudinem, ænei coloris, valde crispa: sed cæruleis oculis, ac intēpestiuo caluitio, non deformante quidem frontem, sed latius decorante. Existimatus est ex toto actionū euentu, egregiè bello fortis & consilio summè prudens, & quod popularis gratiæ plurimum intererat, aditu facilis, & alloquio perhumanus, publicè & priuatè cum ratione liberalis. In feriis porrò sine fastu grauis, & in serendis iocis omnium suauissimus euadebat: ita ut quum postremò cuncta ad Christianam pietatem reuocaret, uti credi par est, ei dii atque homines, perfidiosi & turbulenti patrui necè faciliè condonarint. Tumulatus est marmoreo insigni sepul-



chro ad aram Diui Gothardi, in quo cælato inaura-  
toque opere eius iacentis effigies spectatur. Pari arti-  
ficio circūseptus est marmoreis tabulis sepulchri lo-  
culus, in quibus scitè sculpta Ludouici Cæsaris solen-  
ni habitu imago cōspicitur, quū supplici ingenucula-  
toq; Actio Mediolanēsis imperii insignia largiretur.

*Epitaphium Actij, qui eo rudi seculo  
Azo dicebatur.*

*Hoc in sarcophago tegitur vir nobilis Azo  
Anguiger, imperio placidus, non leuis & asper:  
Vrbem qui muris cinxit, regnūque recepit:  
Puniuit fraudes, ingentes struxit & ædes.  
Dignus longa vita, in fatis si foret ita,  
Vt virtus multos posset durare per annos.*





Luchini armati effigies in templo Diui Ambrosii ad vicum Parabiacum, post aram maximam quā praelio vouerat, & parta demum victoria dedicarat, conspicitur.

LVCHI-



## LVCHINVS.



Actio immatura morte sublato, quod  
 sine virili prole decessisset, duo patrum  
 Luchinus atque Ioannes pari Iusubru  
 omnium consensu, continuo successe-  
 runt. Sed Ioannes æquitate liberali, uti  
 sacrum Antistitem decebat, diuini iuris potestate  
 cõtetus fuit, ita ut fratri bellica laude perillustri & in  
 administranda Republica ingenio graui constantiq;  
 prædito, integra exercẽdi imperii cura relinqueretur.  
 Is initio statim suscepti principatus, quod confirmã-  
 dæ potentia parandæque summæ gratia apud ciues  
 plurimum intererat, à Benedicto duodecimo per le-  
 gatos impetrauit, ut interdicta sacris ciuitas, tum ve-  
 rē supplex clementia & benignitate æquissimi sacro-  
 rum Principis expiaretur. Recepit quoque pari Pon-  
 tificis indulgentia veteres thesauros, qui è tẽplo Mo-  
 doetia, turbulentis superiorum bellorum tempori-  
 bus Auenionem asportati fuerant. Caterum quum  
 ad arma vocaretur, per legatos ferè semper bella gef-  
 sit, tametsi antea longè acerrimus bellator extitisset,  
 utpote qui in omnibus ferè iustis præliis honesta vul-  
 nera suscepit: in illa enim nobili cruentaq; ad mō-  
 tē Catinum pugna, qua Vguccio Fagiolanus victor  
 Guelpharum partium vires vehementissimè cõtudit,  
 paterna auxilia ductanti inuectõq; in medios hostes,  
 sinistrum crus valida cuspide traiectum est. Ad Ale-  
 xandriam porro quum in Tanari ponte cum Vgone  
 Baucio Roberti Regis equitum magistro cõfligeret,  
 ita Baucium inuasit atque prostrauit, ut multo suo ac

I.i.



interfecti hostiū ducis cruore foedatus, & opimo spolio & præclara victoria potiretur. Ad Tricellam quoque oppositus ingētibus externarum gērium copiis, quæ Pontificis & Roberti Regis auspiciis sub Gastone Aquitano Raimundoque Cardonio Mediolanum obsessum ire maturabant, maxime pugnacis & periti ducis laudem tulisse fertur, quum terribili longoque certamine ædito, separatq; sæpe acie, decora in facie vulnera suscepisset. Postremò ad Neruium acriter dimicans, ita Heluetiis securibus perfracta galea, suffossoque equo, prostratus captusque est, vt manante per nares multo sanguine ad iuglandis arborem tam diu nexus & semianimis iaceret, donec recentis Allobrogum alæ superuentu, cæsis Heluetiis atque Germanis, & Leodrisio hostiū duce capto, è vinculis eriperetur. Sed qui tot bellis summa pericula euaserat, ex principatu demum oborta statim inuidia, amicorum & propinquorum sæuas manus vix effugit. Cōiurauere etenim in eius necem Franciscus Pusterla ex ordine Patritio auitis diuitiis potēs, & ante alios duo Aliprandi fratres Martinus atque Pinalla, qui Actianis copiis præfuerant, neglectique à Luchino ad alios scilicet, vti meliores translatis honoribus, amiciores liberaliorēmq; dominum quærebant, coniectis vtiq; oculis in Galeacium & Barnabam ex Stephano fratre Luchini nepotes, qui decore iuuentæ & iā planè matura militari indole florentes, intempestiua summēque nefaria ambitione (hæc enim domui Vicecomitum fatalis fuit) ad imperium aspirare dicebātur. Sed dum Aliprandi fratres pertētatis amicorum intimis, coniurationi vires addere contendunt, à Ramengo



Casato inita consilia produntur. Nec mora Martinus atque Pinalla capti diuque torti, in carcere fame necantur, cæteris in furca latronum more strangulatis. De Pusterla autem qui profugiens ex Etruria retractus fuerat, in foro supplicium est desumptum, eo quidem atrocius atque miserius, quod duobus filiis adulescentibus in conspectu parem poenam subeuntibus, scelestus pater, paulo antè inter ciues maximè felix, supremæ calamitati suæ domus interfuit. Nec multo post Margarita vxor, quod non conscia modo suscepti adeo immanis consilii, sed ad id maturè patrandum peracerba concitatrix extitisset, perpetui tantum carceris poena damnatur, quod Othorino Vicecomite genita Luchinum arctissima propinquitate contingebat. Cæterum ex damnatorum quaestione comperitum est Galeacium & Barnabam non ignaros initæ coniurationis, paratosque ad excipiendam principatus fortunam, tanti facinoris euentum spectauisse. Sed Luchinus ne supra Marci fratris necem, familiæ decus, vel maximè nocentium iuuenum cruore macularet, deprecante Ioanne Antistite, exilii poenam non excessit. Ita tamen ut eos perfidiæ impietatisque ignominia notatos, ad Oceanum in extremos Belgas atque Batauos relegaret. Exinde Luchinum natura subtristem planèque seuerum, solito amariorem ac duriorum factum scriptores tradunt: usque adeo ut nec in ioco, pallidam semper obducens frõtem, ridere sit visus, quod ad animi ægritudinem, articulorum quoque dolores accessissent. Sed non inanis rumor de vxoris impudicitia per urbem excitatus, mœrorè usque adeo cumulauit, ut in affecto tot malis sene, nondum ma-

I.ii.



tūris fatis viam aperiret. Nupserat ei Isabella cognomento Fusca, ē Fliscorum gēte apud Ligures à præalta vetustate pernobili, duobusque præsertim Pontificibus, Innocentio ac Hadriano, purpuratisque supra quinquaginta Senatoribus longè clarissima, vnde factum atq; inde luxuriam parum verecundo gestu orēque præferret. Hæc nobiles Insubrum matronas forma, lepore, mundiciis, ac vna præsertim vteri fecunditate, qua Luchinus felix videri potuit, anteibat. primo enim partu Luchinum Nouellum, secundo Vrsinam, & mox tertio gemellos mares eximie indolis Borsum & Forestinum rara quidem felicitate pepererat, nisi tantam prolem ex incesto concubitu concepisset. Galeacium enim formæ dignitate cunctos mortales superantem adamasse constat, vti aliquot post annos defuncto iam coniuge, in extremo vitæ actu tā pie quàm ingenuè confessa est, scilicet vt animi piaculo liberaret, vel cum certo infaustæ prolis exitio, tantiq; subinde imperii hæreditas ad legitimos successores verteretur. Cæterum suopte ingenio procax & levis mulier, exulante Galeacio, & viro ex podagra decumbente, quum spectare Venetias cum situ ipso tum celebri festo die Ascensionis CHRISTI, naualibus ludis & publicarum priuatarumque opum ostentatione mirabiles, auidissimè concupisset, importunæ vxori Luchino cuncta concedente, haud difficulter impetrauit vt ornatissima classe per Padū deueheretur, delectis in comitatu sceminarum nobilissimis, quibus ambiguus inesset pudor, nec viri earū tuendæ pudicitie cura tangerentur. Verum luxuriosissimæ navigationis exitus fuit, vt cum insigni pro-



bro prostrata pudicitia apud Vgolinum Gonzagam, Dandulumq; Veneri Senatus principem, rediret: pari infamia deflagrantibus nonnullis illustribus foeminis ex comitatu, quum a pudicis pariter ac in eodem crimine maculosis leuitate muliebri per mutuas delationes, singularum adulteria proderentur. Hoc tanto inexplabilis infamiae vulnere percussus Princeps, ita flagitii iniuriam tulit, vt non obscura parati ad vindictam animi signa, vel non planè explicata contractae frontis querela, demorsis saepe vnguibus ostenderet. Itaque Fusca expedito ingenio non impudica modò sed apprimè truculenta mulier, poenae metum celeriter anteuertit: agrumque adhuc coniugem veneno lento atque tabifico praecipuat, nullo tum sceleris extante vestigio, quum planè maturatus agri senis obitus ad nouum insurgentis morbi impetum facilè referretur. Vixit annos sexaginta duos: imperauit nouè. Tumulatus est in aede Diui Gothardi iuxta Actium, regio sumptu celebratis exequiis. Luxùre elatum veris lachrymis cuncti ciuium ordines. Nā summa aequitate ius dicere, obliuisci factionū, tueri ab iniuria infimos, & quod maximè popolare videbatur, singulari prouidentia annonam curare erat solitus: bella quoque, quod opulenta tranquillitatis intererat, extra fines semper gessit, eo animi decreto, vt sua strenuè defenderet, & socios constantissimè tueretur. Parmam imperio adiecit sexaginta milibus aureis coemptam ab Obirio Atestino, agrè eam urbem aduersus Gonzagas atque Scaligeros defendente. Pisanis porro ea conditione pacem dedit, vt honorarii tributi nomine binos equos, militarem vnum, alterum asturconè

I.iii.



album, quo domina veheretur : itémque binos ad aucupium falcones peregrinos quotannis penderent. Nouissimè Ligures fluxa fide antiqua fœdera violantes, magnis copiis inuaserat, Brutio filio duce Genuâ gentis caput obsessurus, nisi properantia fata vetuissent. Magnificentia monumēta nulla ferè reliquit, Actiana domo contentus, quum antea Ticinensi regione præaltas ædes cōtra diui Georgii templum Palatii nomine vocatas habitasset. Foris autem validam arcem in edito monte ædificatam, cui à vetere delubro Capellæ nomen est, Bergomatibus imposuit. Delectatus est, tuendæ valetudinis causa, suburbano secessu, non tam amœno quàm salubri, ad septimum lapidem Comensi via sinistrorsum, vbi tenuis est pagus qui Sanus aer verissimo nomine nuncupatur. Liberos reliquit, Brutium ex cōcubina, qui quum Laudi Pompeiæ præferoci ingenio aliquandiu tyrannidem exercuisset, coniurante ciuitate expulsus, obscuro in pago in Euganeis inops & merito miser interiit. Borsius autem & Forestinus publicato Fuscæ matris incestu, tãquam damnatæ prolis iuuenes, hic tetro in carcere, ille verò ex fuga, in exilio perierunt. Eandē exilii fortunam tulit Nouellus, qui nequaquam animo degeneri militiae assuetus, propinquorum suorum hostibus semper adhæsit.

*Epitaphium Luchini.*

Iustitiæ cultor, scelerumque acerrimus ultor,  
 Pauperibus charus, nunquam dum vixit, auarus:  
 Egregijs factis, & cladibus ante peractis  
 Insignem bello laudem meruit, nisi fraudem  
 Sors mala struxisset, crudeliter & perisset.





Ioannes Archiepiscopus se pingi iussit in facello domus Archiepiscopalis à se cõdira, ante imaginem Diuæ Mariæ Virginis, vsqueadeo præcellenti pictura, vt incorruptis coloribus per ducentos annos adhuc perduret.

I.iiii.



**P**ost elatum Luchinum, totius imperii summa ad Ioannem Archiepiscopum germanum fratrem continuo rediit, absolutæ virtutis principem: nam in omni eximia prudētiæ & perfectæ pietatis officio, moderatâque regendi imperii disciplina, Othoni maiori patruo par fuit, quū ex ipso censu generosæ stirpis Matthæum patrem magnitudine constantis animi referret: nec Galeacio fratri de nobilitate liberalis ingenii, vel decore formæ, vel studio promerendæ gratiæ quicquam concedere cēseretur: & Actiū perhumana illa, nusquam tamen nisi graui, ad faciles aditus atque sermones comitate, atque item magnificentia operum faciliē superaret: præclarâque demum paucissimis Regum cōcessa clementiæ laude (quæ in Luchino vti nimis duro militarique, quanquam viro semper summo, defuit) omnium opinione potiretur. Is inuito statim principatu, nihil antiquius duxit quàm Galeacium & Barnabā ab exilio reuocare. Rediere illi Belgarum more brachato habitu, sicuti videre est in incolumi adhuc pictura in templo Diui Ioannis ad Concham, Cosmæ & Damiano diuis tutelaribus votum soluentes, præferentēsque eximium bellicæ virtutis specimen, quūm Belgicis atque Britannicis bellis parta non obscura laude, militassent. Nec multo post propagandæ soboli firmandoque imperio validas finitimorum principum propinquitates præstanti iudicio quasiuit, ita vt Blancam Sabaudiam Aymonis Allobrogum reguli filiam, Galeacius vxorem duce-



ret, & Beatrix Mastini Scaligeri filia à fastu superbisq;  
moribus Regina cognomen adepta, Barnabæ matri-  
monio iungeretur: binasq; nuptias ex interuallo sum-  
ptuosius ludorum equestrium spectaculis celebrarent.  
Cæterum Ligustici belli causam secutus, captis armis  
adeò Murtham Genuensium ducem terruit, vt abdi-  
cato principatu, sese ciuitatēque ad eius authorita-  
tem contulerit, & præsidium prætorēque à Ioanne  
delectū acceperit. Sed non multo post defuncto Mur-  
tha, populus vti semper factiosus & mutandis consi-  
liis repentinus & leuis, Valentem ducem creauit. Ea  
contumelia permotus Ioannes arma parat, & bellum  
indicit: quæ periculi fama Ligures terrentur, vel ob id  
maximè quòd tum mari magnis classibus cum Vene-  
ris & Catalanis contendentes, circa Sardiniam infe-  
liciter conflixerant. Itaque supplex ciuitas & opem  
implorans, ad pristinam fidem rediit, & Valens susce-  
pto temerè principatu se abdicare cogitur: recipitur-  
que Genuæ Gulielmus Pallauicinus qui Reipublicæ  
præsit, ad id munus cum præsidio equitum & peditū  
à Ioanne missus. Nec mora Genuēsēs nouam classem  
exornant, Ioanne in eam delectos milites, pecuniam  
& commeatum abundè conferente, addentēque duo-  
decim triremes suo sumptu suōq; milite egregiè in-  
structas. Eam classem Paganus Auria præfectus, quū  
vipera insignia in vexillis præferret, cum Venetis ad  
Sphragiam insulā, quæ Sapientiæ nomen habet, con-  
tra Methonem, vsque adeo acriter atque feliciter cō-  
flicxit, vt debellata hostiū classe Nicolaus Pisanus qui  
Sardoo in mari cladem intulerat, cum quinque mili-  
bus Venetorum militum captus, Genuam in trium-



phum duceretur. Genuenses autem liberali ope Ioannis se victoria potitos grato animo confitentes, nouo decreto deditæ ciuitatis iura, quæ Ioannis morte finirentur, ad Galeacium pariter & Barnabam trāstulerunt: ita vt totius Liguriæ vrbes à Coruo Lunensi promontorio ad Herculis Mœneci portum, Vicecomitum imperio subderentur. Per id quoque tempus Bononiam in potestatem redegit, quum Pepulus vir nobilitate atque opibus insignis, qui patriæ libertatē inuaserat, Pontificiis oppugnatus armis, à Ioanne maturam opem implorasset. Validis enim Insubrum auxiliis Pepulus egregiè defensus, eò demum descendit, vt acceptis Crepacorio Nouantulāq; oppidis, ac multo insuper auro, patriam vendere, quàm suscepti principatus nomen tueri mallet. Bononia parta Ioannes finitimis terrori esse cœpit, vsque adeo vt Florentini antiquæ iniuriæ, & Veneti recētis acceptæ cladis memores, Pontificiis ducibus vires adderent: initoq; fœdere cum Pontifice, confestim impetraretur vt dirum illud religionis telum interdicendis sacris in Ioannē vibraretur. Sed Olegiano duce Bononiæ imposito, ita felicibus armis urbem defendit, vt Clementis Pontificis iras faciliè mitigarit. Per Guliermum siquidem Grisantem Pontificis legatum, qui postea Urbani quinti nomine desumpto Pontifex euasit, quum Mediolanum venisset, salubri consilio transactum est, vt tanquam beneficiario iure concessam urbem retineret, & quotannis sexaginta pondo auri tributum nomine soluerentur. In Florentinos demum intestino malo laborantes, tanquam in veteres & recentes hostes, arma vertit, concitantibus Vbaldinis Vbertisq; & Pa-



ctiis exulibus, qui aucti viribus Tarlatorum & Casaliorum Aretii Cortonæque principum, à Ioanne Antistite, tãquam Gibellinæ factionis principe patronoque certissimo, opem assiduis precibus implorabant. Olegianus qui ex eadem Vicecomitum ortus familia, ipsius Ioannis Antistitis filius putabatur, ab Olegioq; ad Verbanum lacum oppido cognomen ferebat, è Bononia Apenninum transgressus, Sambucum vicum in Pistoriësis Alpibus cepit: peruagatusque montanum agrum, ad oppugnandam Scarpariam ad duodecimum ab vrbe Florentia lapidem descendit. Erant in exercitu supra ingentem peditum numerum, decem milia galeatorum equitum, & exules ab Arni valle armatis agrestibus opportunè in suburbanum agrum irruerant, vsque adeo infensis sæuisque animis, vt tecta obuia crudeli incendio delerentur, mœstaque ob id & trepida ciuitas, vti viribus impar, à sociisque deserta, vel non æquam pacem appeteret. Nec Ioannes à nomine pacis abhorrebat, modò sociis Gibellinarum partium honesta cõditione caueretur. Itaque proclamatis induciis indictus est locus Sergiano in oppido Lunensis agri, vt conuenientibus totius Etruriæ Umbriæque legatis, querelæ omnes neglecti aut prætermissi iuris deferrentur, disceptatoribus Guliermo Pallauicino pro Ioanne, & Carolo Strozza pro Florentinis. Ferunt supra sexaginta urbium illustriumque regulorum legationes coiuisse, pacemque moderatis legibus singulis datam, summa quidè cum laude Ioannis qui clementi ingenio, detrimenta belli innoxiiis ac immerentibus illata populis perosus, susceptum bellum optima pace, quàm cruenta victoria finire malue-



rit. Nec obiter prætermittendum videtur magnanimi Præfulis factum inter multa memorabile, quo Pontificium summæ feueritatis imperiū facetissimo obsequii genere magni fecit simul & elusit. Paulo enim ante id tempus quum à Pontifice expetentibus Florentinis Auenionem vt coram adesset, sub anathematis pœna citaretur, latissima fronte respondit, se vt fidelem dictoque parentem seruum deceret, instructa profectione Auenionem maturè peruenturū, vt præfenti obsequio proiectus ad pedes sacrosanctum Pontificem veneraretur. Cæterum legatos misit qui per omnes vrbis regiones, amplissimas domos, persoluta eius anni pensione conducerent, ingētēque omnis generis commeatus copiam compararēt, qua numerosus comitatus aleretur. In id porro Quæstor multa onustus pecunia adeo profusè operā intendit, vt mirum in modū annona in foro cresceret, nec peregrini negotiosique homines ex omni Europa ad Pontificiā aulam confluentes, vllum omnino pro hospitio receptum Insubre conductore vacuum reperirent: & publicè populus & inquilini de annonæ caritate cōquererentur. Quibus insolitis vocibus permotus Pontifex Mediolanenses legatos cuncta prodigè coemētes vocat: causam quærit cur tantum commeatus accumulēt, totque passim amplissimarum ædium hospitia inani sumptu ad querelam publicam conducant. Legati ita parare se iussos à Ioāne Præfule respondēt, qui septem milia armatorum equitum, totidēque peditum, præsidii & comitatus causa sit adducturus. Intellexit illico Pontifex quo rerum suarum periculo Ioannes tantis instructus viribus foret expectādus:



lenitèrque subridens, tanti itineris laborem Præsuli, tanquam occupato & præclare Pótificii nominis studio, benignè se remittere dixit. Legati autem quum dimitterentur, honestissimis à censu virtutis aut parum ditibus conductas domos gratuito concesserunt, ita vt commeatum quoque omnem aut sacratis cœnobiiis, aut è plebe miseris & egentibus largirentur, tanta cū laude vt nemo esset qui Ioannis causam non studiosissimè tueretur. Sed nō multo post crescente potentia, vt plerūque fit, non iniqua comes inuidia pariter creuit. Formidabilis enim vel amicis veteribúsque fociis apparebat, vsque adeo vt consternati metu Atestini, Gonzagæ, Scaligerique principes foedus inter se percuterent: coactoque numerofo exercitu, castra fossis ac aggeribus vallata, propè Mutinam adorirentur, sustinentèque impetum præsidio fortiter repulsi, in Cremonensem agrum cuncta vastantes irrumperēt. Hæc castra muniti instar oppidi Ioānes aduersus Rhegienses construxerat: videbatúrque inde non Rhegiū modò, sed etiam Mutinam inuasurus, vt à Bononia ad Placentiam suæ ditionis continuum iter pararet. Hæc agitantem, & septimum regnātem annum, Augusto mense concepta febris & lentis demum accessionibus producta in Septembrem, climaterico ætatis anno leniter extinxit. Códitus est marmoreo tumulo iuxta Othoneman te sacrarium templi maximi, vbi hæc carmina rubro lapidi incisa legūtur, quæ ex eius rudis seculi memoria ad iucūdā ingeniorum æstimationem præterire noluimus.

*Quàm fastus, quàm pompa leuis, quàm gloria mundi  
Sit brevis, & fragilis humana potentia quàm sit,*



Collige ab exemplo qui transis, perlege, differ,  
In speculo speculari meo lachrymabile carmen,  
Qui sim, qui fuerim licet, qui marmore claudor.  
Sanguine claruseram Vicecomes stirpe Ioannes.  
Præsul eram, pastorque fui, baculumque gerebam,  
Nomine, nullus opes possidebat latius orbe:  
Imperio tituloque meo mihi Mediolani  
Urbs subiecta fuit, Laudense solum, Placentia grata,  
Aurea Parma, bona Bononia, pulchra Cremona,  
Bergoma magna satis lapidosus montibus altis,  
Brixia magnipotens, Bobiensis terra, tribusque  
Eximijs dotata bonis Derthona vocata,  
Cumarum tellus, nouaque Alexandria pinguis,  
Et Vercellarum tellus, atque Nouaria, & Alba,  
Ast quoque cum castris Pedemontis iussa subibant,  
Ianuaque ab antiquo quondam iam condita Iano  
Dicitur, & vasti narratur Ianua mundi,  
Et Sauonensis Rax, & loca plurima quæ nunc  
Difficile est narrare mihi, mea iussa subibant,  
Tristia tota meum metuebant languida nomen.  
Per me obsessa fuit populo Florentia plena,  
Bellaque sustinuit tellus Perusina superba,  
Et Pisæ & Senæ timidum reuerenter honorem  
Præstabant: me me metuebat Marchia tota.  
Italix partes omnes timuere Ioannem.  
Nunc me petra tenet, saxoque includor in isto,  
Et lacerant vermes, laniant mihi denique corpus.  
Quid mihi diuitiæ, quid & alta palatia prosunt,  
Quum mihi sufficiat quod paruo marmore claudor?



## MATHAEVS SECVNDVS.

**E**X testamento Ioannis vniuersum imperium æquissima ratione trifariam diuisum, tribus Stephani liberis cecidit, ea conditione vt Mediolanum & Genua communis essent ditiois, ab vnóque tantum prætor regerentur, quem pari iudicio delegissent: reliquæ porro vrbes nobilioræque oppida à grauissimis Iureconsultis amicisque communibus fideliter æstimata, digestæque in tres portiones, sortem ex vrna sequerentur. Matthæo Bononia obuenerit, quæ ex ipsa solenni transactione quatuor vrbes tanquam sua membra secum trahebat, Laudem scilicet Pompeiam, Placentiam, Parmam, & Bobium in Apennini vallibus situm: item Lucam & Massam togatæ Galliæ, Pontemque tremulum supra Macram amnē, Apuanorum Ligurum caput, & Sancti Donini oppidum, quod in Aemilia via à Tarro amne septē milibus passuum distat. Sed Matthæus nequaquam diu Bononia potitus est, Olegiano eius vrbis imperium occupante. Is enim sub id tempus quo Ioannes Archiepiscopus suprema tentatus valetudine decumbebat, rebellantibus Patritiis atque arma capiētibus, in foro prospere conflixerat, coniurationisque principes captos, securi percusserat, in quibus nonnulli ex Blanchis, Gozadinis, Bentiuolisque & Sabadinis fuerant. Post id factum quum ædificatam à Ioanne Antistite veterem arcem egregiè permunisset, inuasit eum libido arripienti imperii, cuius ipse præcipuus defensor extitisset. Itaque fortuna nefariis cœptis aspirante, Prætorē



militarēq; præsidiū Matthæi, insigni composita fraude, vrbe expulit, Bononiensēsq; armis territos in nomen suum iurare coegit. Erat Matthæus ingenio ciuili potius quàm militari, nec ideo ad vindicandam iniuriam parato, vtpote qui nihil ex magno auro, si speciē corporis demeres, præter nomen referret, ignobilique otio delectatus, nequaquam bellica laude duceretur: ei nanque summæ curæ summāq; voluptati fuerant accipitres, atq; ea omnis venatio quæ vel fœminas admitteret, & prorsus sine sudore pararetur. Has autem diurnas exercitationes, nocturnæ libidines excipiebant, quibus adeo intemperanter corpus atque animum effœminauit, vt inter duas sæpe concubinas nullo pudore eneruatis viribus cubitaret, instillarētque (vt Corius in historiis author est) muliebribus locis vnguēta peregrina, quibus intermortuæ veneris segnitiem prodigiosa titillatione suscitaret. Per hunc modum fractis lateribus, quum ad Seronū oppidum, vbi munitam pinnis domū ædificarat, medio itinere inter Mediolanum & Comum secessisset, diuturna febricula tabefactus interiit, anno secundo post Ioannis patrui mortem: Valentina matre multis cum lachrymis, à fratribus veneno sublatum vsque adeo constanter existimante, vt Galeacio & Barnabæ diras imprecaretur. Matthæū enim ex sermone quodam inuidiæ pleno, apud fratres exitiale odium parasse referebat, quòd Crescentiaco in vico, vbi auū obiisse retulimus, quum fortè in cœna Galeacius & Barnabas tanti imperii à maioribus conditi amplitudinem atque opulentiam laudarent, omniumque pulcherrimum fortunæ munus Principatum esse fateretur,

tur,



tur, Matthæus incautè subiunxisset, id quidem sine controuersia verum esse, incomparabilèq; videri, modò Principatus socio confortèque careret: ita vt non obscurè Ioannem patrum perstrinxisse videretur, qui secus ac magnus auus fecisse visus est, nō vnum, Galeacii primi atque Actii exemplo, sed tres simul periniquo iure diuisi imperii hæredes instituisset. Id dictum subamaro sale, scommatisq; nomine prolatū, vsque adeo in pectus fratrum altè descendit, vt sequenti coena suilles lumbos, cuius obsonii Matthæus erat appetentissimus, toxico illitos apposuerint. Duas habuit filias absque vlla virili prole, ex Liliola Gonzaga Philippi Mantuæ principis filia susceptas, Catharinā scilicet & Vrsinam: hanc Balthasari Pusterlæ Patritio maximè opulento, illam verò Vgolino Gonzagæ bellica virtute perillustri nuptui dedit. Tumulatus est ad Eustorgii templum iustis exequiis à Serono Mediolanum vsque perductis: sed sepulchri marmorei honore, titulòque epitaphii caruit, tanquam fratribus inuisus, & nihil laudis à literatis promeritus, quos in colenda tantum venere liberalis, in ea turpi supinæ vitæ desidia contempsisset.





Galeacii secundi imago varii gestus atque habitus in arce Ticinensi multis in locis repetita conspicitur. Illam autem tanquam iucundissimam excerptimus, quæ redeuntis ex victoria ad triumphum sequente exercitu solennem pompam ostendit, in ea porticu quæ ad orientem solem vertitur.



## GALEACIVS SECVNDVS.

**G**Aleacio secundo cuncta propè quæ ex-  
peti mortalibus possunt, cum naturæ  
tum fortunæ rarissima dona contige-  
runt: corporis enim dignitate & deco-  
re formæ lectissimos iuvenes supergres-  
sus, tū maximè seipso celsior & pulchrior euadebat,  
quum nouo more comam aurei coloris promitteret,  
complicatamque sæpe in tricas, & nonnunquam dif-  
fluentibus cincinnis per humeros expansam reticu-  
lato pileolo aut florea corona castigaret. Id enim cum  
decebat alioqui lacteo colore atque ænea barba con-  
spicuū, vti videre est ex multis eius imaginibus, vnāq;  
præsertim equestri thoracata, quæ Ticini in arce ad  
sinistrā porticum spectatur. Balthei militaris digni-  
tatem Hierosolymis promeruit, quū religionis causa  
CHRISTI sepulchrum inuisurus, in Iudæam na-  
uigasset. Belgico item bello (nō secus ac Otho fami-  
liæ Princeps superiore seculo in Syria Viperam, perpe-  
tuum gentis insigne, obtruncato barbaro hoste de-  
traxisse traditur) prostrato nobili Belga, nouū gesta-  
men insigni aquæ & ignis argumento, tanquam opi-  
mum spoliū retulit. Ex ipsa enim clypei pictura ar-  
dentes bini torres, pendētibz totidem aquariis situ-  
lis, contrariæ potestatis facultatem exprimebant, vs-  
que adeo specioso argutōque emblemate, vt id ad po-  
steros ipsosque item Sfortianos in Vicecomitum fa-  
miliam adoptatos manarit. A Carolo autem quarto  
Cæsare qui Mediolanum aduenerat, solennibus codi-  
cillis ritè confectis in Cisalpina Gallia atque Liguria

K.ii.



imperio Vicarius Cæsaris est appellatus, pari dignitatis beneficio fratri Barnabæ communicato: interque sacra solennia Cæsar Ambrosiano in templo, vtriusque filios quanquam planè pueros, militari baltheo cinxit: Ioannem scilicet Galeacium, qui demum totius imperii hæres potentia formidabili supracæteros Italiæ principes euectus est, quum ex nomine nequaquã temere indito, duos summæ virtutis atque prudentiæ patruos referret, & Marcum Barnabæ, qui malè auspiciatum infelicis patruui nomen sortitus, ad frugem minimè peruenit. Cæsare itaque multa pecunia magnisque muneribus donato, & in Germaniã redeunte, multo certior quàm antea nominis authoritas ambobus creuit, quæ demum perpetuo beneuolentiæ studio & fraterna charitate vsque adeo stabilita est, vt cõcordibus animis ad vitæ exitum (quanquã diuiso imperio) regnarint, mutuisque opibus bella gesserint, communẽ eum ducentes hostem, qui ipsorum alteri arma moliretur. Ea enim æquitate defuncti Matthæi fratris hæreditatem inter se diuiserant, vt urbem Mediolanum ab ortu solis ad occasum per regiones perducta linea partirentur, & singulas arces ambo conderent, Galeacius ad Iouiam portam quæ Comum ducit, Barnabas ad Romanã: quod huic Conchana domus, illi Actiana curia, sicuti Matthæo antea Antistitis Ioannis ædes forte obuenerant. Cesserat Barnabæ Bononia, quæ quum vehementibus armis repeteretur, Olegianusque Pontificiis adiutus copiis strenuè resisteret, diuturni grauißimique belli causam præbuit. Nã plerique principes & cum his Florentini Pisanique, quibus odio atque timori consentientium fratrum opes erant, Conradũ



Landum Germanorum ducem & Marcoaldum cum Bohemis à Carolo Cæsare Pisis impositum, præbita in triplex stipedium ingenti pecunia, aduersus Vicecomites concitabant. Ea enim tempestate validæ externarum gentium manus, vt tum aiebant, fortunæ auspiciis militantes, per Italiã prædabundo agmine vagabantur, hisque sese cupidè commiscebant ex omni regione exules spe prædæ. Itaque Landus & Marcoaldus mira celeritate confectis itineribus, superato Pado in agrum Insubrum prouolarunt. Eorum aduentus cuncta ferro ac igne vastantium, magnam trepidationem Mediolanensibus incussit. Pertulere eas clades tantisper Galeacius & Barnabas, donec accitæ vndique copiæ in vna castra cogeretur. Nec multo post instructo exercitu cōtra hostes progressi ad Casã auratæ pagum, signis collatis conflixerunt: eo quidem euentu vt Marcoaldo capto, Landus ipse post cruentū certamen sauciatus effugerit, ferme toto eius exercitu cæso captoque: in quo sex milia equitum & quatuor peditum fuisse narrantur. Secundum eam victoriam Barnabas ad oppugnandam Bononiã profectus, validiores quàm putarat, hostes inuenit. nam Florētini Pisanique, ipsiq; item Principes, Ferrariensis, Mātuanus & Veronensis communicatis consiliis, cū Egidio Pontificis Legato fœdus renouarant, ea mente vt defensa Bononia, duorum præpotētium fratrum vires nimio plus crescere minimè pateretur. Ita vt Barnabas multis illatis acceptisque detrimentis, longo & perdifficili bello implicaretur: & Ioannes Marchio Mōtisserrati à fœderatis incitatus Galeacio graue bellum inferret: captaq; ex insidiis Alba Pompeia, & Ti-

K.iii.



cino vrbe prodeuntibus Guelphis occupata, Anglorū validam manum in Italiam euocaret. Ea gens ex Britannia insula in continentem Galliæ transuecta, cōfectis Belgicis bellis in Prouinciam sese effuderat, stipendia & prædam passim quærens. Sed ea fuit Galeacii felicitas, vt ab Anglis Albam reciperet, & Ticinū variis præliis famēque perdomitum in potestatem redigeret, capto Buffulario cucullato sacerdote, qui nefariis concionibus Ticinensem populum traducens, miseræ vrbis crudelis tyrannus euaserat. His rebus prosperè gestis Galeacius transmissis vndique copiis, Barnabæ vires attenuatas duobus aduersis præliis facile restituit: quibus auctus vir acer & indomitus, tanto impetu Bononiensium agrum populatus est, vt Olegianus desperatis rebus, urbem temerè occupatam Egidio legato tradere cogeretur, quum Firmum Piceni agri urbem, perfidiosæ pactiōis præmium acciperet. Sed quum Barnabas iratus Egidio non secus ac Olegiano, nihil de belli apparatu remittendum arbitraretur, foederatæ ciuitates ingentes copias Vgolino Gōzaga imperatore in agrum Insubrum miserunt, rati Barnabam fraterno periculo adductū, Bononiēsi agro detrahi & trans Padum abduci posse. Sed Vgolinum traiecto Pado & Nouaria capta magnā perturbationē Galeacii rebus afferentem, paribus belli artibus auertit, infecto exercitu Mantuanorū fines ingressus, perruptoque Serralio (quæ est munitio ab amne Pado ad mutinam perpetuis aggeribus suburbanū agrum cōplectens) Mantuanos duce præfidiōque nudatos adeo conterruit, vt Vgolinus vel in ipso felici speratæ ingentis victoriæ cursu, de imperio salutēque ciuiū suo-



rum magnopere sollicitus, pacem petierit, cognationemq; nouo fœdere cōfirmarit. Eo modo pace parta, & Barnaba nihilo secius pertinaci studio Bononiæ principatum, tãquam sibi fraude ereptum, validis armis repetente, Galeacius externas affinitates, decoras hercle regio fastu, sed sibi & posteris damnosas & inutiles quæsiuit, Isabella scilicet Caroli Galliæ regis sorore Ioanni Galeacio filio desponsata, Leonatôq; Britannia regis filio in generum adscito: huic enim ex nuptiis Violantis, quum ducenta milia aureorum nûmum dotis nomine recepisset, Mons etiam Regalis ac Alba Pompeia vrbes cefferunt. Isabella autem quæ Mediolanum venerat, vsque adeo focero grauis fuit, vt ducentis milibus aureorû cōstitit: quanquã Virtutis oppidi ditio, honestissimæque appellationis titulus nouo sponso nomine dotis obuénisset. Leonati porrò aduētum tantæ opes admirabili liberalitate profusæ sunt, dum nuptiale epulum daret, equestres ederet ludos, & Britannos ex generis comitatu supra ducentos, opulentissimis donis adornaret, vt opulentissimorum regum splendorem superasse censeretur. In conuiuio enim in quo Frãcisus Petrarcha inter principes cōuiuas discubuit, singulos ferculorum missus, qui supra triginta fuere, totidem inusitatæ magnificentia munera sequebantur: ea omnia Ioannes Galeacius delectæ iuuentutis Princeps, ad mensam producens Leonato obtulit. Fuere in vno tantum missu septuaginta equi insignes argëteis & sericis ephippiis strati: in aliis verò vasa argentea, hierofalcones, venatici canes, equestria arma, nobiles loricæ, solidôq; ferro splendidi thoraces, galeæq; item & cassides præaltis

K.iiii.



conis exornata, indumenta margaritis picta, balthei militares, postremo præstâtes aliquot gemmæ aureis emblematicis insertæ, & aureæ purpureæque telæ ad viriles lacinias vis ingens. Is porro conuiuii apparatus fuit, vt relatæ demum dapes, ad decem milia hominû abunde peruenirent. Sed non multo post Leonatus quum nouæ nuptæ operam daret, tempestiuûsq; conuiuiis ad patrii moris disciplinam, alieni cæli ignarus intemperanter vteretur, ad Albâ morbo consumptus interiit. Violantésque demû Othoni Marchioni Mōtifferrati nuptui data est, sed nihilo felicioribus auspiciis, quum Otho in montibus Parmensium ab agresti agasone confossus, ignobili fato perierit. Cæterum Galeacius diu antea sæuissimis articulorû doloribus iactatus, quum filius præalta indole, militaris imperii munia capeffens, Asta recepta, Vercellisque defensis subalpinum bellum felicissimè confecisset, in supremum incidit morbum, Nonisq; Sextilibus defunctus est, anno à partu Virginis septuagesimo octauo, supra millesimum & trecentessimum, vitæ quinquagesimo nono: imperii autè vigesimo secûdo. Delectatus est in toto vitæ cursu, quû ex bellicis occupationibus subci sua otia furaretur, nobilioribus literis, historiisq; præsertim: habuitque in honore præstantibus disciplinarum omnium & nobiliû artium studiis præditos: ex iisq; præcipuè Franciscum Petracham paramœna ingenii fertilitate florêtem, cuius hortatu bibliothecam condiderat, quum munere Caroli Cæsaris Ticini celebre gymnasium instituisset. In puniendis reis quû natura planè lenis & exorabilis videretur, ita clementiam cum seueritate miscebat, vt præscriptas leges nō temere præteriret. Magno autem incorruptæ iustitiæ



exemplo fuit Picardonus Vafallius è Vercellis in furca latronum more strangulatus. Hunc Belgici exilii comitem, propterea que ex humili fortuna ad præfecturam ærarii prouectum, indeq; sæui prædonis more, nullo metu pudoreve immensas opes congerentem, repetundarum & peculatus reum populus fecerat, iudicesque damnarant, ita vt Princeps nihil omnino ex damnati substantia in fiscum se reducturum testaretur, liberèque responderet sibi lege agendum videri, atque eo quidem seuerius, quòd supra furti noxam, grauioris flagitii nomen ferret, quando mortaliū ingratiſſimus exitiſſet. Nimia quoque & penè crudeli seueritate in Prætorè ad Vicū Iriæ animaduertit, quòd præscriptos ex indice quosdam exules factiosos atq; ficiarios persequi, captosque statim laqueo necare iussus, propinquorum precibus poenam tandiu suspenderat, donec Ticini princeps adiretur. Ex ea enim cunctatione Galeacius quòd lege actum crederet, amicis supplicantibus facilè damnatorum vitam concessit: ita vt mox Prætor, tanquā officii oblitus, fontibus feruatis, atque his ante carceres spectantibus, securi feriretur. Sumptuoso autem ædificandi studio, magnificisque operibus, Romanæ potentia monumenta luculèter imitatus, Mediolani arcem Porta Iouis miraceleritate construxit, quū antea è regione templi maximi, anteriorem curiam vastis porticibus atque cœnaculis, & media latissima area ad equestres ludos admirandam Actianis ædibus adiunxisset. Pontem verò ex lapidibus Ticino amni Papiæ imposuit, vsque adeo mirabilis structura, vt perpetua contignationis tectū aduersus soles & pluuias, sustinentibus ab vtroque podio filiceis columnis superinduceret, & vtraque pon-



ris capita singulis propugnaculis muniſſetur. Sed arx demum in ſupercilio declivis vrbs ad Boream conſtructa, cōdecoratāque eximiis picturis, ita ſpectantiū oculos ad admirationem cōvertit, vt Petrarcha nihil adulatus Galeaciū, eo incomparabili ædificio, quum cæteris operibus vel maximos Europæ reges anteiret, ſeipſum ſuperſaſſe perſcripſerit. Spatiū enim quadratæ formæ ducentorum ferè ſtadiorum, perpetuo muro circumplexus opportunum, ad omne genus venationis addiderat, fundis nonnunquā antiquis poſſeſſoribus iniquo pretio ademptis, vſque adeo impotenter vt Bartholus è Xyſta familia quum paterno agro pelleretur, iniuriam fruſtra deprecatus, equitanti Galeacio ventrem cultello perfoderet, leui quidem inſlicto vulnere, quum magno caſu in ipſam balthei fibulam cuspis incidiffet. Cæterum in fronte arcis ſupra portam ad viridaria perducentē hoc vel rude carmen in marmorea tabula legebatur, antequam tormentis Gallicis ea muri pars cum inſcriptione perfracta concideret. Extabant ſiquidem lata inſignia gentilitiæ viperæ inſculpta ſcutō, vt moris eſt, ſuperſtāte galea cum frondoſo cono ad ſimilitudinem eius qua in præliis vti erat ſolitus. Id autem eo libētius ne periret appoſuimus, quòd Galeacius tēporario ligneoq; tumulto conditus, dum ad nobile ſepulchrū ferò marmora pararentur, epitaphio caruerit.

*Hac galea Galeax caſtrum defendit et urbem,  
Et ſeruis oppoſitos uiolenter comprimit hoſtes,  
Inque fugam uertit timidam mucrone potenti:  
Tractabitque ſuos ut fratres frater amicos,  
Et ſibi ſubiectos cultu pietatis, et omnes  
Defendit populos, ſibi quos diuina poteſtas  
Credidit, et longam dabit his per tempora pacem:  
Præ cunctiſque piā mens eſt ſeruare Papiam.*





Barnabas in diuersa ætate diuersoque corporis cultu  
pictus & marmore expressus cernitur in Cóchano  
templo:& Comi in æde Diui Iuliani, domoque an-  
tiqua Rusconorum.



**B**arnabas materni aui nomen tulit, eo quidem euentu vt ab Auria gente naturalibus victoriis inclyta, ac innata virtutis nomine maximè superba, feroces ac indomitos spiritus accepisse diceretur: imperiosus enim & immitis & asper euaserat, planè maiores Aurias æmulatus, Brancham, Paganum, Lumbum & Lucianum, qui secundum rei naturalis disciplinam naturali conditione præduram ac atrocem, cruentis exercitati præliis crudeles apparuissent. Sed qui rãtopere seuerus existimari poterat, infracto quodam corporis ac animi vigore, vti semper armatus ac auidè pugnax, vnàque ea demum quæ cuncta vitia præclare cõtegit, & studia militum parat, insigni liberalitate, cæteris eius ætatis ducibus præcellebat. In toto vitæ cursu quum bella continenter gereret, nunquam conquieuit, quòd bella ex bellis fererentur, neque pax stabilis neque induciæ diu vigerent, inter suspectantes ac hostilia ex obliquo moliètes. Id enim vnū ei non iniquæ ambitionis, verum maximè odiosæ pertinaciæ consilium fuit, vt Bononiam Olegiani perfidia sibi ereptam, interceptamque demum fraude Egidii legati, in potestatem redigeret: qua si semel potiretur, Florentini, Lucēs, Pisani, & vicini principes nequaquam diu se tutos fore providebant. Factumque est ex ea contentione vt cum Pontifice coniurarent, coniunctisque maximis viribus pellendos excindendosque Vicecomites arbitrarentur. Propterea conducti sunt communi are in Italiam Angli & Britones



ex Armorico Oceano, Hispanique Albornocio duce, & Hungari demum ex Pannonia Simone præfecto: & postremo iterum euocatus in Italiã Carolus quartus Imperator. Sed bellum varia fortuna vtrunque gestum, eum finem habuit, vt Barnabas non longè à Bononia ad Raphaelis templum profligatus, victusque iterum ad Guastallam, detrimenta accepta nouis victoriis ingenti animo refarciret. Nauali enim certamine in Pado infra Vitellianã hostes superarat, constructaque insigni munitione ad Burgum fortem, ita locum aduersus præsentem Cæsarem defenderat, vt perruptis demum Padanis aggeribus, totum penè fluentem in Mantuanos agros effunderet. Quibus detrimentis illatis, omnibusque iam planè fessis & pecunia exhaustis, necessaria pax, sed non planè stabilis cū Pontifice cæterisque fœderatis facta est, non abnuente Carolo, qui Ariouisto Baioario Vindeliciæ Regulo, Barnabæ propinquo, interprete, quum belli radio in Germaniam vocaretur, accepta pecunia, & confirmata vetere cū Vicecomitibus amicitia, non multo post domum rediit, ita vt Barnabas tota spe recuperandæ Bononiæ decidisse videretur, eo quidem minore cum dolore, quod ad solatium irriti conatus Rhegium Lepidi à Feltrino Gonzaga præsentī pecunia coemptum in potestatem redegisset. Incredibile dictū est quantū vtrique fratrum appetita oppugnataque Bononia cōstitierit, quæ nouem bella ex hisdem causis rediuiua cum supremo amittendi imperii periculo, paucis annis adduxerat. Ferunt enim in bellicos sumptus supra trecentas myriadas signati auri expensas, ita vt mirū videri possit tātas pecunias ex vrbibus imperio subie-



etis imperari atque exigi potuisse, quum ambo fratres pari ac insatiabili mutuae æmulationis libidine ad insaniam ædificantes, multo maiorem pecuniam in calcem & lateres cõtulisse videamus. Inter nobilia opera Barnabæ præstantissimum fuit, Tritianæ arcis pons admirabili vnus tãtum fornicis amni Abduæ impositus, vsque adeo in altũ exurgens, vt tribus superædificatis trãsitoriis aditibus, infimo currus cum machinis & impedimentis, medio equites, summo peditatũ vno tempore transmitteret. Construxit quoque arcẽ ad Romanam portam quæ Conchanæ domui iungebatur, ponte pensili supra tecta priuatarum ædiũ perducto, instar longissimæ porticus, cuius adhuc aliquot intercisa membra supra Crassorum domus spectantur. Brixia arcẽ condidit, quæ ex molli cliuo vrbi imminet. In suburbanis autem Modoetiam, maiorum opus luculenter imitatus, ad Lambri amnis ripas Melenniano in oppido, domum peramplam munitæ arci per similem cum lateritio ponte cõstruxit: & quod egregiæ pietatis opus adhuc extat, laxos carceres Mediolani instituit, in quo egestatis vltimæ debitoribus, & extra capitalẽ pœnam damnatis alimenta gratuito præbentur. Sed vel immensas ærarii diuitias vni dotales sumptus exhaurire facillè potuerũt, quum numerosam prolem nobilissimis Europæ Principũ domibus infereret. Viridem enim Leopoldo Austrio Norici Regulo, Thadeam Stephano, & Magdalenam Federico, Baioariis Vindeliciæ principibus, & Valentinam Federico Cypri regi collocauit, quum Agnetẽ Francisco Gonzagæ, Catharinam Ioanni Galeacio fratris filio, atque item Antoniam & Anglesiam Conrado &



Federico Virtembergensibus Suevia Regulis nuptui dedisset: Lucia subinde Edemundo Britannia Regis filio tradita, ut in remoto etiam Oceano sobole propagaret. Ex filiabus autem nequaquam ex Regina uxore susceptis, generos sibi adsciuit bellica virtute clarissimos, quum Ioanni Acutho Britanno Donninia, & Lucia Lando Germano ad Brigantium lacum pernobile traderentur. Quarum omnium dotes cum luculento mundi muliebris apparatu, vicies cetera milia aureorum nummum excessisse constat. Nec tot sumptus vel immodice facti Barnabam deterrebant, ut quicquam de splendore vite remitteret, quum filios diuersis magnis in domibus, cum frequenti & liberaliter ornata familia alendos arbitraretur. Erant legitimæ proles Marcus, Ludouicus, Rodolphus, Carolus & Mastinus, quibus imperii vrbes atque oppida per æquas partes diuiserat: quum totidem ex dñato coitu susceptis latifundia & domos, honestosque redditus donationis iure tribuisset. Erant ii, Ambrosius, Eustorgius, Palamedes, Lancelottus & Sacramorus, cuius stirpis se esse fatentur ii Vicecomites, qui præcipuam nobilitatem à Matthæo Magno repetunt, quum legitima soboles in Philippo principe defecerit. Ex iis autem Ambrosius tanta militaris ingenii indole supra ceteros omnes emicuit, ut eo duce, Britannisque militibus præfecto, Barnabas cum Romano Pontifice, Ioannaque Apulia regina, Florentinisque item atque Liguribus vario euentu bella gesserit. Sed Ambrosius in Bergomatum montibus quum auidè rebelles persequeretur, præceps datus in insidias, ab agrestibus est interfectus, tanto patris dolore, ut montani vindicarent.



irato patre, supremæ cladis pœnam subierint. Cæterum hæc diuisi imperii sortitio eum habuit euētum, vt quisq; eorum dolore nimis angustæ ditionis, Ioāni Galeacio patrueli multo opulentioris imperii fortunam inuideret, & de eo cuncti sæpe contemptim & criminose loquerentur. Regina siquidē mater, ambitiosa superbāque mulier, iuuenes suopte ingenio elatos & maximè sumptuosos quotidianis sermonibus impulerat vt immoderata percuperent, audendūque & moliendo aliquod insigne facinus, ad præalta, vti generosos deceret, aspirare condiscerent. Sic vt non obscure indicare videretur, sublato patruеле, hoste verius quàm propinquo, ipsos confestim ex opulenta hæreditate potentes & planè beatos euasuros. Cæterum non multo pōst Regina fato functa, Barnabas cum liberis eadem spectare cœpit, vtpote qui tot filios ærario suo graues, prætenui ac ob id infirma ditionis conditione regnatos prospiceret. Sed dū scelestæ consilia miscet, & diri odii cogitationes extendit, Ioanni Galeacio cuncta produntur. Is verò graui callidūque ingenio audita exploratāque dissimulat, & aduersus insidias sese domi & foris præmunit: intimi officii ministeria coarctat, abdicatōque luxu, mensam certis dapibus astringit: custodiam verò corporis ex fidis veteranis adauget, nec arcis limine pedem effert, nisi exploratō, præeuntibus scilicet armatorum turmis, & prætoria cohorte circumfusa. Ante omnia porro ad struendum ex lōginquo dolum, suburbana tēpla supplicabundus sæpe inuisens, conceptæ religionis & demissi pauentisq; animi signa præbet. Quibus artibus vsque adeo in contemptum venit, vt nihil virile



virile vel ab astuto patruo sene cogitare putaretur, & patruales nonnunquam dictarent, aliquanto cū opimo sacerdotio, quā tanto imperio digniorē videri. Itaq; communicato cū paucis cōsilio, edicēs se Mariæ Virginis tēplum (quod est in mōte supra Vareseū oppidū, multis miraculis atq; donariis venerabile) soluēdi voti causa profecturū, ē Ticino Mediolanū contendit. Nec differt Barnabas quin veniēti, honoris causa occurrat: quanquā improuiso aduētū perturbatus pudore metū vincente paululū cūctaretur. Nec multo post Vercellenſi porta prodeuntē, dato signo armati equites inermē & mula vectum cōprehendunt, & in proximā portæ Iouis arcē cū Marco atq; Rodulpho filiis deducūt. At Ioānes Galeacius continēter armata agmina in vrbe introducit, domosq; capti hostis ad excitandā plebem, opportuno astu diripiendas populo præbet. Fit maximus in vrbe tumultus, punctoque tēporis memorabili Fortunæ ludibrio tātæ opes evertuntur: nec quisquam omnino repertus est qui opem ferret, quum amici pariter ac hostes in opulentissimæ gazæ acervos auidē grassarentur, & maledictis Barnabam vti crudelem tyrannum incesserent. Nec in ea licentia publicanos & quæstores uti populo inuisos, vlla vel in sterquiliniis latebræ diu tegunt. Arx quoque ipsa, attonitis custodibus paucas post horas deditur, ē qua septem plaustra elaborato argento & pretiosa suppellectile onusta, signatæque item aureæ monetæ septingenta milia educta fuisse referuntur. Nec tanta calamitas prodigio caruit: domus enim Palatina septimo die ante cladē adeo vehementer de cælo tacta est, vt intimi cubiculi peristromata deflagraret, & Vipe-

L.i.



ra marmorea fastigio superstantes fulminē frangerentur. Vates quoque domesticus cognomento Medicina, ut Nonas Maías eo anno trium siderum coitu infaustas caueret, multo antè prædixerat, & tum in fata sua properantem retentare fuerat conatus: occulta enim vis fati tum maximè vrgebat, quum misero mentis arbitrium eriperet. Euaserat paulo antè Barnabas ad inexpiabile odiū populi, seipso acerbior & sæuior, nihil herclè durum & atrox eius ingenium senecta molliente, quippe qui inopia rapax, infamis auaritiæ nomen immani crudelitate cumularet. Nā præter perpetua inclementer imperatæ atque exactæ pecuniæ detrimenta illata populis, noua etiā ac atrocissima lege promulgata, inquirendos comprehendendosque eos iusserat, qui quinquennio antè contra vetus edictum apros occidissent, aut ex his vel in aliena mensa comedissent, vsque adeo inexorabili dānatione, ut supra centum ex miseris agricolis laqueo suspenderentur, reliqui vniuersa substantia mulctati, exilio solum verterent. Diuiserat enim per pagos venationibus opportunos multa milia venaticorum canum, grauissimo incolarum sumptu alenda curandaque: quum vicatim per familias distribuerentur, & præfecti venatorio apparatus multis cū ministris passim regiones circuissent, tremendo superbæ censuræ instituto, singulos canes ex indicis volumine inspectantes, ut insolenti iudicio quos vellent verberare pecuniæque punirent, quum pari vtique mulcta damnerentur, qui strigosos & graciles tanquam inedia malignè eneruatos, & contra obesos tanquam nimia pinguedine inertes factos, aut impexis villis malè cura-



tos produxissent. At Barnabas in Tritianam arcem ab se ædificatam deductus, septimo carceris mēse, quum regnasset annos triginta, vixisset sexaginta sex, veneno fasellis indito (vt fama tum fuit) extinguitur : eo quidem æquiore animo tolerata calamitate, quòd in manibus Donniniæ Porræ adamatæ antea concubiniæ, in ipsa extrema vitæ sorte non planè miser expiraret. Hæc enim Acuthi Britanni socrus fuit, quæ calamitatis ultro consors, supremum in tantis ærumnis misero seni solamen attulerat. Cadaver Mediolani Conchano in templo tumulatum est: statua equestri ex marmore Lunesi superstite, in eo quidem armorum cultu ac expressi oris habitu quo bella gesserat: nullo tamen epigrammate addito, quum iuxta cubas Regina vxor marmoreo sepulchro tale carmen meruisset.

*Italici splendor Ligurum Regina Beatrix*

*Hic animam Christo reddidit, ossa suo:*

*Quæ fuit in toto rerum pulcherrima mundo,*

*Et decor, & sanctæ forma pudicitiae,*

*Laurea virtutum, flos morum, pacis origo,*

*Nobilibus requies, ciuibus alma quies.*

*Quam patris extollunt Mastini gesta potentis,*

*Veronæ nuptam magnificique Canis.*

*Barnabas armipotens Vicecomes, gloria regam,*

*Naturæ pretium conspicuumque decus:*

*Qui Mediolani frenos & lora superbæ*

*Temperat Ausoniæ, quem timet omne latus:*

*Hac consorte tori felix consorte laborum*

*Exegit longa prosperitate dies.*

*Hanc Deus elegit: secum periturus & inde*

*Spiritus ætherei regnat in arce poli.*

L.ii.





Galeacius Comes Virtutum, qui primus Dux Mediolani à Ladislao Cæsare appellatus est, vti videre licet ex multis pictis cælatisque imaginibus, tale frontis decus præferebat.



## IOANNES GALEACIVS.

**I**N Ioāne Galeacio à primis statim pueritiæ initiis vsque adeo mira grauitatis atque prudentiæ species enituit, quum in eo supra captum eius ætatis, solertia, iudicium memoriæque vigerent, vt eum plerique ex ratione physica citissimè moriturum crederent, aut nunquam tantas præcocius eius ingenii dotes ad optimæ frugis maturitatem peruenturas arbitrarentur. Ferunt enim, sicuti in Petrarchæ vita legimus, Galeacium patrem, quum ex consuetudine consilium aduocasset, multique insignes togati viri in intimum conclaue admissi confedisent, à puero tū fortè intentis oculis procerum ora atque habitū contemplante, per iocum quæsiuisse, quisnam sibi ex eo numero sapientior videretur: tum verò puerum, qui tum erat ferè quinquennis, suspensio vultu considerasse singulos, & demum accessisse ad Petrarchā quē nunquā antea viderat, ita vt blandè arrepta toga, oraret vt se ad patris sellam sessum perducere pateretur: statimque magnum cum admiratione omnibus risum abortum, quod puer perspicaci iudicio, omnium longè clarissimum poetā delegisset. Nec eum per omnes ætatis gradus summa cura à lectissimis præceptoribus atque nutritiis educatū, quin in eundem iudicii morūque tenorem incumberet, natura destituit: à pueritia siquidem ad statam ætatem prouectum in tanta actionum varietate, idem semper ingenii specimen sequebatur, ita vt eius opinionē naturæ præsidio firmatam, corroboratamque multa historiarum lectio-

L.iii.



ne atque usu rerum, nemo falleret, ac omnia vel planè fortuita præsentiaret, consilioque eius fortuna regi videretur. Nec id herclè mirum erat, quum inueterata consuetudine multū ipse solus deambulando meditari, cum peritissimis in omni negotio deliberare, exempla rerum ex annalibus repetere, instituta maiorum quæ euentus belli comprobasset, diligenter imitari esset solitus. Nullæ enim eum voluptates venationis aut aucupii, non alex ludus, non illecebræ muliebres, non sannionum aut scurrarum fabulæ à negotiis auocabant. Exercebat corpus modicè, ad rationem scilicet tuendæ valetudinis: animum remittebat eruditorum colloquiis & frequenti lectione, secretisque item commentationibus ad iustitiam & pietatē reuocatis. Conduxerat enim liberalibus stipendiis omnium disciplinarum professores, qui in gymnasio Ticinensi à patre condito, iuuentutem docerent. Bibliothecam porro in arce ædificatā nobilissimis codicibus refererat, erecto iuxta delubro in quo Diuorum & Martyrum reliquiæ pretiosis distinctæ loculis seruabantur. Ex ordine profitentium celeberrimi tum fuere, qui monumenta ingenii posteris reliquerunt, in iure ciuili Baldus & duo Raphaelles, Fulgosius atq; Comēsis, & Signorolus Amadeus: in philosophia Vgo Senensis & Blasius Pelacanis à Parma, cuius etiam extant in Astronomicis disciplinæque optices, subtilissimæ quæstiones. Tres quoq; medici, Marsilius à Sancta sophia, Syllanus Niger, & Antonius Vacca, quorū commentaria in scholis hodie perleguntur. In tradendis autē Græcæ linguæ præceptis eminebat Emanuel Chrysoloras Byzantius. Sed supra doctores omnium



disciplinarum erat conspicuus Petrus Philargus Cretensis, sacrarum literarum interpres, qui postea Pontifex euasit, & Alexāder quartus est appellatus. Ex hoc præsertim lectissimo genere hominum, & ex iis qui vsu rerum & prudentiæ autoritate valerent, consiliarios vberimis honestatos stipēdiis ascieuerat, ita vt non planè mirum videri posset, postquam ipse perillustri iudicio polleret, si in consilio exactissimè deliberata discussaque ex voto plerunq; felix euentus sequeretur. Cuncta siquidem officia quæ tanti imperii administrationes respicerent, admirabili ordine constabant. Nihil enim in toto humanarum rerum negotio, domi & foris ipso ordine præstantius differere erat solitus, quo vno & ipsa in primis res militaris, & actio ciuilis omnis & domestica disciplina veluti certissima compagine regerentur. Imperia autem iussaque in maximis minimisque rebus de scripto exhibāt, & rerum omnium sumptuariæ rationes amplissimis codicibus mandabantur, ex quibus ministrorum fidē & diligentiam exigebat, per censores quidem spectata probitatis, qui singula ad pœnam & præmium reuocarent. Erant autē in eius aula infiniti propè librarii, amanuenses atque notarii, qui per singula officia rationum præfectis operam nauabant tanta cura religionēque, vt non modò totius imperii vrbium statum redditus, & custodiarum expensi sumptus, sed siquid publicis ludorum spectaculis impenderetur, & quot fercula sigillatim in solennibus conuiujs venirent, & quid claris hospitibus donaretur, ad exemplum atque memoriam scriberentur. Vidimus in archiuorū eius armariis admirandos codices in membranis, qui

L.iiii.



in singulos annos Ducum & Præfectorum, veterano-  
rumque militum nomina atque stipendia, ac alarum  
& turmarum indices continebant, descriptaque item  
exempla literarum quæ in grauissimis gerendi belli  
& conficiendæ pacis negotiis, vel ipse ad Principes scri-  
psisset, aut illi respondissent: ita vt siquis iustam hi-  
storiâ condere velit, non aliunde vberiore certior-  
emque materiam desyderet, quando ex iis bel-  
lorum causæ, consilia & rerum gestarum euentus fa-  
cillimè deprehenduntur. Apud patrem patruumque  
Barnabam Germanorum & Britannorum aduentu  
rudimentum militiæ posuit: nec multo post quum  
vigesimalium tertium ætatis annum impleisset, à patre  
fictitio nomine mancipatus est, ita vt ei in patri-  
monii partem Nouaria, Vercellæ, Asta, Alexandria-  
que traderentur: vt inde Othoni Montisserrati Re-  
gulo semper hosti, nec vnquam quieto, dissimu-  
lante patre arma inferret. Sed dum in eo bello ver-  
saretur, prodentibus Guelphis Vercellas amisit. Al-  
lobrogum enim Regulus (quanquam esset auuncu-  
lus) & Flisci Ligures periculo suo admoniti, Otho-  
nis finitimi iniurias defendebant, acciuerantque au-  
xilia Pontificiarum copiarum, arcemque Ioannis Ga-  
leacii præsidio custoditam circunvallarant, vsquea-  
deo validis circumpositis stationibus, vt Ioannes Ga-  
leacius non semel obsesto præsidio opem ferre cona-  
tus, quod hostes castra castris contulissent, planè cir-  
cunuentus obsideretur, & præsidium urgente fame  
& desperato comœtu ex conditione arcem dede-  
ret. Sed aliquanto infelicius Britannorum aduentu  
arma tractauit: nam à Ioanne Aucutho Britannorum



clarissimo duce , qui ab amicitia Barnabæ discedens, Pōtifici & Florētinis adhæferat , in Brixiano agro acie victus profligatusq; est , vsqueadeo graui accepto detrimento, vt eius Duces fermè omnes cum vexillis ca perentur:& ipse celeri fuga è manibns hostium ægrè sese eriperet . Ab his infauftis bellici muneris initiis, quum satis supérque cum virtutis tum fortunæ suæ periculum fecisse videretur, mortuo demū patre, per legatos bella gerere constituit, quòd vnicus patris hæ res , extra infesti Martis discrimina sibi omnino par- cendum, alienaque virtute quæ pecuniæ mercede pa- raretur, subeundam præliorum aleam existimabat: re- batúrque vti natura cautus exactéque prudens, & vti mox apparuit, consilio quàm manu validior, se domi quàm foris feliciorem euasurum: pollicentibus præ- fertim ex genitura Mathematicis , maximas opes, adauctum imperium , hostium calamitates , sum- màmque item gloriam , si armorum pericula deu- itaret . Neque fatidici vates , aut ipse naturæ genius humanæ voluntatis arbiter, fidem fefellerunt . Pau- cis enim annis admirabiles adeptus victorias, ita ini- micos perdidit , cæcidit hostes , imperii fines protu- lit, vt arridentis fortunæ fiducia subnixus, totius Ita- liæ regnum affectasse crederetur. Iam enim eum La- dislaus Cæsar nouo honoris titulo honestarat, quum ex solennibus codicillis primum Mediolani Ducem, scepro pileoque eius dignitatis insignibus per le- gatos transmissis, appellasset. Formidandæ siquidem erant opes longè omniū amplissimæ, vel ob id quòd ambitiosi principis summæ prudentiæ, veterano mi- lite , strenuísque eius & præclarè fortunatis Ducibus



niteretur. Scaligeris enim Veronam atq; Vincentiam ademerat, atque item Carrariensibus Patauium, Francisco Seniore in Modoetianum carcerem coniecto: præterea Taruifium, Feltrium, Bellunum, montanâq; oppida cum Tridento in potestatem redegerat: Perusini & Assisates ad eum à Pontifice defecerant. Senes radio incertæ libertatis ad eius authoritatem, sicuti antea & Pisanis acciderat, se contulerant, quum nec Lucenses imperium eius abnuerent. Propterea Florentini non obscuro perculsi metu, potentissimi hominis vim suspectantes, ei vndiq; circummissis per omnem Europam legationibus, graue bellum concitabant: Roberto præsertim Cæsare in Italiam euocato, & Gallis duce Armeniaco cis Alpes perductis. Sed eos externarum gentiû conatus ita sustinuit, vt Gallos virtute Iacobi Vermii ad Alexandriâ ingenti pugna superatos, interfecto duce deleuerit, Cæsaremque à Brixianis Alpibus se demittere ausum, opposito Facinio Cane primas Germanorum alas profligante, in Germaniam retruserit. Exinde iniurias ultum ire, pergens, Franciscum Gonzagam Mantuæ obsessum, & deriuatis ex Pado atque Athesi emissariis, penè summersa vrbe, pacis condiciones accipere coegit. Nouissimè ad Casalecium iuxta Bononiam, Pontificis, Florentinorum & Bononiensium ingentem exercitum Bernardone Aquitano fortissimo duce capto, collata acie profligauit, ab eâque statim victoria, vrbe Bononia potitus est, pro qua ab excessu Ioannis Antistitis per quinquaginta ferè annos fuerat dimicatum. Nec multo post victrices copix in Etruriâ transcenderunt, tanto terrore Florentinis illato, vt demissi animo ci-



ues, nequaquã in domesticis præfidiis, sed in vna tãtũ impotētis ac irati hostis morte salutē reponerēt. Nec susceptis votis fortuna defuit: in arce enim Melēiani Romana via supra Lambrum pestilenti febre correptus excessit è vita, pridie Nonas Septēbris, anno à partu Virginis supra millesimũ, quadringētesimo secũdo, quũ ætatis annũ quinquagesimũ quintũ attingeret: imperasset autem annis viginti quatuor. Duos ex Catharnia Barnabæ filia, filios impuberes Ioannē & Philippum reliquit, quum ex Isabella Caroli Galliæ regis filia, priore vxore nullam prolem suscepisset. Ad instaurandam autem cum Gallo rege propinquitatē Valentinam ex eadem Catharina primo partu genitã, Ludouico Aurelianorum principi, Regis filio, nuptui dederat. Quo cõiugio Asta Colonia dotis nomine Valentinæ obuenit: ad liberos verò eius, hæreditatis titulo, Mediolanensis imperii iura transierunt, quum Valentinæ fratres sine legitima prole decessissent, sinistro quidem omine ac insigni detrimento Italiæ Galliæque, quandoquidē in repetenda hæreditate diuturnum & atrox bellum sit exortum, cuius adhuc nullũ omnino certum finem videmus. Arsit per aliquot dies ante eius mortem cometes ingens, lurida & prorsus funebri oblonga cauda, versus eã cæli plagã quæ in corum ventum obuertitur. Nec eo cælesti prodigio indignus videri potuit, quum nemo Principũ in Italia, à Gothicis vsque tēporibus repetita memoria, imperii magnitudine & vitæ splendore eo clarior atque potentior extiterit. Quòd si victorias inter fortunæ munera numeremus, nemo certè ei vel innatæ grauitatis atque prudentiæ opinione, vel ipsa oris ac



corporis dignitate, vel exornandæ virtutis studio, ad censum veræ gloriæ veniet comparandus: quanquam tanti nominis famam prægrauasse videatur patruus Barnabas exutus regno, in Tritianóque demum carcere necatus: ac immensa proferendi imperii cupiditas. Sed hanc quisque non iniquus & moderatus tyrannus C. Cæsaris exēplo facile excusauerit, si regnandi causa iusiurandum omnino violandum existimet: & ipse Ioannes Galeacius vti nimis in exercenda sæuitia tempestiuus, Barnabā pares ac immeritas struentem insidias, rectè præoccupasse minimè censeatur. Contraxit tamen inuidiā eius animo grauem, vti sæuè rapax ac immitis, atque perpetuus vrbium suarum expilator, quum à subiectis imperio concepta odia detegi exerceri que nequirent, quæ demū in morte eius per singulas vrbes eruperunt. Neque enim perpetuo tributorum onere fessis, satis digna tolerandæ iniuriæ causa videbatur, accersita sæpe vltro gerendi belli necessitas, quod nunquam ex bello pacem expeteret, sed ex pace semper alia atque alia bella quærerentur. Nec mirum, quum ferendis bellis viginti millia equitum & totidem peditum perpetuò alenda suscepisset: nec vllis omnino sumptibus parcēdum arbitraretur, modò fortissimum quenque ex omni militari ordine inuitatum vberioribus stipendiis, ob idque facile detractū hosti, sibi adscisceret. Profiteri enim erat solitus, nihil esse ea mercatura nobilius qua viri insignes pararentur. Obiectauit & ei probrosas libidines in historiis Antonius Florētīnorum Antistes, inepto ac improbo maledicendi genere in hostem patriæ insolenter inuectus. Nullum autem eius ædificium paulo lu-



culentius extat, quum maiores eius vsque ad infaniã domi & foris, curias, arces, prætoria sumptuosissimè condidissent. Singulari tamen pietatis & magnificentiæ studio, Carthusiæ templum cōstruxit ad quartum lapidem à Ticinensi paterna arcè, vbi ferarum septa terminantur: addictis in alimenta sacerdotũ latifundiis. In eo templo humari voluit: spectatũque post aram maximam cælati operis admirabile sepulchrũ, subscriptis ad historias rerum gestarum quæ marmoreis imaginibus decetissimè figurantur, his carminibus, non omnino indignis vt alibi quàm Carthusiæ perlegantur.

*Quum Ducis Anguigeri varijs diuisa sepulchris  
Membra cubent: sic iussit enim: nam viscera seruat,  
Antoni, tua sancta domus celebrata Viennæ:  
Cor Ticinensis Michaël, Carthusia corpus:  
Hic quoque ad æternum populi patriæque dolorem,  
Vexilla & clypei, & lachrymosæ insignia pompæ,  
Exequialis honos, monumentum flebile pendet:  
Instar & hoc tumuli semper memorabile nostris  
Impositum signum est oculis. Lege Principis ergo  
Hic etiam titulos, nomēque genũque supremi  
Cuius ab Angleria primus quos protulit olim  
Natus ab Ascanio, Troiani sanguinis Anglus  
Comitibus, si prisca petas primordia clari  
Nominis, atque domus Viæ comitis extat origo.  
Talibus exortum proavis dixere Ioannem  
Nunc Galeax, quo non fama uulgius ullum  
Nomen in orbe fuit, factis ingentibus heros.  
Ille quidem Anguigeram super aurea sycera gentem  
Extulit, & sese uirtute æquauit Olympo.  
Dux Ligurum, patriæque pater, Comesque Papiæ  
Virtutumque fuit: quantum splendebat in illo  
Imperiosa oculis uis maiestatis, & altæ  
Frontis honos, tantum specie moralius ibat  
Altior, ut dominum sola esse doceret imago.  
Quantum lux animi speciosa in corpore fulsit,  
Cognita per uarium testantur plurima casum  
Consilia altæ Ducis: cuius pietasque fidēque  
Sacraque iustitia & clementia sanguinis expers*




Innocuam fecere animam. Nec dulcior alter  
 Eloquio, nec magnificis præstantior alter,  
 Nec fuit in totis Europæ sinibus unquam  
 Aptior imperiis Princeps, nec sanctior alter  
 Religione fuit, nec pacis amantior illo:  
 Hanc propter sæpe auspicijs iusta arma secundis  
 Induit, et claros superato ex hoste triumphos  
 Cepit, et ultrices (qua nulla est gloria maior,  
 Nullaque compositæ maior constantia mentis)  
 Ipse sui victor, de pectore depulit iras,  
 Permisitque pius victis ad sana reuerti  
 Consilia, et medijs pacem quæsiuit in armis.  
 Ipse graues populis cruda de sede tyrannos  
 Deiecit, fregit tumidos, strauitque superbos.  
 Hic erat unde quies magnorum certa laborum  
 Italia speranda foret: Duce læta sub isto  
 Illa sibi antiquos iam promittebat honores:  
 Nanque uidebatur cælo demissus ad unum  
 Natus, ut indeptis componeret aurea terris  
 Sæcula, et afflicto tandem daret otia mundo.  
 At deus Ausoniae dederat quod sydus agenti,  
 Transtulit ad superos, siue illo ornare beatos  
 Angelico sue Choros uoluit, seu lumine tali  
 Indignam est ratus Italiam, mundumque nocentem,  
 Consilij ratio alta latens et causa superstat.  
 Sed nos o miseri quorum ille piissimus heros  
 Desistit optatæ nunquam uigilare salutis:  
 Flete Ducem Ligures, talem lachrymate parentem  
 Vosque urbes uiduæ, Princeps quas ille sub altis  
 Felicias sæptisque suis cum pace fovebat.  
 Aeternas oculis lachrymas effundite uestris:  
 Ante alias Mediolanum patria inclyta magnum  
 Principis atque caput tantæ ditionis, et olim  
 Longobardorum domus augustissima Regum,  
 Magnanimoque Duci nuper gratissima sedes  
 Papiæ, illustris titulus quas fecerat urbes:  
 Et uicina sequens matris uestigia Laude  
 Urbs Pompeiana de laude uocata triumphis:  
 Brixia ciuili nec enervata duello,  
 Funde pares lachrymas, quibus alta Verona, sororque  
 Ingenijs ornata bonis Vicentia, duris  
 Cognita temporibus, paruaque in montibus urbes  
 Bellunum, Feltrumque adeant, et pulchra feraci  
 Planitie Cremona sedens, memorisque laborum  
 Verællæ, antiquis tellus agitata procellis,



Pisco summe Comum, populòque animosa superbo  
 Bergoma, et occiduis quas nunquam uictor adiuit,  
 Nomen Alexandri retinens urbs fertilis oris:  
 Quæque tot egregios in prælia mittit alumnos  
 Parma potens animis, et opima Placentia campis,  
 Et Bonium, et uicina malis urbs ducta priusquam  
 Sub Ducis Imperium, et iuga non metuenda ueniret.  
 Te quoque Lucensis regio, licet obruta Lunæ  
 Mœnia sint, reliquis plorantibus urbibus addas,  
 Quas inter magno est lacerata Bononia fletu  
 Et gemitu, et lachrymis proprium confessa laborem,  
 Quæ sibi sydereos subito mors improba uultus  
 Principis eripuit, nec passa diutius illam  
 Maiestate frui, dulcis et dulcedine sæpti.  
 Ite simul, sic facta iubent, sociare querelas  
 Urbs Pise, quondam Tyrreni Roma profundi.  
 Massa que Corsetum manu uehat inclita secum,  
 Et cum uicino turrita Perusia ploret  
 Afflito, et mœstæ saliant ad sidera uoces.  
 Romanum gemat Imperium, Romanæque plangit  
 Ecclesia, hi lachryment oculi duo lumina terræ.  
 Raptus uterque pugil, Latius quo maior in oris  
 Non erat: ex Italis Germanos depulit hostes  
 Finibus, et Gallos bello confixit ærbo,  
 Ante Quirinalem posset quam cernere Romam:  
 Mille quatercentum atque duos quum duceret annos  
 Sol, hunc atra dies Septembris, tertia ademit.

## IOANNES MARIA.

 Oriens Ioannes Galeacius ad testamē-  
 tum antea ritè cōditum additis codi-  
 cillis, Ioānem Mariam maximæ partis  
 imperii, nouique tituli hæredem insti-  
 tuit, ea conditione ut Philippus Papiā  
 urbem obtineret, Nouaria, Alexandria, Asta, Vercellis  
 atq; Derthona adiunctis, Papiæ comes appellaretur:  
 Gabrieli autē ex Agnete Mantegatia spurio, qui erat



legitimis ætate superior, Pisas Cremamque legauit. Atq; ita Ioānes Maria desumpto Ducis nomine, susceptisque paternæ dignitatis ornamentis, ad imperiū euectus est, funestis utique auspiciis: nam illico ciuile bellum exarsit, Gibellinis & Guelphis inter se vecordi impetu concurrentibus: ex siquidem diræ factiones contempto adolescente Principe, vetera ciuium odia refricarant, quæ superiorū Principum virtute, sublata videbantur. Is longè grauiissimus & summè lugubris tumultus, non vrbibus modò atque oppidis, sed pagis agrestibusque familiis eodem insanix morbo correptis vastitatem attulit, quum cædibus ac incendiis grassari, cognatis ac affinibus vltimā vim afferre, & sacra deniq; nō secus ac profana violare fas esse putarēt, qui virtutis & gloriæ loco ducebāt, si ad ostēdendum insigne factionis studiū, maximè crudeles euassent. Sed dū Mediolani per singulas regiones cruēto euentu alternante fortuna certaretur, eadē pestilētis mali fæua lues reliquas Imperii ciuitates celeriter inuasit, insigni quidē perfidia Præfectorū & Ducū, qui orientes tumultus quum facilè opprimere possent, turbidis rebus magnopere gaudebant: ut dum modò his, modò illis fauentes, altera partiū expulsa, altera verò attritis fessa viribus, ipsi è medio subnixi validis præfidiis, vrbium dominatus arriperent. Per hunc modū nullo pudore violati militaris sacramenti, Pādolphus Malatesta Brixæ & Bergomi tyrannus effectus est: cuius factū vel infame scelestūmq; subsecuti Gabrinus Fūdulus Cremonæ, Facinius Canis Papiæ atq; Alexādria, Ioānes Vineatus Laudi Pompeiæ: Cremæ Benzones, Placētix Arcelli, Othobonus Tertius Parmæ,



ma, Frāchinus Rusca Comi, & Brusati & Tornielli quondam exules, Vercellis atque Nouariae dominatū inuaserunt. Qua foeda & repentina Ducum atque urbium defectione terrefactus princeps, docente & hortante matre, consilium suscepit de creādo gubernatore, qui militari cum imperio urbē regeret, & salutē dignitatēq; principis praesentibus armis tueretur. Veteres enim cōsiliarii amicique quos pater in tutelam adolescentis reliquerat, diuerso aestu turbulentae tēpestatis iactati, aut securi colla praebuerāt, aut exanthorati, aduersariis locū occupātibus, metu mortis longē diffugerant. Itaque Mediolanū accersitur Carolus Malatesta: is introductis copiis, factionum audaciā coercet, praclarum restituendi imperii & parandae quietis studium ostendit, fratrisq; filiam principi in matrimonium collocat. Sed non multo post, quod Guelpharum partium nomen praeferreret, vrgentibus Patritiis Mediolano excedere cogitur. Euocatus subinde est in eius locū Facinius Canis bello dux impiger, sed impensē rapax & vehementer factiosus. Verū is multis expeditionibus prosperē confectis, quum parum æquus & reipublicae utilis foret, quod Gibellinarū partium se defensorē & ducem profiteretur, Guelphorum insidiis petitus, ac vrbe vsque adeo violenter exactus est, ut cum circumfusus in eum coniuratis, ne caperetur per auersam Actianae curiae portulā adacto equo in fugā se proriperet, & contusa vehemēter frōte in valuarum angustiis elideretur, relictōq; coccineo capitis integumēto, continēti cursu Rosatum vsque percurreret. Tū verò Guelphi Antonio Turriano cohortante, qui apud principem vel ipso fami-

M.i.



liæ nomine antiquissimus hostis plurimū gratia valebat, Ioannē Mariam perpulerunt vt in Facinii locū cum eadem imperii potestate Bucicaldum Gallum euocaret. Is tum à rege Galliæ deditis vltro Liguribus præpositus Genuæ præsidem agebat, vir corpore pariter & ingenio vastus. Itaq; stipatus Gallis equitibus quum Mediolanum venisset, ante omnia infido consilio, vt arce potiretur, custodis animū oblata pecunia tentauit. Id facinus malignè susceptum quum minimè ex sententia processisset, cuncta ad superbum arbitriū reuocāda ratus, edictis propositis & de nomine percussa moneta, ita impotētis animi libidinem nudauit, vt non Ioanni Mariæ modò, sed vtriusque etiam factionis ciuibus in suspicionem affectati principatus deueniret. Sed dum Mediolani hac inani spe immodicos spiritus alit, atque odium sibi ingens parat, illudente Fortuna votis eius, Gallica præsidia, occiso à Spinulis Serratone præfecto, Genua pelluntur, Theodorúsque Montifferrati Regulus, strenuè operā nauāte Facinio, Genuæ Princeps acclamatur. Quo nūcio perterritus nec temere sibi timens, priusquā tanti accepti incommodi fama vulgaretur, simulata expeditione in Ticinenses, copias Mediolano eduxit. Sed Facinius euadentem ad Nouium oppidum adortus, adeo opportunè commissā pugna profligauit, vt Bucicaldus amissis copiis, Genuæ & Mediolani præfectura vno tempore exutus, per asperos Alpium tramites in vltiorem Galliam perfugerit. Hic est ille Bucicaldus qui Gabrielem Ioānis Galeacii filium auaro truculentóq; iudicio Genuæ securi percussit, vt prægrandi ea pecunia potiretur quæ illi obuenerat, quum Pisas



Florentino senatui vendidisset. Per id tempus Ioannes matrem amisit, tãtis curis, vti erat corpore imbecillo, facillè succumbentē: cuius nihilo meliore consilio, non multum antea, vt propinquas vrbes facilius tueretur, aut Tyrannis eriperet, ceteras quæ remotæ ditionis essent, Bonifacio Põtifici tradendas censuerat, scilicet vt eo insigni munere inanem promereret amicitiam, & tutelare fœdus afflictis & planè perditis rebus impetraret. Per hunc modũ Bononia tantis impensis atque laboribus parta, ac item Assisium atque Perugia Vmbriæ vrbes Mediolanensi imperio adiectæ, quum ex calamitate leuitatēque Ioannis, Fortuna eodem pertinaci vestigio nixa, alienæ felicitati vehementer aspiraret, in ditionem Pontificii imperii cõcesserunt. Pari quoq; ignavia aut desperatione Senensibus ex vario tumultu desciscentibus, libertatem cruentis admodum seditionibus implicatam reliquit. Caterum nihilo secius Mediolani certabatur, recrudescētibus ciuium odiis per mutuas cades, quod neque victi vindictæ cupiditate pacem vellēt, neque victores victis inducias, tanquam successu inutiles, dandas putarent. Quibus rerum difficultatibus adductus Princeps, quod vnum omnino remedium in tanta ciuitatis perturbatione tranquillitatē afferre posse videbatur, Facinio datis obsidibus, sese recõciliat, eumq; iterum accersit, & bellicarum ciuiliũq; rerum moderatorem cum suprema potestate creat. Eius aduentu Guelphi qui sub Bucicaldo insolentes euaserāt, arma posuerunt: quiescentibusque demum Gibellinis atq; vrbe pacata, Facinius Bergomatibus bellum inferre iussus, trans Abduam ducto exercitu, rebellantis

M.ii.



urbis agros omni belli clade vastauit. Sed dum Bergomates cōsumptis hostili igne suburbanis tectis, nequaquā extrema pati & sededere decreuissēt, Faciniū articularis morbi renūmq; dolores vsqueadeo grauiter atq; lethaliter inuaserūt, vt abscedere irritō incōpto, Papiāmq; deferri cogeretur. Is morbus qui Facinio supremus fuit, nouādis rebus occasionē prābuisse fertur: summā nanq; audaciā turbulēti ciues in necē Principis cōiurarūt, in queis eminebāt Baucii fratres Andreas & Paulus ex intimis familiaribus, itēq; duo Pusterlæ pernobiles, & ex Maina familia, Frāciscus Mātegatus & Acontius Triuultius. Hos tanquam duces ex vtroque factionis ordine alii supra triginta sequebantur: neque fuit quisquam ē tanto numero qui in summa spe amplissimi imperii fidem prodendo fallere, quā vitæ periculū vel suspecta consciorū multitudine, subire maluerit. Oderant enim eū omnes tanquam inusitata immanitatis Tyrannum, quōd in tanta per nouem annos ærumnoli imperii rerum omnium asperitate, insanæ feritatis mōrbum concepisset vsqueadeo horrendum, vt iracundia in rabiem versa, damnatos ac sibi inuisos, voracissimis canibus laniādos obiiceret, atrocīq; eo spectaculo magnopere lataretur: haberētque in delitiis Squarciam Giramum alioqui honesta ortū familia, inhumanæ fauitiæ ministrum, qui ad eam carnificinam ingentes molossos humana carne alendos suscepisset. Diis itaque ac hominibus tale monstrum abominantibus, postridie Idus Maias sacrorum causa in tēplum diui Gothardi descendentes Baucii Fratres, reliqua coniuratorum manu incumbente, duobus vulneribus confecerunt,



discissa vsque ad oculos fronte, & dextro crure ad surā detruncato. Exanimē & aliquādiu ab omnibus desertum pauci ex infimo familiæ ordine in templū maximum detulere. Ibi quū fœdis vulneribus & multo cruore deformatus nō sine ludibrio spectaretur, proletaria meretrix tempestiuæ pietatis officiū vsurpās, rotum cadauer multa recenti rosā contexit. Inde postea à Philippo successore opulentam dotem, vt honestè nuberet, ingenuæ charitatis nomine promeruit. Eodem die Giramus scelestus carnifex concursu populi latebra eductus quum viuus vnco traheretur, pro ianua damnatæ & mox ad solum æquatæ domus, horribili meritōque supplicio affectus est. Ipse quoque Facinius copiarum imperator, quum ei insuperabilis morbus vitæ finem afferret, nunciata cæde principis, duces militēsque suos obtestatus est vt percufores persequerentur, Philippoque ad principatū hæreditatis iure contēdenti fortem atque fidelem operā præstarent. Paucas post horas expirauit, magno hercle coniuratorum commodo, qui nemine principis cædem vindicante, Hastorem Barnabæ ex concubina filium bello strenuum paternósque spiritus gerentem, magnis acclamationibus ad principatum extulerant.





Verus Philippi vultus cū in aurea moneta, tum va-  
 riis picturæ calaturâq; modis passim expressus spe-  
 ctatur. Sed eam effigiem longè omnium ex viuo si-  
 millimā putamus, quam Frācisus Tabernius epi-  
 stolarū magister, maximi cōclauis ianuæ imposuit.



## P H I L I P P V S.

**I**oanne Maria interfecto, atque eodem die expirante Facinio, Philippus qui captiuo per similes incertusque salutis in arce Papiæ supremum vrgentis Fortunæ impetum expectabat, inopinato Facinii dudum hostis munere subleuatus, animum erexit ad non dubiâ sp̃e recuperandi principatus, cohortatibus Facinianis Ducibus, qui quum in supremam morientis Imperatoris sui voluntatē per coniunctas dextras fidem datam fallere nefas esse putaret, vti viri militares etiam gerendo bello materiam quærebant. Deerat pecunia, exercēdæ virtutis neruus, sed ea subituario prouentu à Beatrice Tenda vxore Facinii celeriter impetratur, propositis cū nouo principe nuptiis, quas ipse Facinius in extremo vitæ actu suasisse ferebatur. Nec eas abnuuit Philippus, quāquam ætate fortunæque impares. Itaque leuis mulier intempestiuæ libidinis & maioris imperii auida, vix deterfis lachrymis, inauspicati coniugii torum subit, quaterq; centena milia aureorum nummūm dotis nominē dinumerat. Nec mora instructo exercitu Philippus Mediolanum contendit: obsidebat arcem Hastor circumualatam magnis operibus: sed ductu Francisci Carnagnolæ Castelliniq; Beccariæ, Philippi milites munitiones perrumpunt, Hastorēmq; ad Comensem portam accerrimē resistantē profligant. Tum verò Philippus urbem ingressus per præcones in cōpitis pronunciari iubet, se nemini, exceptis fratris percussoribus, hostem futurū: statim acclamatus princeps fin-

M. iiii.



gulari totius populi studio in curiam Aetianā deducitur. In eo tumultu Paulus Baucius & Franciscus Mainus principes cōiurationis & cædis, intercepti terribilissimo supplicio admissi sceleris pœnas dederunt. Exinde Philippi duces ad oppugnandam Modoetiam, quò se receperat Hastor, profecti sunt: nec multis inde diebus id oppidum in potestatem deuenit, & Hastor qui in arcem refugerat, quum ad puteum sederet, tormenti in incertū emissi lapide coxâ ictus, interfectus est. Extincto graui æmulo & propter studia Guelpharum partium magnopere metuendo, Philippus auctis opibus Tyrannos adortus incredibili felicitate, aliquot vrbes paterni imperii recuperauit: Pandulpho imprimis Malatesta Bergamo Brixiaq; depulso, Ioanne Vignato Laudensium Tyranno capto, & latronum more in furca suspenso, Arcellis Placentiæ necatis aut in exilium pulsis, & Franchino Rusca qui Comum occuparat, certa præmii conditione ea vrbe eiecto. Verū incredibili lætitia Philippū affecit Gabrinus Fundulus Cremonensium Tyrannus felici astu captus. Is quū medio in foro Mediolani cōspecta supplicii machina ceruices securi subdere cogeretur, hortareturq; eum de more cucullati sacerdotes, vt ex disciplina Christiana composito animo vitæ exitum ferret, patrorumque scelerum, sperata inde à Deo maximo venia, rite pœnitere vellet, cōtortis atrocibus oculis, Desinite (inquit) mihi indignè perfidiosæque proditorum molesti esse: nā tātū abest vt me iure belli rectè factorum pœniteat, vt maximè etiam doleam quòd Papā simul ac Cæsarem ad immortalem clarissimi facinoris famam, è mea turre minimè præcipitarim. Paucos



enim ante annos Balthasare Cossam, Ioannis XXIII. nomine Pontificem, & Sigismundum Imperatorem hospitio exceptos, studioque peramoeni atque admirabilis prospectus in summam celeberrimam turris coronam inuitatos, incessente atrocem animum dira libidine, in subiectum forum prouoluere cogitarat: neque alius omnino vel grauissimam rei respectus, duo totius orbis lumina seruauit, quam in summam nefario Tyranno non ignobilis obortus pudor, ne hospitalis mensa decus, cui ipse honoris causa conuiuia adhibitus eo die fuerat, non crudelis quidem sed ingrati animi piaculo foedasse videretur. Caterum Philippus & fratrem eadem & Tyrannos probe uirtus, fretusque mirifica uirtute clarissimorum ducum Carmagnolam & Nicolai Picinini, ad recuperandas remotiores paterni imperii urbes animum adiecit. Veronam enim Veneti, Pisas Florentini, & Bononiam Pontifex Romanus ademerant. Sed ab eo consilio non iniquo iure suscepta bella gestaue demum per triginta & septem annos aliquanto maiore uirtute quam fortuna, totius Italiae urbes grauissimis cladibus affecerunt: eumque postremo belli euentum Philippus tulit, ut conspirantium inter se liberarum ciuitatum consilio atque opibus impar, Bergomum & Brixiam amitteret, & Genue dominatu pelleretur, quum ipse domi sederet, paternoque exemplo, sed nequaquam pari fortunae conditione, gerenda bella per legatos arbitraretur. Verum in hac perpetua & semper ancipiti difficillimarum rerum agitatione, maximam constantiam & generosi consilii laudem tulisse uideri potuit, quum septies terrestri aut nauali acie victor saepeque victus, eosdem semper spiritus ndomitae uirtutis gesserit. Intentus enim & erectus



ad tuendum nominis decus, quum sæpe fortunæ aleâ subiret, nullo sumptu nullôq; periculo deterri poterat, quanquam natura esset pertimidus, vsque adeo vt vel mediocri tonitru audito formidine quateretur, & subterraneas latebras amēti similis quæriraret. Secreto cubiculo maximè gaudebat, quòd paucissimos admittere, arcere salutātes, negocia tractare per interpretem, & denique formidare cœtus hominum soleret: hebetata enim oculorum acie quòd adeuntiū facies nō planè discerneret, assiduo nomenclatore & monitore dissimulanter utebatur, ne omnino captus oculis à minus familiaribus putaretur. Oblectabat autem ocium historiarum lectione, quarum Antonius Panhormita, literarum nomine præcipuo in honore habitus, aliquādiu fuit anagnostes. Verum incolumi adhuc oculorum lumine, libentissimè adolescentium pila ludentium aut luctātium certamina, obducto ad fenestram speculari vitro despectabat, vt ludentes eū spectare nescirent, quū tamen adesse crederetur. Inde enim formæ decus, explicatos artus animique vigorem inspicere, & quos ex eius exercitationis indole maximè probasset, ad mensæ cubiculique ministeria deligere erat solitus. Sed eam voluptatem Candidus December illius ætatis scriptor iniquo felle turgidus, quum omisissis laudibus quæ in Philippo celebrandæ fuerant, vitia notaret, ad suspensionē libidinis reuocauit. Erat utiq; Philippus in flexu præsertim ætatis, ingenio suspicaci, feruido, mobili, sæpèque sæuo, quū teneræ eius aures delatorū aculeis figerentur. Nec deerant ex intimis amicorum factiosi alienæque laudis obtrectatores, qui rectè sentientem sæpissime deprauarent: inter quos Oldradus Lamponianus ab adoles-



centia cubiculo assuetus, gratia autoritatēque tantū valuit, vt Carmagnolam summū ducem magno Philippi incommodo alienare extruderēque potuerit. Adiit & graue salutis periculum ipse Franciscus Sfortia iam ascitus gener, falsis scilicet criminibus oneratus, quū vno innocētiae præsidio vel à multis beneuolis ægerrimè defenderetur. Verū Philippus ingrati fauēque animi infamia sese turpiter fœdassee visus est, quum Beatricem vxorem adulterii cum Orumbello Citharædo admissi ream, nec in tormentis quicquam contra pudicitiae decus confitentem securi percussit, quasi imparis coniugii pertæsus, cuius non dubiis auspiciis ad imperium peruenisset: vt demum Amadei Sabaudii filiam euentu sterilem duceret, non sine dote modò confectis nuptiis, verū vt soceri societatem promereret, vltro traditis Vercellis. Id quoque famam eius vehementer premit, quod in amore odioque instabilis, tum maximè firmus atque inexorabilis euaderet, quum veteres iniurias nouis beneficiis nequaquam pensandas arbitraretur: vt in Castellino Beccaria mox apparuit, non ob aliam causam in carcere necato, quā quod recentis operæ fideliter strenuēque præstitæ oblitus, veteris perfidiæ qua Papiam Facinio prodiderat, meminisset. Sed vno memorabili inusitata virtutis præconio Philippus vitiorum labes præclarè deterfit aut operuit, quum Alfonso regem nauali prælio ad Pontiam superatum & captum, incredibili benignitate magnitudinēque animi non custodia modò liberarit, sed excultum eximiiis muneribus, & prægrandi pecunia instructum, ad repetendam Neapolim dimiserit: rarissimo quidem & incomparabili generosæ clementiæ exemplo, si in



decerpenda gloriosi prouentus laude, superiorum ac eorum qui postea toto orbe regnarunt, principū animos nobili censura metiamur. Superauit etiā maiores suos domestici splēdoris munificentia, quum clarissimos hospites acciperet, in quibus fuere Martinus Columna Pontifex maximus cui marmoream statuem posuit, & Sigismundus Imperator ingentibus donis cū vniuerso comitatu liberaliter expletus. Excessit è vita nōdum sexagenarius ex atroci febre, & in multam bilem soluta repente aluo, pridie Idus Augusti, anno à partu Virginis quadregesimo octauo supra millesimum & quadringentesimum, quum circunuentus Venetis armis, & Mediolani ferē obsessus, Franciscum Sfortiam generum diu antea pro hoste habitum, opportunēq; in gratiam receptum, è togata Gallia euocandum curasset, vt grauissimis hostibus summæ virtutis atque felicitatis imperator opponeretur. Ferunt eum iusto odio contra Venetos æstuantē, diu agitasse animo an Alfonso regē genero præferret, imperiūq; hæredem relinqueret, vt eo inclyti opulentissimique nominis propugnatore, ambitiosæ & præpotentis Venetæ gentis audacia frangeretur: sed amore Blancæ filiæ quæ iam Galeacium Sfortiā ad spē imperii in agro Piceno pepererat, generum eundēque solenni adoptione filium prætulisse, præcipuis supremi decreti suasoribus Andrea Birago & Petro Pusterla: quum diuerso studio Brocardus Persicus & Franciscus Landrianus pro Alfonso contententes, victique suffragiis, ab sententia popularis inuidiæ plena discessissent, multis ciuiū indignatibus, quod pro homine longē omnium humanissimo atque fortissimo, qui iam adoptione filius, Blancæque vnicæ Phi-



lippo genitæ maritus atque obiter Vicecomitū stirpi  
 infertus esset, externi sanguinis ignotâq; linguæ, sus-  
 pecti denique ingenii vir, stultissimo paucorum cōsi-  
 lio ad patris dominatum vocaretur, quasi non bre-  
 ui colonis Hispanis urbem Mediolanum totâmq; In-  
 subrum regionem ad non dubiæ calamitatis euentum  
 esset repleturus. Fama tamē in vulg' emanauit anno-  
 tatum fuisse codicillum, quod priori testamēto sub-  
 deretur, sed expirante Philippo priusquā testibus ad-  
 scriptis obsignaretur, fuisse disceptū: quod vsque adeo  
 grauitèr Alfonsus tāquā maligne & periniquè exclu-  
 sus tulit, vt ea suppressi codicilli iura Alfonsus Nepos  
 ætate nostra respiciēs, vt sibi totiq; Italiæ clades para-  
 ret, intēperatèr aspirarit. Caruit marmoreo sepulchro  
 Philippus, quum in arca lignea aureo coniecta panno  
 conderetur: eam in sublimi fornicis intercolumnio  
 sustinentibus tignis supra aram maximā suspicimus:  
 sed in infimo pariete affixum tale carmen legimus.

*Clementissimus atque liberalis*

*Insubrum dominus, Philippus hic est,*

*Victis regibus vnico duobus*

*Qui bello, manicasque compedēsque*

*Leuari iubet, in suāsque abire*

*Donatos opibus Lucullianis*

*Sedes, & sua regna, liberatos*

*Tetro carcere. Discite hinc Tyranni:*

*Sunt hæc munera Principum, superbos*

*Debellare, pios & esse victis.*



ARGVMENTVM DEVOLVTAE  
hæreditatis ad Aurelianorum principum domũ,  
breuiffima narratione ex historiis explicatũ.

**P**Hilippovita functo, quum in eo Vice-  
comitum principũ vetusta progenies  
à Matthæo Magno ducta defecisset,  
Mediolanenses in libertatem sese vèdi-  
carũt. Nam Barnabæ principis legiti-  
ma virilis proles, ex tot liberis atq; nepotibus nemi-  
ne, nisi spurii sanguinis, superstite, tota perierat. Neq;  
Ioãnes Maria à coniuratis maturè sublatuſ è Malate-  
sta, neq; Philippus ex Beatrice Tèda, vel demũ ex Ma-  
ria Sabaudia planè sterili, diuerso euentu inauspiciſ  
vxoribus liberos suscepèrāt. Relinquebatur Blāca, quā  
Philippus ex Agneta Maina nobili concubina susce-  
ptā, Frācisco Sfortiæ cōcessa in dotē Cremona collo-  
carat. Verũ hæc quòd spuriiũ nomē præferret, quāquā  
ascititio iure legitimam pater fecisset, paterni impe-  
rii hæreditate minimè digna putabatur. Ita vt tota ea  
directi iuris possessio Valentinam Philippi sororē o-  
mnino respiceret. Hāc Ioãnes Galeacius pater Ludoui-  
co Caroli quinti Galliæ regis filio nuptui dedit, Asta  
vrbe dotis nomine concessa: ad quoque superindur-  
cta cōditione, vt si fratres nouā nuptæ sine liberis de-  
cederent, ipsius demum Valētinae filii legitimiq; suc-  
cessores Insubrum principatu potirentur. Sed tabulis  
eo modo cōfectis Romani Cæsaris autoritas deerat,  
cuius muneris esset appellare Principes, Regna dono  
dare, in clientelam Regulos asciscere, & translatitiis  
hæreditatibus assentiri. Itaq; vt Valentinæ eiúsque li-  
beris rite caueretur, quòd nullus tum ex interregno



certus Cæsar extaret, altercantibus in Comitio Germaniæ proceribus, ad Romanum Pontificem est decursum. Is præclaro assensu Cæsaris vices implevit, quod supremæ potestatis iure rite præstari posse videretur, à summo scilicet sacrorum principe, præcipuoque humani atque diuini iuris interprete, & cōditore legum: quandoquidem Cæsar ipse qui antiquo Romani Pontificis beneficio, in media Germania septemuirali suffragio crearetur, inungendus demum ab eo appelladusque Augustus, & denique aureo diademe coronandus foret. Caterum cōfirmatis eo modo dotalibus tabulis, nonnulli ex ordine iurisconsultorū Cæsareo nomini impensè fauentes reperti sunt, qui dissentire viderentur, vt Pontificem autoritate spoliaret, interposita scilicet subtiliore quadam legis interpretatione, quod nullum omnino ius Pontifici esse videretur in transferendis adiudicandisque Regnorum feudis, tametsi peramplum foret in his litiū cōtrouersis quæ à præsentī iudicio festinata decisionis remedia flagitarent. Verum hæc aliquanto cauilliosius quàm probum iuris professorem deceret, induta, vel hoc vno viuiddæ rationis exemplo falsissima cēsentur, quum & Delphinatus peramplā veterum Allobrogum ditionē, & Arelatensis Prouinciæ Regnū, autoritate Pontificia non dubio tum sed certo iure translata atque adiudicata fuisse constet. Itaque Valentina Ludouicum coniugem insidiis Ioannis Burgundiæ ducis Lutetiæ immaniter interfectum, suo fato subsecuta, filiis susceptis Galliæ Cisalpinæ principatū certissimo hæreditatis iure reliquisse decernitur, quanquā alii prioribus iureconsultis nihilo doctiores, sed pudentiores tamen, quod causam prioris



quæstionis de Põtificia facultate, tâquam reiectâ passim & explosam deferât, adinuêto diuerticulo obliqui tramitis in causæ caput deferâtur: ita vt in dubiũ reuocare non dubitent, an Valentina pater legitimi verique Cæsaris munere Mediolanensis imperii Princeps & Dux fuerit appellatus: quasi Ladislaus insigni studio maximæ partis suffragantium Germaniæ procerum Cæsar salutatus & acclamatus, id liquidissima potestate præstare nequiverit, quoniam à Roberto Baioario pseudocæsare seditiosis armis ex infelici æmulatione peteretur. Id igitur quũ facile, tanquam inane commentitii iuris argumentum, ab omnibus refellatur, Valentina sua iura probè defensa relinquuntur. Peperit autem Valentina tres mares, Carolum scilicet, qui in Aurelianorum principatu Ludouico patri successit, & Ioannem Angolismorum Regulum, qui huius Frâncisci primi Galliæ regis bellica laude & optimorum studiorũ amore valde inclyti, paternus auus fuit: & Philippum Virtutis oppidi Comitem, in quẽ ditionis titulũ, Ioannes Galeacius ducta Isabella Caroli sorore, nomine dotis vocatus antea fuerat. Tribus quoque fratribus accessit soror, quæ (quod minimè prætereundum videtur) Fusio in Aquitania nobilissimo Regulo nupta, Gastonẽ inusitatæ virtutis adolescentem protulit: illum inquam antè imperatorem quàm militem, terrificum belli fulmen, in ipsa partæ victoriæ gloria Rhauennæ extinctũ. Cæterum ex Carolo qui Britannico bello captus multis annis Londini in custodia fuerat, Mariæque Cleuẽsi Menapiorũ principis filia, natus est Ludouicus rex Galliæ eius nominis duodecimus. Is autẽ Carolus, audita Philippi auũculi morte, occasione minimè defuit, quin trãsmisso



in Italiam cum multis copiis Raynaldo duce; hæreditatem adiret: verum à Raynaldo strenuo hercle duce, sed valde præpropere, Fortuna minimè stetit. Alexandria enim ferme tota ultra Tanarum capta, quum oppidum Castellacium oppugnaret, eo euētu cum Bartholomæo Coleone, Astorēq; Fauētino Mediolanensis Reipublicæ ducibus, prælio decertauit, ut profligatis eius copiis fortiter; sed postremò frustra resistens caperetur. Eo tempore Veneti inualidum adhuc incertæ libertatis statum inuaserant, ita ut singulæ imperii ciuitates, quum Mediolanensibus ciuib; parere subesseque indignarentur, nouos sibi dominos quererent. Placentini & Laudenses sese ultro Venetis dederunt, Papienses & Derthonenses Franciscum Sfortiam recepere, Nouariēses Vercellis proximi ad Sabaudiā inclinabant. Sed Franciscus Sfortia Mediolanensiu auspiciis Venetos adortus, expugnata Placentia, Laudēque recepta, ita eorum vires memorabili prælio ad Carauagium contudit, ut Veneti maximi periculi metu, & felicitate tanti ducis perterriti, cum Sfortia pacisci cogerētur: ea tum insidiosè oblata conditione, ut si in Mediolanenses arma conuerteret, ad parandum ex soceri testamento Principatum, ipsi in id bellum validas copias prægrandemq; pecuniā conferrent. Itaque Sfortia deteriso pudore, in suā spem à Fortuna subleuatus, quū alienati animi causas prætenderet, illico diremit amicitiam, armāq; intulit. Nec multo post votis eius vehementer aspirante victoria, Veneti ab eo pari impudentia ad Mediolanēses defecerunt. Sed Mediolanensibus turbidè & cruentè Rempubicam administratibus, inuicti ducis virtuti Fortuna comes fuit: breuīque Mediolanenses armis

N.i.



famēq; perdomiti, frustra adiuuantibus Venetis, Sfortiæ se dediderunt. Idem fecere reliquæ ciuitates, pacatisque demum rebus, Franciscus, vt imperium armis partum Cæsaris auctoritate stabiliret, per legatos postulauit à Cæsare, vt quod adoptionis iure consecutus esset, Augustali diplomate cōfirmaretur. Verum quod id multo maiore pecunia quàm putarat, coemendum foret, id Cæsaris munus generosè contēpsit. Vir enim magnitudine virtutēq; animi nemini secūdus, ineptū & ab ærarii tenuitate prorsus alienum existimabat, eū dignitatis titulum ex venali membrana cerāque Cæsaris præferre, quem spectata bello virtus & inuicta arma detulissent. Nec Galeacius eius successor paternum secutus exemplum, in ea re comparādā vel mediocrem sumptum faciendum putauit: ita vt primus Sfortianæ gentis Ludouicus id Cæsaris diploma à Maximiliano, quatercētum milibus aureis nūmis impetratū, ambitiosè quæsierit, excluso Galeacii fratris filio nepotēq;, quoniā ipse Frāncisco patre dominante, hæreditatēq; potito, natus esset, secus ac fratri Galeacio, apud Firmū Piceni agrinatio, educatōq; in priuata patris fortuna contigisset: qua natalitii iuris prærogatiua, ex historiis Cornelii Taciti repetita, fratrem eiusq; liberos & nepotes antecedere videretur. Sub id autē tēpus ea diplomata impetrata sunt, quo Carolus octauus Gallix rex ad repetendum ex antiquo iure Andegauēsis hæreditatis Neapolitanū Regnū, superatis Alpibus Papiā venit, vt Ioannē Galeaciū inuiferet biduo post moriturū. Itaq; eo non sine suspitione veneni, vita functo, Ludouicus patruus desūptis insignibus, Mediolani Dux & Princeps acclamatur. In eo autem diplomate tanta scilicet pecunia coempto,



disertè appositum fuerat, vt ipse liberique eius & successores legitime procreati, Mediolani Duces appellarentur. Subiungit quoque Corius historiarū scriptor huic diplomati ad vnguem transcripto, insertoq; historiarū volumini, codicillū appositum fuisse, aliqua, vt credi par est, superaddita pecunia, quò benignus ac apprimè liberalis Cæsar ad nothos & spurios, si legitima proles interisset, eadē Principatus iura transferebat. Sed huius codicilli solēne exemplar nō cōparuit, suppressum vtique, si extitit (quod nō affirmauerim) à Ludouico, & demum à Maximiliano Frāciscoq; liberis : & mox extincto Francisco, in manus Cæsarianorū à Maximiliano Stampa arcis custode ex scriniis Sfortianis traditum. Quanquam is, vt nonnulli Sfortiano nomini fauentes prædicant, exempli copiā Iōāni Paulo Ludouici ex concubina filio benignè sed occultè fecisse dicatur. Cæterum non toto vertète anno quum rex Carolus ex incruēta celerique victoria, eictis Aragoniis formidandus euasisset, proptereaq; nō inani metu ad arma consternati principes à Carolo discessissent, Ludouicus Aurelianus ab Asta sua vrbe promotis regiis copiis Nouariam occupauit, vt inde fretus occasione noui belli, adeundæ hæreditatis iter aperiret. Iamque Insubres trepidante Sfortia, ad defectionem animos inclinabant. Sed is conatus ad rectè exploratam facilēque victoriā secundo euentu caruit : quum Ludouicus ingenti fœderatorum hostiū exercitu post Tarrensem pugnam oppugnatus & obsessus, Nouaria excedere cogeretur, Carolo rege cunctatius atque tepidius quàm oporteret, opem ferēte. Verum triennio post Carolo sine liberis vita functo, Gallia Regnum consecutus, inito cū Venetis fœdere,

N. ii.



Sfortiam vehementi impetu expulit, reuersumq; de-  
 mum ex Germania ad Nouariam viuū cepit. Eo mo-  
 do sine vulnere principatu Insubrum potitus, quan-  
 quam nihil sibi vllō tempore timendum putaret, vti  
 erat eximie prudens & vtrāq; fortunam probè ex-  
 pertus, quod hæreditate legitima & iustis armis ven-  
 dicatum fuerat, autoritate Cæsaris corroborandum  
 existimauit. Igitur cum Maximiliano Cæsare, qui ex  
 Tridentinis Alpibus ad Benaci lacus fines peruene-  
 rat, numerata pecunia transactum est, procuratore eius  
 negotii tabulas Georgio Ambrosio Rothomagensi Car-  
 dinale in hanc formulam, vt Ludouicus eiusque ge-  
 ner ex Claudia filia Franciscus Angolismorum Regu-  
 lus, liberique demū eius & posterī successores benefi-  
 ciario iure, Mediolani Duces appellarentur. Verū  
 Germani Cæsaris consilarii in ipso concepti diplo-  
 matis contextu particulam trium verborum infere-  
 bant, quæ concessione sine præiudicio alieni iuris fa-  
 ctam ostenderet, quod Cæsar pudore incolumi prioris  
 diplomatis septennio antè Ludouico Sfortiæ eiusq;  
 liberis concessi penitus obliuisci non posset. Aderat  
 tū Georgio Cardinali Giofredus Carlius Senatus Me-  
 diolanensis Præses, iuris intelligētia clarus. Is ad auer-  
 tendas ferendæ litis occasiones egregie cautus, eā triū  
 verborum sententiā nequaquam ex vsu Regiæ peti-  
 tionis esse differebat, quod non extincta omnino, sed  
 rediuiua Sfortianorum iura, non obscure denūciaret.  
 Sed Georgius vt quoquomodo transigeretur, con-  
 stantibus in id Cæsaris consiliariis, ea verba generose  
 contempsit, quum diceret ipso Sfortia patre in Lo-  
 censē carceris caueam coniecto, filios impuberes,  
 qui apud Belgas in hospitali diuersorio inopem vitam



traducerent, potētissimo regi ferò litē facturos. Neq; Giofredus in præsentienda lite falsus omnino vates fuit, quando ea demum ambigui ac ideo funesti iuris particula non Italiam modò, sed Europam omnem inuecto exitiali bello maximè conturbarit. Siquidem Ludouico duodecimo post subactos Ligures, Venetòsque terrestri imperio penitus exutos, ad conuellēdam Iulii Pontificis auctoritatem Cōcilium Pisis indidente, non aliunde Iulius quàm ex his tribus verbis tuendæ dignitatis occasionem arripuit, vt Maximilianus Sfortia in paternum principatū reduceretur. Sicuti & Leonē quoque Pōtificem octo post annos eandem belli causam secutum, vt Parmam Placentiāque recuperaret, Mediolano Gallos depulisse meminimus. Non defuere tamen summæ grauitatis iurisconsultri, qui ea verba tanquam obscure dissimulantēque prolata & descripta in solennem codicillū non perinde valere iudicaret, ac si disertè expressēque ad declarandam synceri sensus sententiam appositā fuissent: præsertim in grauissimis (vt aiūt) feudorum concessionibus, in quibus apertè & planè scienter ad non dubiam æqui iuris intelligentiam cauisse oporteat. Sed huiusmodi controuersias vel eruditissimi legum interpretes nunquam tempestiuè diffiniūt, quum magnæ lites non in foro, sed pro castris Marte iudice dirimantur. Dedit itaque Rex Franciscus non grauātè multis obtestationibus Clementis & totius Italiæ precibus (quòd nō aliter grauissimo bello finis imponi posset) vt tantisper de iure suo decederet, & Sfortiam regnare pateretur, quem à Cæsarianis maiestatis reum factum, ac impotentibus circumuentum armis, paulo antè transmissis auxiliis adiunarat: ipso

N.iii.



præsertim Carolo Cæsare magna tum æquitate moderati animi Franciscum Sfortiam Bononiæ in gratiam, Augustique imperii clientelam recipiente. Sed Sfortia eo Cæsaris beneficio & Francisci regis indulgentia diu uti non potuit: repente enim inexpectata morte sublatuſ est, ut nouas fatalis belli causas aperiret, quo iterum Europa vastaretur. Igitur Rex Frānciscus Sfortiana stirpe penitus extincta, tota eius ambigui iuris suspicione liberatus, à Cæsare, qui tum ex Africa nobili parta victoria reuersus, Neapolim Romamq; peruenerat, postulauit ut Mediolanēsis principatus sibi redderetur, qui sibi & liberis præclaro hæreditatis iure, & Maximiliani demum Cæsaris legitima concessione, in non dubiam ditionem obueniret. Verum Cæsar qui Regiis legatis aliquā propinquæ sed nõdum maturæ liberalitatis spem dedisse videbatur, ubi Romæ fuit, opinione Gallorum durior est inuentus, usque adeo auerso obfirmatōque animo, ut quum legati Regii inanibus promissis se traduci, & Franciscum suo legitimo iure fraudari quærentur, Carolus ad Pontificem senatūque omnem & legatos Principum, orationem haberet, luculētam hercle, sed æquo amariorem: quum pro tuēda dignitate, auertendāque inuidia, veteris odii memoriam refricasset. Cæterum exitus orationis fuit, ut negaret quicquam se facturum ex voto Regis, nisi Subalpina oppida cum Taurino, Gallicis armis Carolo Sabaudio nuper adempta, redderentur. Agnouere tum plures id esse Cæsariani animi decretum, ut quandiu arma valerent, ab Italia Gallos arceret, ipseque opportuno atque opulento Insubrum principatu potiretur. Atque ita non multo post auctus viribus terra mariq; Nar-



bonensem Prouinciã, vnóq; simul tempore Belgicis armis Galliæ inferioris fines inuasit, scilicet vt Franciscus domestico oppressus bello, Subalpinæ regionis præsidia deducere, Italicarumque rerum penitus obliuisci cogeretur. Sed Gallis vtrunque fortiter suos fines defendentibus, ex eo bello, quod tū frustra susceptum fuit, alia atque alia summæ calamitatis secuta sunt bella: quum violatis induciis & desperata cōcordia, post afflictas nostras opes, Barbaro hosti aditus ad occupandam Pannoniam sit patefactus. Nec hercle sperandum videtur, vt ille fatali nostra socordia factus ingēs, hoc anno, qui est ab excessu Frāncisci Sfortiæ, huius diri belli duodecimus, omnino cōquiescat, quin reliquas Pannoniæ Noricique vrbes nouis illatis cladibus perturbet. Nisi Cæsar ad victorias de Barbaris natus, pio generosoque animo recenter icti ad Sueffionum urbem foederis condiciones respiciat, patremque tuum orbatum præstantissimo filio, deiectumque obiter spe pacis, benignè consoletur, adinuenta scilicet tolerabili aliqua æqui iuris conditione, vt Christianus orbis pace tandem vel sera, ipsius maximè immortalis beneficio, perfruatur, & veræ demū summæq; laudis & gloriæ trophæa Barbarico in solo defigantur.

F I N I S.







2

18279500



